

YOHANE Ọ́lẹ́ẹ̀ Ẹ̀iẹ̀nẹ̀ Wọ́ Ẹ̀i Yohane Lakpana Nii

Ọ́lẹ́ẹ̀ Wọ́ Ninta Ni Nkpa.

- ¹ Kaasọ kakyeko fiẹ bababla ni kayi ka mmle yi, Ọ́lẹ́ẹ̀ nwu lawe.
 Nnwu ku Yaa niawe.
 Ọ́lẹ́ẹ̀ nwu nkpo kafọ́ọ ninle Yaa ne.
- ² Diayo ni kaasọ kakyeko yi, Ọ́lẹ́ẹ̀ nwu ku Yaa niawe.
- ³ Ọ́lẹ́ẹ̀ nwu suoto di Yaa lafe aabla lesaa biala ne.
 Lesalesaa kuninwii nnaa ale diele Ọ́lẹ́ẹ̀ nwu nkpo suoto beefe fiẹ beebila ni nii.
- ⁴ Ọ́lẹ́ẹ̀ nwu kame di nkpa leta diekye ne.
 Nkpa nwu nkpo kafọ́ọ leyọ lekpa diewako batii bamuu.
- ⁵ Lekpa le mmle kafọ́ọ lekpa di ditunu kame.
 Ditunu kafọ́ọ diefuọ lekpa le mmle otii.
- ⁶ Di obe nwu nkpo kame, Yaa lakyese otii onwii. Leyotoo nọọ ninle Yohane ne. ⁷ Nnwọọ niawa aabakakate aata batii di lekpa nwu nkpo suoto ne, ale batii bamuu kanu ọ́lẹ́ẹ̀ nwu ale, baafu mannu. ⁸ Diele Yohane wọ mmle ninle lekpa nwu nkpo. Nnwọọ ọwa ko aawa aabakakate di lekpa nwu nkpo suoto. ⁹ Di obe nwu nkpo kame yi, lekpa le nimu nimu ninkpa ninta ni batii bamuu nfe kowa kayi ka mmle kame.
- ¹⁰ Ọ́lẹ́ẹ̀ nwu nkpo lawe kaayi ka mmle kame, kafọ́ọ kayi ka mmle ditatofọ nwo, nu ninnwo

suoto di Yaa lafe aabla kayi ka mmle. ¹¹ Aawa nnwɔɔ omu nɔɔ batii nfū, kafɔɔ batii nɔɔ nwu nkpo ditafukuti nnεε baafū nwɔ. ¹² Kafɔɔ batii ba bamuu niafū nwɔ nii, baafū nwɔ kafɔɔ baanu nii, εεta ma osuku aε, baale Yaa babi. ¹³ Batalofo batii ba mmle fe mmle okle di osuoto ku osanko nnya bawo fie manlofo ni babi, ee otii dibiesaa kanya. Kafɔɔ Yaa omu nfe nietuna aε baale nwɔ babi.

¹⁴ Olaa nwu nkpo lεbakple otii kuasie wo kaame, nwaako ole ku sibuale leyii nwɔ kame pɔ. Buanya kafɔɔ Lεkpa nɔɔ. Lεkpa le aafū aakyeko ni Ote nfū ta Obi onwii ale nwɔ ni oso.

¹⁵ Yohane lakakate aata batii aakyeko nwɔ suoto, aafaa aabue aε, “Nnya otii wɔ mmle suoto labue nle, ‘Otii wɔ nikɔwa ni sεεmaa nii letaka katoo alenke mi, diekye akpe kofokofoko fie nfe bεεbabla mi.’ ”

¹⁶ Ta sibuale ku nwaako olaa nwu leyii nwɔ ni kame oso, obe lele oowii wo lεyɔɔ. ¹⁷ Lεkasale, Yaa layɔ kufiofa nɔɔ nwu aafenko di Mose suoto aata wo. Kafɔɔ eele wo sibuale ku nwaako olaa nwu nkpo diefe ni di Yesu Kristo suoto. ¹⁸ Otii kuonwii diinya Yaa anya diidii. Diediki Obi nwu nkpo onwii ninkyekye ni ku Yaa, akpe ni di Ote nfū, nnwɔɔ niediki nwɔ eetuo batii nε.

Yohane Lakakate Aata Batii Ale Diele Nnwɔɔ Ninle Kristo Nwu Nkpo.

¹⁹ Yuda batii batunlete lakpee olebatate ku Lewi batii bawo baakye Yerusalem aε, bakye baalaakaale Yohane aε, nnwɔɔ owe ale.

²⁰ Yohane ditasĩ kanya odiki, ni aatokɔ ma aatikiti aε, “Diele ami ninle Kristo nwu nkpo.”

²¹ Ninfe di olebatate nwu lakple baakaale nwo ale, “Ni owe fale mo? Afo ninle Yaa Olaa Buetele Elia?”

Ninfe di Yohane ladiki kanya ale, “Diele nnwoo nle.”

Ninfe baakple baakaale nwo ale, “Afo ninle Yaa olaa buetele wo baabue baate ale abawa ni ne?”

Ninfe aadiki kanya ale, “Oowo.”

²² Nkpo oso baatoko nwo ale, “Ni tokowo otii wo fale ni. Diekye dikpe ni buokplea kanya buokyenko batii ba niekpee wo ni koto. Zmenlaa fakpe fambue di suoto lefo?”

²³ Ninfe di Yohane ladiki kanya aatoko ma ale, fe mmle okle di Yaa Olaa Buetele Yesaia lakpana aate nii, “Ami ninle otii wo selo nikofaa ni di ofaafuu kame simbue ni ale, bilolaa osuku bite bita Saate nwu owabee ne.”

²⁴ Ninfe di batii ba baakpee ni koto baakye ni Farisi batii kame, ²⁵ baakaale Yohane ale, “Nni, nse faale Kristo, ee Elia, ee Yaa olaa buetele nwu nkpo mo, ni le oso fookpeesa batii Yaa ntu?”

²⁶ Ninfe di Yohane ladiki kanya ale, “Ami yi, kokpeesa batii Yaa ntu, kafoo otii onwii n-ye kaame lee minanye nwo nii. ²⁷ Nnwoo ninle otii wo nintikankoe ni sɛɛmaa abawa ni ne, otii wo ninansieko ale bia kadiki nwo ni ntokokata siku.”

²⁸ Asaa ya mmle amuu lawa di Betania okpoo die Yordan okle sɛɛmaa. Nfa di Yohane latokpeesa batii Yaa ntu ne.

Yesu Ninle Yaa Oleota Lefosobi Nwu Nkpo Ne.

²⁹ Di kale lasɛ nii, Yohane lanyaa Yesu latooowa okye nwo, ni aabue aatoko batii ba niayila nwo ni di olooko ale, “Nnya Yaa Oleota Lefosobi nwu

nkpo niɛwa ni kayi ka mmle alɛ ɔbatekete ni batii sikipile di suoto lɛma! ³⁰ Nnwɔɔ ninle otii wɔ suoto latɔɔkakatɛ ni di obe wɔ labuɛ nɛ, 'Otii onwii kɔwa sɛmaa nii, nnwɔɔ ɛɛtakakatoo aleneke mi, diekye, akpe kofokofoko fiɛ bia bɛɛbabla mi.' ³¹ Ami omu kafɔɔ ntatofɔ nɛ nnwɔɔ nɛ. Kafɔɔ lɛwa kokpeesa batii Yaa ntu alɛ kadiki nwu ntuo Israel batii bamuu."

³² Ninfe di Yohane lakple aabue di suoto nɔɔ alɛ, "Lanya Yaa Ninwuna kosoo ninkye osi, fe mmle di lelaapɔɔ nsɔo nii, diabasie nwɔ di suoto.

³³ Kaasɔ kakyekɔ yi, ntatofɔ nwɔ. Kafɔɔ Yaa wɔ niekpee mi alɛ makpeesa ni batii nɔɔ ntu yi, aatɔkɔ mi alɛ, 'Otii wɔ suoto fabanya Ninwuna nii lesɔo diebasie ni di suoto nɔɔ yi, nnwɔɔ ninle otii wɔ nimakpeesa ni batii ku Ninwuna Klekle nɛ.' ³⁴ Nkpo oso amii ntɔɔnya. Nioso nwaako kɔtɔkɔ ye ntikiti nɛ nnwɔɔ ninle Yaa Obi nwu nkpo nɛ."

Nnya Basaateketete Kasale Ba Niatikanko Ni Yesu.

³⁵ Kaleese yi, Yohane ku basaateketete nɔɔ banyɔ lakple baayila ninfa. ³⁶ Obe wɔ aanya Yesu latoofe ni yi, ni aabue alɛ, "Nnya Yaa Oleɔta Lefosobi nwu nkpo!"

³⁷ Obe wɔ di Yohane basaateketete banyɔ nwu nkpo lanu aabue ni ɔlaa nwu nkpo yi, ni baasifi baalaatikanko Yesu nɛ. ³⁸ Obe wɔ di Yesu lamunikii aanya alɛ batikanko nwɔ nii, ni aakaale ma alɛ, "Obe lesaa biowolaa?"

Ni baadiki kanya, baakaale nwɔ alɛ, "Rabi," leyooto le mmle lesɔdiki ninle alɛ Saatuote, "Lekoto, ɔfe fasi?"

39 Ninfe di Yesu latoko ma ale, “Biwa biebanu.”

Di obe nwu nkpo kame diabla fe kotofa abombo ana. Nkpo oso baatikanko nwo baakye baalaanyu nfu asi nii, ninfe baayente nwo osieko dii nwu nkpo kale ne.

40 Basaateketete nwu nkpo nianu ni Yohane olaa wo aabue fie baatikanko ni Yesu onwii lema niale Andrea wo niale ni Simon Petro obilema ne.

41 Nfanwu ni aanya obilema Simon ne, ni aatoko nwo ale, “Butonya Mesia nwu nkpo.” Olaa wo mmle kaso ninle ale Kristo wo beere ni ofo ne.

42 Ninfe aakpaa Simon aakyeuko Yesu ne.

Obe wo di Yesu lanyu ni Simon, ni aabue ale, “Afo ninle Simon, Yohane Obi ne. Kafo nunua yi, babatolee fo ale Kefas,” ee Petro, ayooto ya mmle lesodiki ninle ale difuonkpaa ne.

Yesu Lale Filipino Ku Natanael Ale Baatikanko Nwo.

43 Obe wo kaale lase nii, Yesu labla disibu ale okye Galilea kaso suoto. Ni aanya osuto onwii manlee ni Filipino ne, ni aatoko nwo ale, “Wa fabatikankoe.”

44 Filipino wo mmle lakye Betsaida, okpoo wo di Andrea ku Petro kafe lakye nii. 45 Obe wo di Filipino lakye aalaanya ni Natanael, ni aatoko nwo ale, “Butonya otii wo suoto di Mose ku Yaa olaa babuete lakpana asaa baakyeuko ni di Kokpana Klekle Kukū kame. Nnwoo ninle Yesu wo niekye ni Nasaret ne. Yosef obi ale.”

46 Ninfe di Natanael lakaale nwo ale, “Lesaa biene lewo kafuo odie okye Nasaret fie?”

Ninfe di Fililpo latoko nwo ale, "Afo yi, wa fabanyu!"

⁴⁷ Obe wo di Yesu lany Natanael kowa ni okye nwo, ni aabue aakyeko di suoto nwo ale, "Nnya Israel obi omu omu ninle nwo mmle ne. Kakyonkyo kukanwii diesi nwo kaame."

⁴⁸ Obe wo di Natanael lanu ni olaa wo mmle, ni aakaale Yesu ale, "Le diebla fie faye mi?"

Ninfe di Yesu ladiki kanya aatoko nwo ale, "Ntoonya fo kofokofoko di kubue nwu nkpo kalo fie di Filipino lalae fo."

⁴⁹ Ninfe di Natanael ladiki kanya aabue aatoko Yesu ale, "Saatuote, nwaako afo ninle Yaa Obi nwu nkpo ne. Israel Batii Oka ninle afo!"

⁵⁰ Ninfe di Yesu latoko nwo ale, "Ta mmle letoko fo nle lenya fo ni di kubue nwu nkpo kalo oso fatoofu feenu? Ni fabanya asaa kple ya nistaka katoo alenke ni nle mmle." ⁵¹ Ninfe di Yesu lakple aatoko nwo ale, "Nwaako kotoko fo nle, fabanya mmle okle di kolo masekete nii, di Yaa batokyente matooyie mantoosoo ni di ami, Oti Obi nwu, suoto."

2

Baayo Osanko Di Kana Okpoo Kame.

¹ Di ayi atie sɛmaa, baayo osanko di okpoo wo boole ni Kana di Galilea kaso suoto. Yesu oya lakye nfa. ² Ni baakyakako Yesu ku basaateketete nwo kafɔ di osanko nwu nkpo kayoko ne. ³ Obe wo di nta be baatoblako ni okpe laloo nii, ninfe di Yesu oya lakye Yesu nfu aalaatoko nwo ale, "Nta be booblako ni okpe ntooloo ma."

⁴ Ninfe di Yesu latoko oya ale, “Mma, diele afo nimatoko mi lesaa le dikpe ni lebla nii. Diekye obe wo dikaate ale leta ni lekyakaako diiwo.”

⁵ Ninfe di Yesu oya lakye aalaatoko bakpemblate ba niatoblako ni nta nwu nkpo okpe ale, “Lesaa lele etoko ye ale bibla yi, biebla.”

⁶ Yuda batii osaabla kuale ale baafoto suoto fie baabuo ayo. Nkpo oso baase afuo sepoolo kple akuo ninfa, di ntu adubukii fe ana ee anoo nikayii ni ninwii kame.

⁷ Ninfe di Yesu latoko bakpemblate nwu ale, “Bidu ntu biyiisa sepoolo nwu nkpo kame.” Nkpo oso baadu ntu baakpete si kaame siayii teketeke.

⁸ Ninfe di Yesu latoko bakpemblate nwu ale, “Bikusii ntu nwu nwo bikyenko osuoto nwu nin-ye ni di osaabla nwu kanya.” Ninfe baakusii mi baakyenka nwo ne.

⁹ Obe wo di onoofo nwu nin-ye ni di osaabla nwu nkpo kanya latu ntu be nintookple ni nta aanyu nii, atatofa nfu di nta nwu nkpo lakye nii. Kafoo bakpemblate nwu nkpo niakusii mi nii, mma, baatofa. Nkpo oso onoofo nwu nkpo lalae osanka nwu nkpo osa, ¹⁰ ni aatoko nwo ale, “Otii biala n-ya nta biene anta batii manyi, nse nfe boosie fie nfe an-ya mbe ninanle ni anwako ma manyi. Kafoo afo mianwu nfe feeyo mbiene feewako ne.”

¹¹ Nle mmle di Yesu labla ni di Kana okpoo di Galilea kaso ninle okpe wo niabla ni okpe kasale aabla ni aayo aadiki ni lekpa noo aatuo ni ne. Ni di basaateketete noo lafu nwo baanu ne.

¹² Di nle mmle sɛmaa, Yesu ku ɔya ku babilema suɔtobi ku basaateketete nɔɔ lasifi Kapernaum, baalaasie ninfa ayi aseɛ awo.

Yesu Latososa Basaasunsute Aadiki Di Yaa Olekatakɔ.

¹³ Ditoobu ayi aseɛ di Yuda batii Okpi Diisi Ofe Dii olebee nfe mawo nii, Yesu lakye Yerusalem.

¹⁴ Obe wɔ aakye ni Yaa Olekatakɔ nwu nkpo kame, aalaanya batii kosunsū banankyue ku bafoso ku ablonumaa. Aanya kafɔɔ batii ba nikobie ni ato nsi di sipunu lɛma katū. ¹⁵ Nkpo oso aayɔ sikū aaloso mpile, ni aatososa batii nwu nkpo ninkosunsū ni babɔkɛɛ nwu ku banankyue ku bafoso nwu nkpo aadiki di Yaa Olekatakɔ nwu kame nɛ. Ni aatukusa koto babiete sipunu nwu aayu, aasamiisa koto nwu nkpo kafɔɔ nɛ.

¹⁶ Ninfe aatɔkɔ batii ba niatoosunsū ni ablonumaa alɛ, “Bidieko ma ninfū bisifiko! Biedie Teemi leyo ɔyɔ ɔbla asaa kasunsuko!”

¹⁷ Nfa nfe di basaateketete nɔɔ lanyuma ɔlaa wɔ bɛɛkpana ni Kɔɔkpana Klekle Kukū kame alɛ, “O Yaa, lɛbɔmbɔ nii di Leyo lɛfɔ suoto leta ninu lɛsɛɛ mi.”

¹⁸ Ta nle mmle oso, Yuda batii batunlete lawa Yesu nfū babakaalɛ nwo alɛ, “Lementuosaa faafuo ɔbla otuo wo alɛ fakpe osuku fambla lɛsaa le mmle?”

¹⁹ Ninfe di Yesu ladiki kanya alɛ, “Bibie Yaa Leyo le mmle bite kaasɔ, di ayi atie kame yi, makple nse ni letofo.”

²⁰ Ninfe baakaalɛ Yesu alɛ, “Be foobuɛɛ? Obe wɔ bɛɛyɔ alɛɛ afosi ana alɛɛ akuɔ beetofo ni Leyo le mmle, fabayɔ ayi atie fanse ni letofo?”

²¹ Batanu ɔlaa wɔ mmle kasɔ. Diekye leyo le suoto di Yesu latɔɔkakatɛ ni niale suoto nɔɔ sina nɛ. ²² Nioso, semaa, obe wɔ di Yaa lasenkɛsa Yesu aakyeko ni bakpi kame fiɛ nfiɛ di basaateketetɛ nɔɔ lanyuma alɛ aabue ɔlaa wɔ mmle. Nkpo oso baafũ Kɔkpana Klekle kame selaa se bɛɛkpana ni ku ɔlaa wɔ di Yesu labue ni baanu.

Yesu N-ye Otii Letembi Kaasɔ Ka Mmle Suoto Osie Kanya.

²³ Obe wɔ di Yesu lawɛ ni di Yerusalem di Okpi Diisi Ofe Dii olebee nwu kame yi, batii kpinwu lafũ nwɔ baanu, di obe wɔ baanya ni sɛkpe se niebla ni ɔkpe ate ate se aabla ni oso. ²⁴ Kafɔɔ Yesu omu ditadie suoto nneɛ ata ma, diekye aatofo batii nwu bamuu. ²⁵ Nkpo oso ditafi alɛ otii kuonwii katɔkɔ nwɔ batii ba okle bale nii, diekye nnwɔɔ omu aye otii letembi kaasɔ ka mmle suoto.

3

Yesu Latuo Nikodemo Asaa.

¹ Di obe nwu nkpo kame yi, Yuda batii tunletɛ onwii lawɛ baatɔɔlɛɛ ni Nikodemo. Aasiɛ di dikudi le baatɔɔlɛɛ ni Farisi batii kame. ² Dii ninwii kakye, aamaa buɛɛ aawa Yesu nfũ, ni aabaakaale nwɔ alɛ, “Saatuotɛ, buye bule Yaa nfũ feekye. Diekye otii kuonwii dilabafuo sɛkpe se niebla ni ɔkpe, fɔɔbla ni ɔbla, nse Yaa diesiko nwɔ.”

³ Ninfiɛ di Yesu latɔkɔ nwɔ alɛ, “Nwaako kɔtɔkɔ fɔ nle, nse baase otii lelofo yi, ɔlobafuo Yaa sɛka kalekɔ nwu nkpo kame ɔnya.”

⁴ Ninfe di Nikodemo lakaale nwo ale, “Be foobuee? Le nse otii ntoomuo baakple manse nwo lelofo, see okple aakple ansifi oya kafutu kame, mankple manse nwo lelofo lenyoofa?”

⁵ Ninfe di Yesu latoko nwo ale, “Nwaako kotoko fo nle, nse baase otii lelofo di ntu ku Yaa Ninwuna kame, olobafuo Yaa seka kaleko nwu nkpo kame obu. ⁶ Diekye otii wo beefe di suoto sina kame beelofo ni yi, suoto sina kame otii ale. Kafoo nwo beelofo ni di Yaa Ninwuna kame yi, ninwuna kame otii ale. ⁷ Nkpo oso tanta diabla fo okpe ale letoko fo nle dikpe nii beese ye lelofo. ⁸ Kofeefo nfe kunfe nfu ninlekũ nii. Fannukũ diwi, kafoo fantofo nfu kuokye nii, ku nfu kuofe nii. Nkpo okle kafoo dite ku otii wo beelofo ni di Ninwuna kame ne.”

⁹ Ninfe di Nikodemo lakaale Yesu ale, “Le ninle mmle kamafuo owa kaanya?”

¹⁰ Ninfe di Yesu latoko nwo ale, “Saatuote kple fale di Israel batii kame. Ni be oso floonu asaa ya mmle kasoo? ¹¹ Nwaako kotoko fo nle munkakate di asaa ya buye ni suoto, asaa ya butoonya ni kafoo mun-yo kanya loo mundiki mumbue. Kafoo kuonwii lee dilootuna ale afu otaa wo lekya buoyie ni anu. ¹² Nse lekakate di kayi ka mmle asaa suoto leta fo fananfũ mi fanu mo, ni le dibabla nse lekakate leta fo di Yaa kafa asaa suoto fie fabafũ mi fannu? ¹³ Otii kuonwii diikata akye osi anya, dilenkee ami, Otii Obi nwu lete niakye osi aawa kasoo ka mmle nwu suoto.

¹⁴ “Fe mmle okle di Mose latakatesa kosaanwu ko baayo leboosaa baabla ni aasaka ni koowoso suoto di ofaafuu kame yi, nkpo okle kafoo dikpe ni beetakatesa ami, Otii Obi nwu nkpo katoo

ne, ¹⁵ ale otii lele niefũ mi eenu, aawe nkpa be ninnaa ni kaloo.

¹⁶ “Diekye Yaa nte ambombo kayi ka mmle osie kanya, ni eyo Obi noo onwii nwu eta ale, otii lele niefũ nwɔ eenu, alaawoo. Kafoo, aawe nkpa be ninnaa ni kaloo. ¹⁷ Diekye Yaa diekyesee Obi noo nwu ale abakanko batii kaayi ka mmle alo ma lepoo. Kafoo ale diefe ni di Obi noo nwu suoto, batii kawɛ didiki.

¹⁸ “Batii ba niefũ Yaa Obi nwu beenu nii, Yaa dilaakanko ma alo ma lepoo. Kafoo batii ba ninanfũ nwɔ banu nii, batookpi lepoo kofokofoko, diekye baafũ Yaa Obi nwu nkpo onwii banu.

¹⁹ Lesaa le oso baakanko ma manlo ma ni lepoo ninle ale, lekpa ntookye osi diɛwa kayi ka mmle kafoo batii kɔbombo ditunu manlenkee lekpa nwu nkpo, diekye ɔsaabla lɛma lɛbla dikpile.

²⁰ Diekye otii lele nimbla sikipile yi, ankyidi lekpa nwu, nioso anwa lekpa nwu nkpo nfũ, diekye ɔoyeke ale nse ɛwa lekpa nwu nkpo nfũ yi, babadiki ɔsaabla noo kayi. ²¹ Kafoo otii wɔ nimbla ni lesaa di osuku kanya yi, anwa lekpa nwu nkpo nfũ ale, lekpa nwu nkpo kadiki nintuo ale nwaako, ambla asaa di Yaa dibiesaa kanya.”

Yohane Yaa Ntu Kpeesate Nwu Latakatɛsa Yesu Katoo.

²² Di nle mmle sɛmaa, Yesu ku basaateketete noo lasifi Yudea nteɛ nwu baalaawe ninfa obe owo aatookpeesa batii Yaa ntu. ²³ Di obe nwu nkpo kame, Yohane kafoo lawe di Aenon wɔ niatɛtɛɛ ni Salim aatookpeesa batii Yaa ntu, diekye ntu lawe ninfa diapɔ. Nioso batii kpinwu latookye okye noo ninfa aatookpeesa ma Yaa ntu.

24 Di obe nwu nkpo kame yi, bayimufū Yohane batε leeyo.

25 Dii ninwii ɔlaa ɔnanfi labuo di Yohane basaateketete bawo ku Yuda otii onwii nteε di suoto ofoto ɔsaabla suoto. 26 Nkpo oso baakyε Yohane nfū baalaakaale nwo ale, “Saatuote, foonyuma osuoto wo niawe ni di ɔkye lefo, faadiki nwo faatuo wo ni di Yordan okle kakye nyoofa? Nnwoo kafoo nfe ookpeesa batii Yaa ntu, batii bamuu nfe kosifi ɔkye nwo!”

27 Ninfε di Yohane ladiki kanya ale, “Otii kuonwii dilabafuo lesalesaa kuninwii ɔwe, nse diele Yaa niεto. 28 Aye bamu bionyuma bile latoko ye nle, ‘Diele ami ninle Kristo nwu nkpo, kafoo ami yi, okyese ko di Yaa lekyese mi ale kale nwo katū.’ 29 ɔkafooasa ole ninle ɔkafooasofo. Kafoo nse ɔkafooasa siwo wo nin-ye ni di ɔlooko eenu ɔkafooasa selo yi, suoto n-yoo nwo osie kanya. Nkpo okle kafoo di amii, ntoonu nwo ni selo, suoto leyoo nii ntɔobla nimu ne. 30 Nioso, dikpe nii nnwoo εtaka katoo, amii dikpe nii lewa kaso.

Otii Wo Niekye Osi Eεwa Ni Nlenke Bamuu.

31 “Otii wo niekye osi εεwa ni letaka katoo alenke bamuu. Otii wo kafoo niekye ni kaso ka mmle suoto, kaso ka mmle otii ko ale, kaso ka mmle suoto asaa kafoo suoto lete ankakate. Otii wo niekye osi εεwa ni nlenke asaa amuu.

32 Oobue lesaa le εεnya ni ku nle eenu nii, kafoo otii kuonwii diefū nwo ɔlaa anu. 33 Batii ba niefū nwo ɔlaa beenu nii, kodiki mantuo klekle ale Yaa ɔlaa nte nkpo. 34 Otii wo di Yaa lekyese ni kodiki Yaa ɔlaa ambue, diekye Yaa leyoo Ninwuna

nɔɔ eekpee nwo kaame pɔ. ³⁵ Yaa mbombo Obi nwu nkpo, ni eeyɔ lesaa biala eekpe nwo di nneε kame ne.

³⁶ “Otii lele niefũ Obi nwu eenu, akpe nkpa be ninnaa ni kaloo. Otii lele kafɔɔ niesĩ Obi nwu atoko ɔkyɔɔ dilabawε nkpa, ni Yaa letokonanfi kafɔɔ matika nwo di suoto.”

4

Yesu Lakakateko Samaria ɔsanko Onwii.

¹ Di obe nwu nkpo kame yi, Farisi batii lanu ale Yesu nfe kokpeesa batii Yaa ntu, basaateketete nɔɔ kafɔɔ nfe latɔɔpɔ baatoolenkee Yohane bale.

² Nwaako baabue nii, Yesu omu ditakpeesa otii kuonwii Yaa ntu, kafɔɔ basaateketete nɔɔ nia-tookpeesa batii. ³ Nioso obe wɔ di Yesu lanu ɔlaa wɔ baatoobue nii, ninfε aadie di Yudea kasɔ suoto aakple aasifi Galilea ne. ⁴ Di osuku nɔɔ nwu nkpo ɔkyε kame, dikpe nii eefe di Samaria kasɔ suoto.

⁵ Ninfε di Yesu lalaadu Sikar wɔ ninle ni Samaria okpoo onwii kame ne. Okpoo nwu letεεtεε kasɔ ka di ɔwa lema Yakob layɔ aata ni obi nɔɔ Yosef. ⁶ Ntu dibio le di Yakob lakutu ni late ninfa. Obe wɔ di Yesu labadu ni ntu dibio nwu nkpo nfa, ditoobuo nwo ni di osuku nwu nkpo ɔkyε kame, aasie ni di ɔlɔɔkɔ. Diabla fe kakũ lefosi abombo anyɔ kame.

⁷ Di obe nwu kame Samaria ɔsanko onwii lawa ale ɔɔbadu ntu. Ninfε di Yesu latɔkɔ nwo ale, “Tεε ntu nnyi.” ⁸ Di obe nwu nkpo kame, Yesu basaateketete nɔɔ lafe okpoo ale bɔɔlaaya alesaa manwako.

⁹ Ninfe di osanko nwu nkpo lakaale nwɔ ale, “Be oso di afo Yuda otii fookaale ami Samaria otii ntu?” Aakaale nwɔ ɔlaa nwu nkpo diekye Yuda batii ku Samaria batii nimbla asaa anwii.

¹⁰ Ninfe di Yesu ladiki kanya ale, “Nse fe oye faye lesaa le di Yaa nta ni ku otii wɔ nikokaale fo ale tɔɔ ntu anyi nii, nse bia afo nitobakaale nwɔ, anta fo ntu be ninta ni nkpa.”

¹¹ Ninfe di osanko nwu nkpo labue ale, “Ɔnɔɔfo, ntu didusaa nnaafɔ, dibio le mmle kafɔ lekyofo, ni ɔfe fabawe ntu be ninta ni nkpa fankyeko? ¹² Ɔwa loo Yakob niakutu dibio le mmle aata wo, nnwɔɔ omu ku babi ku banankyue nɔɔ lanyi ntu di dibio le mmle kame. Obue foobue fale feetakakatoɔ falenke nwɔ ee, see le?”

¹³ Ninfe di Yesu ladiki kanya ale, “Otii lele nienyi ntu di dibio le mmle kame yi, otukɔnsɔ makple kunklee nwɔ. ¹⁴ Kafɔ otii lele nienyi ntu be kamatoɔ ni yi, otukɔnsɔ dilabasinklee otii nwu nkpo diidii. Ntu nwu nkpo kamatoɔ ni makple ntu kataako di kame nɔɔ nintɔɔ nkpa ntu, nintɔɔ kafɔ nkpa be ninnaa ni kaloo.”

¹⁵ Ninfe di osanko nwu latoko Yesu ale, “Ɔnɔɔfo, ni tee ntu nwu nkpo nnwo, mmle okle di otukɔnsɔ dilabasinklee mi ni diidii. Ni namasinwa nfu mmle kafɔ nle kamadu ntu.”

¹⁶ Nfa nfe di Yesu latoko nwɔ ale, “Tɔokyɛ faalaaleɛ ɔsa lefo biɛwa.”

¹⁷ Ninfe di osanko nwu latoko Yesu ale, “Nnaa kɔsa.”

Ni di Yesu latoko nwɔ ale, “Kute nkpo nse feebue fale fanaa kɔsa. ¹⁸ Nwaako feebue. Diekye fatɔɔyɔ basa banɔɔ diebafe. Bia minko

nwɔ ninsi ni nunua wɔ mmle aale fɔ kɔsa kumu kumu.”

¹⁹ Ninfe di osanko nwu ladiki kanya ale, “Ɔnwɔfo, ntoonya nle Yaa ɔlaa buetete fale!

²⁰ Awo Samaria batii yi, buye bule kobokote ko mmle suoto di bawa loo latoosumu Yaa. Kafɔ aye Yuda batii biobue bile Yerusalem lete dikpe nii, beesumu Yaa.”

²¹ Ninfe di Yesu latoko nwɔ ale, “Osanko, fũ ɔlaa wɔ mmle kotoko fɔ ni fanu. Obe kɔwa batii bamuu dilabasinwakosa asi kaso bata Yaa di kobokote ko mmle suoto, ee Yerusalem. ²² Aye Samaria batii yi, bieye lesaa le biosumu nii. Kafɔ awo Yuda batii yi, buye otii wɔ buosumu nii. Diekye, didiki yi, awo Yuda batii kame diekye. ²³ Kafɔ obe kɔwa, obe nwu nkpo kafɔ ntoowo di batii ba ninsumu ni Yaa di osuku kanya, kamasumu Teete nwu di Yaa Ninwuna kame ku nwaako ole kame. Diekye batii ba mmle okle di Yaa komie ale batansɔɔ ne. ²⁴ Obe wɔ di Yaa nle ni Ninwuna oso, dikpe ni batii ba nikosumu nwɔ nii, basumu nwɔ di Ninwuna kame ku nwaako ole kame.”

²⁵ Ninfe di osanko nwu latoko Yesu ale, “Nye nle otii wɔ beere ni ɔfɔ manle ni Kristo kamawa. Nse ewa yi, abatoko wo lesaa biala.”

²⁶ Ninfe di Yesu ladiki kanya ale, “Ami wɔ mmle nikokakateko fɔ ni ninfũ mmle yi, ami ninle otii nwu nkpo ne.”

²⁷ Di obe nwu nkpo kame yi, Yesu basaateketete nɔɔ lakple, nioso diabla okpe ale ɔkakateko osanko nwu nkpo. Kafɔ kuonwii lema ditafuo osanko nwu okaale ale, “Be foomie” ee bakaale Yesu ale, “Be oso fɔkakate ko nwɔ?”

28 Ɔsanko nwu ladie ditubukii nɔɔ nwu nkpo ninfa, aakple aasifi okpoo aalaatokɔ batii ale, 29 “Biwa biebanu otii wɔ nietokɔ mi ni lesaa biala ntooyibla lenya ni! Sɛɛ nnwɔɔ ninle Kristo nwu nkpo?” 30 Nkpo oso batii nwu nkpo ladie di okpoo nwu nkpo kame baakye ale boolaanyu Yesu.

31 Di obe nwu nkpo kame kafɔɔ, Yesu basaateketete latootikiti nwo lekoto ale, “Saatuote, bale alesaa!”

32 Kafɔɔ Yesu latokɔ ma ale, “Nkpe alesaa male ni, minanye nii.”

33 Nkpo oso basaateketete nɔɔ lakye kasɔ baatokaaale bawo ale, “Sɛɛ otii owo ntɔɔwako nwo alesaa awo eele?”

34 Yesu latokɔ ma ale, “Alesaa nii ninle ale kabla otii wɔ niekpee mi ni kotɔ dibiesaa, ale kaloo okpe wɔ eekpee mi ale mabla ni obla. 35 Aye nimbue bile, ‘Awente ana kamaa, se ofielebee ntoowo.’ Kafɔɔ kotokɔ ye nle, bitakatasa anu bienyu kofe nwu nkpo, alesaa nwu nkpo ntɔɔsɛɛ, dikpe nii nfe manfiere nya nii. 36 Otii wɔ nikofiere ni yi, nnwɔɔ di Yaa nta koto, ansiisa alesaa nwu nkpo kafɔɔ anta nkpa be ninnaa ni kaloo ne. Nkpo oso otii wɔ nimpe ni ku otii wɔ ninfiere nii yi, akyuu lema anyɔ manya suoto leyɔɔ osie kanya. 37 Nkpo oso olaa nwu nkpo mambue ale, ‘Otii onwii mpe, obamba kafɔɔ nfiere ni yi, kute nkpo.’ 38 Ami yi, lekpee ye nle, biakye minaafiere alesaa di nfũ minankpe dibuo ye nii. Batii bamba lebla okpe ninfa diebuo ma. Kafɔɔ aye yi, biowe kowee di okpe lema obla kame.”

Batii Kpinwu Di Samaria Lafū Yesu Baanu.

³⁹ Di obe nwu nkpo kame yi, Samaria batii kpinwu niakye ni okpoo nwu nkpo lafū Yesu baanu. Diekye osanko nwu nkpo latoko ma ale, “Eetoko mi lesaa biala ntooyibla lenya nii.”

⁴⁰ Nioso obe wo di Samaria batii nwu nkpo lawa ni Yesu nfū yi, baatikiti nwo lekoto ale asie ma diokye, nioso aasie di okye lema ayi anyo.

⁴¹ Nioso batii bamba kpinwu lakple baafū Yesu baanu, ta selaa nwo se aabue ni oso.

⁴² Ni baatoko osanko nwu ale, “Butoofū buoonu nfe, diele di selaa se feetoko wo ni oso, diekye awo bamu loo butoonu nwo olaa, butootofo kafoo bule, nwaako nnwoo ninle kayi ka mmle dikite.”

Yesu Layoosa Abaa Onwii Obi Ofie.

⁴³ Di Yesu lale ni ayi anyo ninfa, ni aadie aasifi Galilea kasoo suoto ne. ⁴⁴ Nnwoo omu nwo aabue ale, “Mambu Yaa olaa buetete kuonwii di nnwoo omu nwo okpoo.” ⁴⁵ Kafoo obe wo di Yesu labuo ni Galilea, batii nwu ninfa lafū nwo osie kanya, diekye obe wo baakye ni Okpi Diisi Ofe Dii kaleko di Yerusalem yi, baanya asaa ya amuu aabla ni ninfa.

⁴⁶ Ninfe di Yesu lakple aasifi Kana di Galilea kasoo, di leba le ayoo ntu aabla ni nta ne. Abaa onwii obii onwii lawe ninfa di Kapernaum di obi nwo suotobi latoofie nii. ⁴⁷ Obe wo di osuoto nwu nkpo lanu ale Yesu ntokple di Yudea ewa ni Galilea, ni aakye okye nwo aalaatikiti nwo lekoto ale awa abayooa obi nwo nwu nkpo nikoloo ni okpi ofie.

⁴⁸ Ninfe di Yesu latoko nwo ale, "Nse biénya sekpe se niebla ni okpe ku atuosaa mínfũ bianu."

⁴⁹ Ninfe di onofotii nwu latoko nwo ale, "Saate, lekoto wa wla fabanyu obi nii nwu mmle okle anamakpi ni."

⁵⁰ Ninfe di Yesu latoko nwo ale, "Tockye, obi lefo nwu nkpo mawe nkpa."

Ni di onofotii nwu nkpo lafũ Yesu olaa wo aatoko nwo ni aanu, ni aasifi ne. ⁵¹ Obe wo nfe akye di osuku oosifi ni leyo, ni baakpente nwo lawa baabakyakako nwo baatoko nwo ale obi lefo nwu nkpo ntotaka di ofie. ⁵² Ninfe aakaale ma ale onembe kame aataka di ofie? Ninfe baatoko nwo ale, "Kosa kakũ olomu onwii kame di lewofo ofie nwu nkpo layo nwo."

⁵³ Ninfe di obiso nwu nkpo ote lanyuma ale, di obe nwu nkpo kame tutuutu di Yesu latoko nwo ale, "Obi lefo nwu nkpo mawe nkpa." Nkpo oso onofotii wo mmle ku leyo nwo kame batii bamuu lafũ Yesu baanu.

⁵⁴ Nle mmle niale okpe wo niabla ni okpe nyofa di Yesu labla ni di obe wo aakye Yudea aawa ni Galilea kaso ne.

5

Yesu Layosa Oti Onwii Ofie Di Lepanta Ninwii Oloko.

¹ Nle mmle sɛmaa, Yesu lakple aakye Yerusalem di obe wo di Yuda batii kole ni dii lema ninwii. ² Di bafoso kayoko oloko di Yerusalem, lepanta ninwii nte manle ni Betesda di Hebri sele kame. Bɛɛpe akpanta anoo beekyisa lepanta nwu nkpo. ³ Bafiete olambu

kple late di akpanta nwu nkpo kalo baale ni banumbiete ku mba di nkpaalema lekpi nii ku mba niekpi ni kakyekakye. Baate baasoko ntu nwu nkpo obakaa. ⁴ (Diekye Yaa tokyente onwii nwa amabakaa ntu nwu nkpo di obe obe. Fiete lele niekasa obuo di ntu nwu nkpo kame di obe wo di Yaa tokyente lebabakaa mi nii, ofie lele kule, kunyoo fiete nwu nkpo.) ⁵ Osuoto onwii lawe ninfa aatoofie ni ale afosi atie ale ane amu. ⁶ Obe wo di Yesu lanyoo nii, aatofo ale osuoto wo mmle ntoote diofie diekle. Nioso aakaale nwo ale, "Foomie fale ofie lefo nwu nkpo kuyoo fo?"

⁷ Ninfe di fiete nwu nkpo ladiki kanya ale, "Onofo, otii kuonwii nnaa mi abakyakaakoe anyo mi ankpee ni di lepanta nwu nkpo kame nse beebakaa ntu nwu. Nse kokpe nle kanaabuo yi, otii bamba nle mi katu, anka mi olaabuo."

⁸ Ninfe di Yesu latoko nwo ale, "Taka! Faayo okla lefo, faakye." ⁹ Nfanwu ofie layoo osuoto nwu nkpo, aayo okla noo, aakyako okye.

Dii le di olaa wo mmle lawa nii, Lenyesteyi diale. ¹⁰ Nkpo oso Yuda batii banooftii latoko osuoto nwu di Yesu layoosa ni ofie ale, "Mie Lenyesteyi dile, kufiofa loo dieta osuku ale faaklee okla lefo."

¹¹ Ninfe di osuoto nwu nkpo ladiki kanya ale, "Osuoto wo nieyoosee ni ofie nietoko mi ale n-yo okla nii ninkyee."

¹² Ninfe baakaale nwo ale, "Owe ninle otii nwu nietokofa ale, 'Yo okla lefo faakye ni?'"

¹³ Kafɔɔ osuɔɔ nwu nkpo baayɔɔsa ni ofie dieye otii wɔ di Yesu nle nii. Diekye batii dikudi niawe ninfa nkpo, Yesu kafɔɔ ntooyu ma kaame.

¹⁴ Di nni nkpo sɛmaa, Yesu lanyaa osuɔɔ nwu nkpo di Yaa Olekatakɔ, ni aatɔkɔ nwɔ ale, “Nyu lo! Nunua fatoosie nii, tansimbla okpile. Nse diele nkpo, ni lesaa le ninlenke ni nle mmle nikamabla fɔ.” ¹⁵ Ninfɛ di osuɔɔ nwu nkpo lasifi aalaatɔkɔ Yuda batii banɔɔfotii nwu nkpo ale, Yesu ninle otii nwu nkpo niayɔɔsa nwɔ ni ofie.

¹⁶ Nkpo oso Yuda batii nwu nkpo lakyako Yesu otikanko, diekye Lenyɛɛɛɛyi suoto aayɔɔsa nwɔ ofie. ¹⁷ Kafɔɔ Yesu latɔkɔ ma ale, “Obe lele Teemi kɔbla ɔkpe, nkpo oso dikpe ni amii lebla.”

¹⁸ ɔlaa wɔ mmle aabue ni lakple diata ale Yuda batii banɔɔfotii lamie osie kanya ale boolo nwɔ. Diele ale aataale ni Lenyɛɛɛɛyi kufiofa nwu nkpo lete oso, kafɔɔ aabue ale Yaa ninle nwɔ Kote. Ni nle mmle kotuo ale, oonyu suoto nɔɔ ale manko Yaa bakyɛkyɛ.

Yaa Leyɔ Osie Ɛeta Obi Nwu Nkpo.

¹⁹ Nioso Yesu latɔkɔ ma ale, “Nwaako kɔtɔkɔ ye nle, Yaa Obi nwu dilaafuo lesalesaa ɔbla di nnwɔɔ omu nɔɔ kame. Kafɔɔ lesaa le ɛnya Ote kɔbla nii, nni ambla nɛ. ²⁰ Diekye Ote nwu mbɔmbɔ Obi nwu. Nioso lesaa lele di Ote nwu omu kɔbla, aantuo Obi nwu nimuu. Abatuo nwɔ bia asaa kplɛ ya ninlenke ni n-ya mmle ale bamuu lee dibabla ye yaaa. ²¹ Fɛ mmle okle di Ote nwu nsenkesa bakpi anta ma ni nkpa yi, nkpo okle kafɔɔ di Obi nwu nta mba eediki ni nkpa nɛ. ²² Ote nwu nkpo omu nɔnkanko otii

kuonwii. Kafoo εεγo lekanko biala eekpee di Obi nwu nkpo nneε kame niimu ²³ ale, batii bamuu kabu Obi nwu nkpo, fe mmle okle boobu ni Ote. Otii lele ninambu Obi nwu nkpo yi, ni aambu Ote wo kafoo niekyesee nwo nii.

²⁴ “Nwaako kotoko ye nle, otii lele nienu mi oiaa, eefu otii wo niekpee mi ni koto eenu yi, akpe nkpa be ninnaa ni kaloo. Blabakanko nwo, kafoo atoofe kuukpi kame, eebuo nkpa fole nwu kame kofokofoko. ²⁵ Nwaako kotoko ye, obe kowa, obe nwu nkpo kafoo ntowa kofokofoko di bakpi manu ni Yaa Obi nwu nkpo selo, mba nimanu nii, mataka mansie nkpa. ²⁶ Fe mmle okle di Ote nwu nkpo omu ninle ni nkpa kataako yi, nkpo okle kafoo ebla Obi noo nwu ale aale nkpa kataako ne. ²⁷ Eeto osuku ale aakanko, diekye Otii Obi nwu ale.

²⁸ “Bitanta nle mmle labla ye okpe. Diekye obe kowa di bakpi bamuu manu nwo ni selo, ²⁹ mandie di sekya lema kame. Mba niebla ni dibiene mataka mansie nkpa, mba kafoo niebla ni sikipile babataka manfu leroo olo.

Yohane Ladiki Yesu Kanya.

³⁰ “Ninfuo lesalesaa kuninwii obla di ami omu osie nii kame. Nkanko di mmle okle lete di Yaa letoko mi ni kanya. Nkpo oso lekanko nii lewo. Diekye nimmbla nle ninle mi nii, kafoo nle ninle ni otii wo niekpee mi ni koto.

³¹ “Nse lediki suoto nii kanya yi, ni suoto nii kanya odiki nwu nkpo diewo nimu. ³² Kafoo otii onwii nkpe oodiki mi ni suoto kanya, n-ye kafoo nle, kanya ka oodiki ni di suoto nii nte nkpo.

³³ “Biekpee batii bεεkyε Yohane nfū bεεlaakaale nwo selaa beekyeko suoto nii, εεtoko ma kafoo olaa nwo ninte ni nkpo. ³⁴ Diele kafoo ale komie otii kaayi ka mmle ale aadiki mi kanya. Lebuε olaa wo mmle ale biawe didiki. ³⁵ Yohane late fe kandie baaso aayila aatookpa nii, biatuna bile bionya ni suoto leyoo di lekpa nwo nwo nkpo kame di obe kakui kame.

³⁶ “Kafoo ami yi, suoto kanya ka ninkpe mi kodiki ni letaka katoo dilenke nka di Yohane ladiki nii. Diekye sekpe se di Teemi lekpee mi ni di nneε kame ale kabla nloo ni kobla ni kotuo ale, nnwoo niekpee mi koto. ³⁷ Teemi wo kafoo niekpee mi ni koto, nikodiki mi suoto kanya. Diidii biinu nwo selo ee binyoo kafoo anu ku anu. ³⁸ Bieemufu olaa nwo nwo nkpo kafoo bikpee di situ lee kame. Diekye bieefu otii wo eekpee ye ni binu. ³⁹ Biotekete Kokpana Klekle Aku kame selaa obe lele ku disibu bile bibawe nkpa be ninnaa ni kaloo. Kokpana nwo nkpo kafoo kodiki mi suoto kanya. ⁴⁰ Kafoo biesi bile biloowa okye nii ale kata ye nkpa.

⁴¹ “Noomie batii koleε kaasoo ka mmle suoto, ⁴² diekye n-ye batii ba okle bile nii, n-ye kafoo nle binaa lebombo bieta Yaa di situ lee kame. ⁴³ Lewa di Teemi leyooto kame kafoo biefu mi. Kafoo nse otii bamba lewa di leyooto nwo nimu kame yi, bibafukuti nneε lee minfu nwo. ⁴⁴ Le dibabla fie bibafuo mi ofu onu, di obe wo biomie koleε minkyeko ni aye bamu bawo nfū, minoomie koleε bikyeko ni nwo lete ninle ni Yaa nfū?

⁴⁵ “Bitanyu bile ami ninle otii wo nimalo ye lepoo nta ni Teemi. Kafoo Mose wo kufiofa

bietika ni anu nimalo ye leƆoo! ⁴⁶ Nse nwaako biefũ Mose bienu yi, nse bitabafũ mi kafoo minnu, diekye ami suoto di Mose nwu nkpo lekpana asaa eekyeko. ⁴⁷ Kafoo di obe wo minanfũ lesaa le ekpana ni binu nii, le dibabla fie bibafũ selaa se kobue ni minnu?”

6

Yesu Lata Batii Nkpe Nɔɔ Alesaa Baale Baamis.

¹ Di nni nkpo sema, Yesu lataale lekpo le manlee ni Galilea lekpo, obe owo kafoo manlee ni Tiberia lekpo aasifi kakyε nyooƆa. ² Batii kpinwu latikanko nwo diekye baanya sekpe kple se aabla aayooƆa ni mba niatoofie ni sifie. ³ Ninfε di Yesu ku basaateketete nɔɔ layie baasifi kobokote osi baalaasie kaaso ninfε. ⁴ Di obe nwu nkpo kame Yuda batii Okpi Diisi Ofe Dii ole bee ntɔɔtetεε.

⁵ Obe wo di Yesu latakatesa anu aanyu aanya ale batii dikudi kpinwu kɔwa ni okye nɔɔ yi, ni aakaale Filipino ale, “Ɔfe bubawe alesaa munya munta batii ba mmle nwu nkpo manle?” ⁶ Yesu labue ɔlaa wo mmle ale ɔɔɔ ansɔ Filipino annyu, diekye nnwɔɔ omu aye lesaa le ɔwa ni ɔbabla.

⁷ Ninfε di Filipino ladiki kanya ale, “Nse buɔɔɔ bia batii alafa anyɔ dii kɔkpento buɔɔɔya alesaa buɔta batii ba mmle nkpo bamuu yi, dilabawo ma bale bia kafui kafui!”

⁸ Ninfε di Yesu tikankote nɔɔ onwii kaame lema ninle ni Andrea, Simon Petro obilema, labue ale, ⁹ “Okosopo onwii nsi ninfũ akle ni abloblo kudi anɔɔ ku kɔkpaku konyɔ. Kafoo be

di nle mmle mabla banankpantii ba mmle nwu nkpo?"

¹⁰ Ninfe di Yesu latoko basaateketete nso ale, "Bitu batii nwu nkpo bamuu basie kaasoo." Sefa koonle leketee kpinwu lawe ninfa. Batii nwu nkpo bamuu lasie kaasoo. Basuoto ba niawe ni kaame lema labla fe batii nkpe nso. ¹¹ Ninfe di Yesu lafu bloblo nwu nkpo, ni aape Yaa sefa, ni aase aata batii nwu nkpo bamuu niasie ni ninfa ne. Nkpo okle kafoo aase kokpaku nwu nkpo aata bamuu lema, obiala lawe aawee fe mmle okle oomie nii.

¹² Di obe wo bamuu lema batoole beemie nii, Yesu latoko basaateketete nso ale, "Bisiisa kokyeekokyee nwu nkpo niebu ni ale kukanwii dilalalaa." ¹³ Nkpo oso baasiisa bloblo akudi anoo nwu nkpo baatii nwu lale ni kokyeekokyee nso kuayii lefosi nkyikye nnyo po.

¹⁴ Obe wo baatii nwu nkpo lanyu okpe wo mmle niabla ni okpe di Yesu labla nii, baabu ale, "Nwaako, nnya nwo mmle ninle Yaa Olaa buetete wo nikowa ni kayi ka mmle ne." ¹⁵ Yesu latofo ale boomie ale bamufu nwo osie kanya bayo nwo base oka. Nkpo oso aadie ma kaame lete nso aakple aasifi abokote suoto.

Yesu Laky Di Ntu Osi.

¹⁶ Obe wo kootofo lawo nii, Yesu basaateketete nso lasoo baakye lekpo kotoko. ¹⁷ Ninfe baayie baabuo di oklo kame, baataale baakple baakyo anu Kapernaum ne. Kale laloo, kafoo Yesu diikple awa okye lema. ¹⁸ Di obe nwu nkpo kame, kofeefo siene kunwii lakyako ofe, lekpo ntu nwu nkpo kafoo lakyako okpe osie kanya.

19 Di obe nwu kame, basaateketete nwu ntowa oklo di ntu nwu osi beekye fe ako atie diokye ni di leenafa kame, ni baanya Yesu nkye di ntu osi owa oklo nwu nfu ne. Nni nkpo oso, ofo lasifi ma! 20 Ninfe di Yesu latoko ma ale, "Bitanyeke! Ami dile." 21 Ni di otu lema late ne. Ni baakpaa Yesu baakpee di oklo kame ne. Nfanwu, ni baadu nfu boofe ni ne.

Batii Nwu Nkpo Lawolaa Yesu.

22 Obe wo kaale lase nii, batii ba niasie ni di lekpo nwu kakye nyofa, baatofo ale oklo onwii niayila di lekpo nwu kotoko. Baatofo kafoo ale Yesu ditasie di nwu nkpo kaame aakyakaa ku basaateketete noo fie baayefe osuku. Diekye basaateketete noo lete niabuo nwu kaame baasifi. 23 Di obe nwu kame, seklo bamba se niakye ni Tiberia okpoo lawa siabayila di lekpo kotoko, di leba le nietete ni nfu baatii nwu nkpo lale ni bloblo di obe wo di Saate lape ni Yaa sefa. 24 Nkpo oso, obe wo di batii nwu nkpo lanyaa ale Yesu ee basaateketete noo nnaa ni ninfa oso, baabuo di seklo nwu nkpo kame baasifi Kapernaum baalaatoowolaa nwo.

Yesu Ninle Alesaa Ya Ninta Ni Nkpa.

25 Obe wo baatii nwu lanyaa ni Yesu di lekpo nwu nkpo kakye nyofa, ni baakaale nwo ale, "Saatuote, omembe fewa nfu?"

26 Ninfe di Yesu ladiki kanya ale, "Nwaako kotoko ye nle, bloblo wo lata ye biale biamie ni oso biowolaa mi. Diele sekpe se niebla ni okpe bianya labla ni kaso bienu ni oso. 27 Bitankpe biata alesaa ya nimalalaa nii, kafoo bikpe bita

alesaa ya ninkpe eeta ni nkpa be ninnaa ni kaloo. Nnya ninle alesaa ya di Otii Obi nwu kamata ye ni ne. Diekye nnwɔɔ ninle otii wɔ di Yaa Ote lese lenɛɛ eediki ni ne.”

²⁸ Nioso batii nwu lakaale Yesu ale, “Ni be ninle lesaa le buabla ni diatuo ale buobla ni Yaa dibiesaa?”

²⁹ Ninfe di Yesu latoko ma ale, “Lesaa le di Yaa komie ale bibla ni ninle ale, biafũ otii wɔ eekyese ni minnu.”

³⁰ Ninfe baakple baakaale nwɔ ale, “Be ninle okpe wɔ niebla ni okpe fababla fantuo ale buafũ fo munnu ni? Nwu ninle omɛnle? ³¹ Waawa loo ane lale alesaa ya manlee ni mana di ofaafuu kame, fe mmle okle di Kokpana Klekle Kukũ lebuɛ ni ale, ‘Aata ma alesaa ya niekye ni Osi baale.’ ”

³² Ninfe di Yesu latoko ma ale, “Nwaako kotoko ye nle, diele Mose niata ye alesaa ya niekye ni osi biale. Kafɔ Teemi ninta ye alesaa amuamu ya niekye ni osi. ³³ Diekye alesaa ya di Yaa leta ni ninle otii wɔ niekye osi ewa ni, ɔota ni batii kaayi nkpa.”

³⁴ Nkpo oso baatoko nwɔ ale, “Saate, ta wo alesaa ya mmle nwu nkpo obe lele.”

³⁵ Ninfe di Yesu latoko ma ale, “Ami ninle alesaa nwu nkpo ninkpe ni nkpa ne. Otii lele niɛwa okye nii, diidii koka dilabaklee nwɔ. Otii lele kafɔo niefũ mi eenu, diidii otukonso dilabaklee nwɔ. ³⁶ Kotoko ye nle, bitɔonyee, kafɔo biloofũ mi binu. ³⁷ Otii lele di Teemi leyɔ eete kamawa okye nii. Olele kafɔo niɛwa okye nii namasĩ nwɔ diidii. ³⁸ Diekye diele okye lekye osi lewa nle kobabla ami omu dibiesaa. Kafɔo

owa lewa nle kobabla otii wo niekpee mi ni koto dibiesaa. ³⁹ Otii wo kafoo niekpee mi ni koto dibiesaa dile ale, batii ba bamuu eeyo eete e nii, kuonwii lema dilaayu, kafoo ale kasenkesa bamuu lema mansie nkpa di dii yentele nwu nkpo suoto. ⁴⁰ Diekye lesaa le di Teemi komie ni ninle ale batii ba bamuu ni enya ni Obi nwu, beefu kafoo beenu nii kawe nkpa be ninnaa ni kaloo. Ni masenkesa ma mansie nkpa di dii yentele nwu nkpo suoto.”

⁴¹ Nfa nfe di Yuda batii nwu lakye kaso baatoonwununu nwo di suoto ne, diekye aabue ale, “Ami ninle alesaa ya niakye osi lawa ni ne.”

⁴² Nkpo oso baakaale ale, “Diele Yesu wo mmle ninle Yosef obi nwu nkpo ne, see le? Buye nwo ote ku oya de! Le nfe diawa fie oobue ale nnwoo niekye osi ewa?”

⁴³ Ninfе di Yesu latoko ma ale, “Bidie okakate di kame lee. ⁴⁴ Otii kuonwii dilabafuo okye nii owa diediki Teemi wo niekpee mi ni koto nienanfi nwo ewako okye nii. Ale ami kasenkesa nwo ansie nkpa di dii yentele nwu nkpo suoto. ⁴⁵ Yaa o laa babuetete onwii lekpana ale, ‘Yaa omu nimatuo batii bamuu asaa.’ Nkpo oso, otii lele niekyoo Ote nwu nkpo atoko, eetekete asaa eekyeko okye noo, anwa okye nii. ⁴⁶ Nle mmle dilootuo ale otii biala ntounya Ote nwu nkpo. Kafoo otii wo niekye ni Yaa nfu ninle otii wo lete nintounya ni Ote nwu. ⁴⁷ Nwaako kotoko ye nle otii wo niefu eenu nii, nkpe nkpa be ninnaa ni kaloo. ⁴⁸ Ami ninle alesaa ya ninta ni nkpa ne. ⁴⁹ Waawa lee ane lale alesaa ya manlee ni

mana di ofaafuu kame, kafɔɔ baakpi. ⁵⁰ Kafɔɔ alesaa ya niekye osi ɛwa nii nle n-ya okle ale otii lele niele nya, ɔlobakpi. ⁵¹ Ami ninle alesaa ya ninkpe ni nkpa niakye osi aawa ni ne. Nse otii owo lele alesaa ya mmle, abasie nkpa ninnaa ni kaloo. Alesaa ya mmle ninle suoto nii sina ne. Nsɔ̄ kamayɔ nta ale kayi ka mmle batii kawɛ nkpa ne.”

⁵² Nle mmle oso Yuda batii nwu nkpo lakye kasɔ baatɔɔnanfi ɔlaa osie kanya kaame lema ale, “Le di osuɔɔ wo mmle mayɔ suoto sina nɔɔ anta wo ale bule?”

⁵³ Ninfe di Yesu latɔko ma ale, “Nwaako kotoko ye nle, nse biele Otii Obi nwu suoto sina, binyi nwɔ ntɔ, ni bilabawe nkpa di kame lee. ⁵⁴ Otii lele niele suoto nii sina nwu, eenyi ntɔ nii nwu nkpo kafɔɔ, ni akpe nkpa be ninnaa ni kaloo, ni kamasenkesa nwɔ ansie nkpa di dii yentele nwu nkpo suoto. ⁵⁵ Diekye suoto nii sina nwu nkpo ninle alesaa nwu amuamu, ntɔ nii nwu kafɔɔ ninle dinyinsaa nimunimu. ⁵⁶ Otii lele niele mi suoto sina nwu eenyi mi ntɔ nwu kafɔɔ nsi mi kaame, ami kafɔɔ nsi nwɔ kaame. ⁵⁷ Fe mmle okle di Teemi wo ninkpe ni nkpa lekpee mi ni kotɔ, di nnwɔɔ kame nkpe ni nkpa oso yi, nkpo okle kafɔɔ di otii wo niele mi ni suoto sina kafɔɔ masie nkpa ta ami oso ne. ⁵⁸ Nya alesaa ya niakye osi aawa nii, aate fe nnyankpo okle di waawaa lee ane lale ni baakpi nii. Nkpo oso otii lele niele alesaa ya mmle masie nkpa ninnaa ni kaloo.” ⁵⁹ Asaa ya mmle di Yesu labue aatuo asaa di Yuda batii kasiisako di Kapernaum ne.

Yesu Labue Selaa Se Ninta Ni Nkpa Be Ninaa

Ni Kaloo.

⁶⁰ Obe wɔ di basaateketete nɔɔ kpinwu lanu ni selaa se mmle yi, baabue ale, "Asaatuo ya mmle nkpe osie! Owe nimafuo nya ofũ?"

⁶¹ Otii kuonwii ditatɔkɔ Yesu ɔlaa kuonwii kafɔɔ aatofo ale basaateketete nɔɔ latoonwununu di selaa se mmle suoto. Nioso aakaale ma ale, "Selaa se mmle kototofo ye di atokoɛ?"

⁶² Ni se diɛwa ale biɛɛnya Otii Obi nwu kokple ansifi osi di leba le aawe ni saa mɔ, ni le dibate ye? ⁶³ Lesaa le ninta ni nkpa ninle Yaa Ninwuna nɛ. Otii osie nwu diesi di lesalesaa kuninwii kame. Selaa se ntoobue leta ye ni ninwako Yaa Ninwuna nkpa. ⁶⁴ Kafɔɔ batii kpinwu kaame lee diefũ banu." Yesu labue selaa se mmle diekye kaasɔ kakyekɔ aatofo batii ba ninamafũ banu nii, ku otii wɔ nimadiki nwɔ anta nii. ⁶⁵ Ninfe aakple aabue ale, "Nle mmle oso latɔkɔ ye nle otii kuonwii dilabafuo ɔkye nii ɔwa diediki Ote nwu nkpo nietuo nwɔ osuku."

⁶⁶ Nle mmle oso Yesu basaateketete nɔɔ kpinwu lakple nkpaamaa, batasintuna ale bootikankɔ nwɔ.

⁶⁷ Nkpo oso, Yesu lamunikĩ aakaale batokyente nɔɔ lefosi banyɔ nwu nkpo kafɔɔ ale, "Aye kafɔɔ biomie bile bikple nkpaamaa ee, see le?"

⁶⁸ Ninfe di Simon Petro ladiki kanya ale, "Saate, owe nfũ nfe buofe? Afo ninkpe selaa se ninta ni nkpa be ninnaa ni kaaloo. ⁶⁹ Nunua, butoofũ bonu buɔnya kafɔɔ buɔtensũ bule afo ninle Otii Klekle wɔ niekye ni Yaa nfũ."

⁷⁰ Ninfe di Yesu latɔkɔ ma ale, "Ami niediki lefosi batii lee banyɔ, kafɔɔ onwii nle Abonsam kaame lee." ⁷¹ Yesu latoobue ɔlaa wɔ mmle di

Yuda suoto, nnwɔɔ niale Simon Iskariot obi nɛ. Diekye di lefosi batii banyɔ nwu nkpo kame, nnwɔɔ niadiki Yesu aata nɛ.

7

Yesu Lakye Yuda Batii Akpanta Kalɔ Osie Ayi Kalekɔ.

¹ Di nle mmle sɛmaa, Yesu lakye aakyi di Galilea kasɔ suoto. Atamie ale ɔkye ankyi di Yudea kasɔ suoto. Diekye, Yuda banɔɔfotii latoomie osuku ale boolo nwɔ. ² Di obe nwu nkpo kame, Yuda batii akpanta kalɔ osie ayi ole bee ntɔɔtɛtɛ. ³ Nkpo oso Yesu babilema latɔkɔ nwɔ ale, “Die ninfū faatɔkye Yudea kasɔ suoto ale basaateketete lefɔ kanya fɔ ɔsaabla. ⁴ Diekye otii kuonwii ninkookaa lesaa le ɔɔbla nii nse oomie ale batii batofɔ nwɔ nwaa. Di obe wɔ fɔɔbla ni aasaa ya mmle nwu nkpo okle yi, diki suoto fatuo kayi batii bamuu baatofɔ fɔ!” ⁵ Baatɔkɔ nwɔ selaa se mmle diekye babilema suɔtɔbi bamu ditafū nwɔ baanu.

⁶ Nfa nfe di Yesu latɔkɔ ma ale, “Obe nii diiwo. Kafɔɔ aye yi, obe lele nkaateko ye. ⁷ Diekye aye yi, kayi ka mmle batii dilabafuo ye okyidi. Kafɔɔ ami yi, beekyidi mi, diekye kodiki ntɔkɔ ma klekle nle ɔsaabla lema dieɛɛ. ⁸ Aye yi, bitɔkye Ayi nwu nkpo kalekɔ. Ami nɔɔwa nfa, diekye obe nii diiwo saa.” ⁹ Obe wɔ aatɔkɔ ma nkpo okle aaloo ni yi, nnwɔɔ omu aakple aasie di Galilea ninfa.

¹⁰ Obe wɔ di babilema suɔtɔbi ntoosifi ni ayi nwu nkpo kalekɔ beeloo ni yi, Yesu kafɔɔ lakye, atakye ale batii banyɔɔ kafɔɔ aakye di lewofa

kamε. ¹¹ Yuda batii banɔɔfotii latowolaa nwo di ayi nwu nkpo kalekɔ baatɔkaale ale, “Ɔfe di osuɔɔ nwu nkpo nkpe?”

¹² Batii latoobue sɛwɛɛwɛɛ baakakate kpinwu di Yesu suoto. Batii bawo labue ale, “Otii biene ale.”

Batii bamba kafɔ labue ale, “Oowo! Otuu kpilɛ ale. Ɔɔkyɔnkyɔ batii anfenko di osuku kpilɛ suoto.” ¹³ Kafɔ otii kuonwii ditafuo odiki obue osie kanya diekye baatɔyɛkɛ Yuda batii banɔɔfotii.

Yesu Lakye Aalaatuo Asaa Di Yuda Batii Olekatakɔ.

¹⁴ Obe wo nfe di ayi nwu nkpo ole nfe kodu ni nteɛ yi, Yesu lakye Yuda batii Olekatakɔ aalaatuo batii asaa. ¹⁵ Asaa nɔɔ otuo labla Yuda batii banɔɔfotii ɔkpe, ni baakaale ale, “Le diebla fie di osuɔɔ wo mmle n-ye lesaa nkpo okle, di obe wo anankye ni asaa kateketekɔ kukanwii?”

¹⁶ Ninfe di Yesu ladiki kanya aatɔkɔ ma ale, “Asaa ya kotuo ni diele ami omu asaa otuo ale. Kafɔ Yaa wo niekpee mi ni kɔɔ ale ale. ¹⁷ Otuu lele nikomie ale abla Yaa dibiesaa matofɔ nse asaa ya kotuo ni Yaa nfu eekye ee ami omu osie nii kamε leyɔ kɔkakatɛ. ¹⁸ Otuu lele ninkakatɛ di nnwɔɔ omu osie nɔɔ kamε yi, ni oomie ale ayɔ katansa ata nnwɔɔ omu nɔɔ suoto. Kafɔ otii wo nikomie ale atansa ni otii wo niekpee nwo ni kɔɔ yi, ambla asaa di osuku kanya, ni aanlaa kafɔ. ¹⁹ Diele Mose niayɔ kufiofa nwu nkpo aata ye, sɛɛ le? Kafɔ otii kuonwii kaamε lee diloolɛ kufiofa nwu nkpo. Ni be oso biomie bile biloe?”

20 Ninfe di batii nwu nkpo latoko Yesu ale, "Ninwuna kpile ninsi fo kaame! Owe nikomie ale alo fo?"

21 Ninfe di Yesu ladiki kanya ale, "Lesaa ninwii le lebla, ninfe diebla bamuu lee yaaa ne. 22 Mose lakpee ye kufiofa ale biabudi babi lee asokosoko. Kafoo diele nnwoo niakye kasoo, waawa lee ane niakye kasoo bia saa obe kame. Kafoo mimbudi babi lee asokosoko di Lenyesteyi suoto. 23 Ni nse mimbudi babi lee asokosoko di Lenyesteyi suoto ale bilaataale Mose kufiofa nwu nkpo, ni be oso bionyakee oblo ta leyooa ni otii ofie dieyoo nwo ni di Lenyesteyi suoto? 24 Nse biokanko yi, bitannyu otii di anu biaka leka! Kafoo yi, bika di mmle di otaa nwu nte ni."

Batii Lakaale Baanu Nse Yesu Ninle Kristo Nwu.

25 Ninfe di batii ba bawo niakye ni Yerusalem okpoo, baakaale ale, "Diele osuoto wo mmle di Yuda banooftii komie ale balo ni ne? 26 Binyu! Nnwoo nin-ye di lekpaaka ookakate ne! Otii kuonwii kafoo dilooakaale nwo otaa kuonwii! See kame ntookpa ma klekle nfe ale nnwoo ninle Kristo nwu nkpo? 27 Kafoo nse Kristo nwu nkpo lewa yi, otii kuonwii dilabatofo nfu eekye nii. Kafoo otii wo mmle nnwoo bamuu loo buye nfu eekye nii."

28 Di obe wo di Yesu latootuo ni asaa di Olekatakoo nwu nkpo ninfa yi, aatakatesa selo katoo aakaale ale, "Obue biobue bile biye mi, biye nfu kafoo lekye ni? Diele ami omu osie nii kame lewa! Otii wo niekpee mi ni koto ninlaa.

Aye bieye nwo. ²⁹ Kafoo ami n-ye nwo. Diekye okye noo lekye, nnwoo kafoo niekpee mi koto.”

³⁰ Nle mmle oso, baamie ale boomufu nwo. Kafoo otii kuonwii ditafuo nwo okpanko, diekye obe noo diiwo. ³¹ Kafoo kaame lema batii bawo kpinwu lafu nwo baanu baatookaale ale, “Ni nse Kristo nwu nkpo lewa, ababla sekpe se niebla okpe silenke ni nse di otii wo mmle lebla ni?”

Farisi Batii Lakpee Basaa Nyunte Ale Blaamufu Yesu.

³² Di obe wo di Farisi batii lanu ni selaa se baatii kobue ni di Yesu suoto oso yi, baabla onwii ku olebatate banoofo, baakpee asaa banyunte ale bakye blaamufu Yesu.

³³ Ninfe di Yesu latoko ma ale, “Makple nsie di okye lee di obe kakui kame, nni kamaa se ntoosifi otii wo niekpee mi ni koto nfu. ³⁴ Bibawolaa mi kafoo bilobanyee, diekye leba le kamasie nii, bilobafuo nfa owa.”

³⁵ Ninfe di Yuda batii nwu lakaale bawo ale, “Ofe di otii wo mmle kofe oso fie, bulobanyoo? See abasifi Hela batii sekpoo di nfu baatii loo nsi ni anaatuo Hela batii asaa? ³⁶ Be alaka di obe wo eebue ale ‘Bibawolaa mi, kafoo bilobanyee. Nfu kafoo kamasie nii, bilabafuo nfa owa?’ ”

Yesu Lakakate Di Ninwuna Klekle Suoto.

³⁷ Dii yentele le di ayi nwu nkpo boole kame, dile dii finle, Yesu lataka aayila aatakatesa selo kato aabue ale, “Otii lele di otukonso nkle, awa okye nii, abanyi ntu. ³⁸ Fe mmle okle di Kokpana Klekle lebue ni di otii wo niefu mi eenu ni suoto ale, ‘Ntu be nikotaa ninansoo ni diidii, ninta ale otii nsie ni nkpa, ntu nwu nkpo kamatoobie

nintoofe di otu nɔɔ kame.’ ” ³⁹ Yesu labue ɔlaa wɔ mmle di Ninwuna le baatii ba niefũ nɔɔ beenu ni kamafũ ni suoto. Diekye di obe nwu nkpo kame yi, bayiyo Ninwuna nwu nkpo bata. Diekye Yesu diibuo di Seka ole nɔɔ nwu nkpo lekpa kame.

Batii Dikudi Nwu Nkpo Lase Ta Yesu Oso.

⁴⁰ Obe wɔ baatii nwu nkpo lanu ni Yesu selaa se mmle yi, bawo kaame lema labue ale, “Nwaako Yaa ɔlaa Buetete nwu nkpo ninle otii wɔ mmle.”

⁴¹ Babamba kafɔɔ labue ale, “Nnwɔɔ ninle Kristo nwu ne.”

Bawo kafɔɔ labue ale, “Kristo nwu nkpo diele Galilea abadie ankye! ⁴² Diekye Kɔkpana Klekle Kukũ lebue ale, Kristo nwu nkpo ɔka Dawid leyo kame abakye. Babalofɔ nɔɔ di Betlehem, di okpoo wɔ di Dawid lasie nii.” ⁴³ Ta Yesu oso, batii nwu nkpo lase. ⁴⁴ Bawo lamie ale boomufũ nɔɔ, kafɔɔ otii kuonwii ditafuo nɔɔ ɔkpanko.

Yuda Batii Banɔɔfotii Ditafũ Yesu Baanu.

⁴⁵ Obe wɔ di Basaanyunte nwu nkpo lakple baasifi ni Farisi batii ku olebatate banɔɔfo nwu nkpo nfũ yi, baakaale ma ale, “Obe oso minam-mufũ nɔɔ biwako?”

⁴⁶ Ninfɛ di basaanyunte nwu nkpo latɔko ma ale, “Diidii buunu otii kuonwii akakate nwaa fe mmle okle di osuɔɔ wɔ mmle lekakate nii!”

⁴⁷ Ninfɛ di Farisi batii nwu nkpo lakaale ma ale, “Aye kafɔɔ osuɔɔ nwu nkpo lekɔnkyɔ ye? ⁴⁸ Bitoyinu ɔnɔɔfotii owo ee Farisi otii owo ntoyifũ nɔɔ eenu? ⁴⁹ Batii dikudi le mmle nimuu dieye Mose kufiofa nwu nkpo. Nkpo oso lekpaani ntikanko ma!”

⁵⁰ Farisi otii wɔ bɔɔlɛ ni Nikodemo nintoyikye ni Yesu nfũ lasiɛ ma kaame, ninfe aakaale ma ale,
⁵¹ “Kufiofa loo leta osuku ale baalo otii lepɔɔ di obe wɔ manayilɛ nwo banu nwo ni kanya kame ɔlaa di lesaa le ebla ni suoto?”

⁵² Ninfe ninnwɔɔ kafɔɔ baakaale nwo ale, “Afo kafɔɔ Galilea feekye eɛ, sɛɛ lɛ? Buo diakũ kame fanyu! Fabanya fale Yaa ɔlaa buetete kuonwii dilabakye Galilea awa diidii.” ⁵³ (Ninfe di obiala lema lasifi ayo lema nɛ.)

8

Baamufũ ɔsanko Onwii Niadie Ni ɔsa Kamaa Baawako Yesu Nfũ.

¹ Kafɔɔ Yesu nnwɔɔ aasifi kobokote ko manlɛɛ ni Nnɔnyi Awoso Kobokote osi. ² Obe wɔ kaale lasɛ ni ku kuyitatũ yi, Yesu lakple aasifi Yuda batii Olekatakɔ. Ninfe di batii nwu nkpo bamuu lawa ɔkyɛ nɔɔ babasiɛ baamana nwo baakyi, ni aasiɛ kaasɔ aakyako ma asaa otuo nɛ. ³ Ninfe di kufiofa asaa batuote ku Farisi batii lakpaa ɔsanko onwii baamufũ oodie ni ɔsa kamaa nneɛ nneɛ baawako babase nwo di bamuu lema anu nɛ. ⁴ Ninfe baatɔkɔ Yesu ale, “Saatuote, buomufũ ɔsanko wɔ mmle nneɛ nneɛ osuɔtɔ bamba kotenko nwo. ⁵ Di kufiofa loo kanya yi, Mose leta wo osuku ale dikpe ni buasafɔ ɔsanko wɔ mmle okle afuɔ munlo. Ni lɛ di afo foobue?” ⁶ Baakaale Yesu ɔlaa wɔ mmle ale bɔɔyɔ manwolaa nwo kaanya mmle okle baalo nwo ni lepɔɔ. Kafɔɔ ninfe aawa kasɔ aayɔ lenɛɛ nɔɔ aakyako asaa ɔkpana kaasɔ nɛ.

⁷ Obe wɔ baayila ninfa bookaale nwo ni akaale yi, ninfe aatakatesa suoto aatokɔ ma ale, “Olele kaame lee ninayibla okpile diidii yi, aaka nwo difuo oyu osafɔ.” ⁸ Ninfe aakple aawa kasɔ aayo lenɛɛ nɔɔ aakyako asaa okpana kaasɔ nɛ.

⁹ Obe wɔ baanɔɔfo nwu nkpo lanu ni ɔlaa nwu yi, ni baakyako osifi onwii onwii fe mmle okle balekatu batika ni nɛ. Ni diabu Yesu ku osanko nwu lete ninfa nɛ.

¹⁰ Ninfe di Yesu latakatesa suoto, ni aakaale osanko nwu ale, “Osanko, fe baatii nwu nkpo ntoofe? Kuonwii lema diebu aalo fo ni lepɔɔ?”

¹¹ Ninfe di osanko nwu nkpo latokɔ nwo ale, “Ɔnɔɔfo, oowo lo!”

Nkpo oso, Yesu latokɔ nwo ale, “Nii ni ami kafɔɔ, noolo fo lepɔɔ. Nioso, tookyɛ. Kafɔɔ, taasinkple faalaasie faatɔɔbla sikipile.”

Yesu Ninle Kayi Ka Mmle Lekpa.

¹² Di nni nkpo semaa, Yesu lakple aabue aatokɔ batii nwu nkpo ale, “Ami ninle kayi ka mmle lekpa. Otii lele nietikanko mi, abawe lekpa le ninta ni nkpa. Diidii kafɔɔ ɔlobakye di ditunu kame.”

¹³ Ninfe di Farisi batii nwu nkpo latokɔ nwo ale, “Afo omu lefo nikodiki suoto kanya. Nkpo oso suoto lefo kanya odiki nwu nkpo diedie lesalesaa.”

¹⁴ Ninfe di Yesu latokɔ ma ale, “Kunte kodiki suoto kanya yi, suoto nii kanya nwu kodiki ni nte nkpo. Diekye n-ye nfu lekye nii, n-ye nfu kafɔɔ kofe nii. Aye bieye nfu lekye nii, ee nfu kofe nii.

¹⁵ Aye yi, sitiinyu kanya minkanko. Kafɔɔ ami yi, ninkanko otii kuonwii. ¹⁶ Nse bia nle kokanko

yi, lekanko nii ntabakye di osuku kanya. Diekye diele lete nii ninkanko. Teemi wɔ niekpee mi ni kɔtɔ, munko nwɔ ninkanko nɛ. ¹⁷ Bɛɛkpana di kufiofa lee kame aɛ, nse batii banyɔ kanya nkaate di ɔlaa owo suoto yi, ni ɔlaa nwu nte nkpo. ¹⁸ Ami yi, ndiki suoto nii kanya. Teemi wɔ kafɔɔ niekpee mi ni kɔtɔ kafɔɔ ndiki mi suoto kanya.”

¹⁹ Ninfe baakaale Yesu aɛ, “Ɔfe di Teefɔ nwu nkpo nkpe?”

Ni aatɔkɔ ma aɛ, “Bieye mi. Bieye Teemi kafɔɔ. Diekye nse oye biye mi yi, nse bitabatofɔ Teemi kafɔɔ.” ²⁰ Yesu labue sɛlaa se mmle di obe wɔ ootuo ni asaa di Yaa Olekatakɔ di lɛba le niɛtɛtɛtɛ ni nfu manta ni koto. Kafɔɔ otii kuonwii ditafuo nwɔ omufu diekye obe nɔɔ diiwo.

Yesu Latɔkɔ Yuda Banɔɔfotii Aɛ Bilabafuo Lɛba Le Kofe Ni Ɔkyɛ.

²¹ Yesu lakple aatɔkɔ ma aɛ, “Ami yi, kamasifi. Bibawolaa mi, kafɔɔ bibakpi di sikple lee kame. Lɛba le kafɔɔ kofe nii bilabafuo nfa ɔwa.”

²² Nioso Yuda batii banɔɔfotii lakaale aɛ, “Suoto oofe olo oso oobue aɛ, ‘Bilabafuo lɛba le kofe ni ɔwa’?”

²³ Ninfe di Yesu latɔkɔ ma aɛ, “Aye yi, kasɔ ka mmle suoto biekye. Kafɔɔ ami yi, osi lekye lɛwa. Aye yi, kayi ka mmle batii bile. Kafɔɔ ami yi, diele kayi ka mmle otii nle. ²⁴ Nioso latɔkɔ ye nle, bibakpi di sikpile lee kame nɛ. Nse biefu binu bile nle otii wɔ nnle nii, nwaako bibakpi di sikpile lee kame.”

²⁵ Ninfe baakaale nwɔ aɛ, “Owe fale?”

Ninfe di Yesu latoko ma ale, "Lesaa le letoko ye kaasoo kakyeko nle nle ni yi, nni nwu kotoko ye nle nle ne. ²⁶ Nkpe selaa kpinwu kabue di suoto lee nlo ye ni lepoo ta nkpa lee oso fie. Kafoo otii wo niekpee mi ni kote ninlaa. Nioso olaa wo lenu lekye ko ni okye nso yi, nwu lete lekya koyie nta kayi batii ne."

²⁷ Batanu kasoo ale Yesu yi, Ote suoto aatookakate aatoota ma. ²⁸ Nioso aatoko ma ale, "Obe wo bibatakatesa ni Otii Obi nwu katoo yi, obe nwu nkpo bibatofu bile ami ninle otii wo lebuue nle nnle ni ne. Nimbla lesalesaa kafoo di ami omu osie nii kame. Lesaa le kafoo di Teemi lekpeemi ale mbue nii, nni nimbue ne. ²⁹ Otii wo niekpee mi ni koto kafoo nsikoe. Aadie mi lete, diekye obe lele mbla lesaa le nimbuo nwo ni anu." ³⁰ Obe wo di Yesu labue ni selaa se mmle okle oso yi, batii kpinwu lafu nwo baanu.

Yesu Ladiki Aatuo Batii Ba Ninle Ni Abraham Babi.

³¹ Nkpo oso Yesu latoko Yuda batii ba niafu nwo baanu ni ale, "Nse biemufu asaa otuo nii bieklee, ni nwaako basaateketete nii bile. ³² Ni bibatofu nwaako olaa nwu, ni olaa nwu nkpo mata ye minwe kayaa."

³³ Ninfe baatii nwu latoko Yesu ale, "Abraham banantii bule, diidii kafoo buukple otii kuonwii olanle. Ni be oso foobue fale bubawe kayaa?"

³⁴ Ninfe di Yesu latoko ma ale, "Nwaako kotoko ye nle, otii lele nikobla okpile yi, ale olanle eta okpile. ³⁵ Olanle ninle saate nso atesaa. Kafoo obi ninle ote atesaa obe lele. ³⁶ Nkpo oso nse Yaa Obi nwu letafo kayaa yi, ni feewe kayaa kamu

kamu. ³⁷ N-ye nle Abraham banantii bile. Kafɔɔ biomie bile bilo mi, diekye biloofũ asaa otuo nii ya kotuo ye ni binu. ³⁸ Lesaa le di Teemi letuo mi ni yi, nni suoto kɔkakatɛ nɛ. Aye kafɔɔ lesaa le di teeye letɔkɔ ye ni yi, nni biɔbla nɛ.”

³⁹ Ninfe baatɔkɔ nwo ale, “Abraham ninle wo kote.”

Ninfe di Yesu latɔkɔ ma ale, “Nse nwaako Abraham babi bile yi, bitababla asaa fe mmle okle aabla nii. ⁴⁰ Kafɔɔ ami wo nikɔtɔkɔ ye ni nwaako ɔlaa nwu lenu lekyeko ni Yaa nfũ yi, ami biomie bile bilo nɛ. Abraham ditabla nle mmle okle. ⁴¹ Asaa ya di teeye omu labla nii, nnya biɔbla nɛ.”

Ninfe baatɔkɔ Yesu ale, “Buole basɔnɔbi. Kote kunwii ninkpe wo, nkũ ninle Yaa nɛ.”

⁴² Ninfe di Yesu latɔkɔ ma ale, “Nse nwaako Yaa ninle ye Kote yi, nse bitababɔmbɔ mi, diekye Yaa nfũ lekye lewa. Ninwa ku ami omu osie, nnwɔɔ niekyesee mi. ⁴³ Be oso minoonu lesaa le kobue ni kasɔ? Diekye ɔlaa nii kototofo ye di atoko. ⁴⁴ Diekye teeye ninle Abonsam, nioso biomie bile bitikanko teeye dibiesaa nɛ. Diayɔ ni bia kaasɔ kakyekɔ, batii lote ale. Diidii kafɔɔ ayitikanko onukwale, diekye onukwale diesi nwo kaame. Nse eɛlaa kafɔɔ nkpa nɔɔ letembi oodiki kayi antuo, diekye laate ale. Nnwɔɔ kafɔɔ ninle balaate bamuu kote nɛ. ⁴⁵ Ta ami kobue ni onukwale oso, nkpo oso minoofũ mi binu nɛ. ⁴⁶ Owe lee nkafuo mi okpile leɔɔ olo? Ni nse kobue onukwale mɔ, be oso minoofũ mi binu? ⁴⁷ Otii wo niekye ni Yaa nfũ yi, ankyɔɔ Yaa ɔlaa

atoko. Kafɔɔ, aye minankye ni Yaa nɔ̃ oso yi, minkyɔɔ nwo ɔlaa atoko.”

Yesu Ladiki Suoto Kanya Aata Yuda Batii.

⁴⁸ Ninɛ di Yuda batii nwu lakaale Yesu ale, “Nse buobue bule Samaria otii fale, mmia kafɔɔ ninwuna kpile nsi ɔ kaame, diele nwaako ɔlaa kule?”

⁴⁹ Ninɛ di Yesu latokɔ ma ale, “Ninwuna kpile diesi mi kaame. Ami kɔyɔ dibu nta Teemi, kafɔɔ aye biɔlalaasa mi leyooto. ⁵⁰ Noomie dibu nta suoto. Kafɔɔ otii onwii nkpe oomie ni antɛɛ nii, nnwɔɔ kafɔɔ ninkanko di osuku kanya nɛ. ⁵¹ Nwaako kotokɔ ye, otii lele niekyɔɔ mi asaa otuo atoko dilabakpi diidii!”

⁵² Ninɛ di Yuda batii nwu nkpo latokɔ nwo ale, “Mia nɛ butootofo nwaako bule, ninwuna kpile ninsi ɔ nɛ. Diekye Abraham lakpi, Yaa kanya badikite kafɔɔ lakpi, kafɔɔ foobue fale, otii lele niekyɔɔ ɔ asaa otuo atoko dilabakpi diidii! ⁵³ Teewo Abraham lakpi, ni obue foobue fale feɛtaka kato falenke nwo? Yaa kanya badikite kafɔɔ lakpi. Ni ɔmentii okle foonyu fale fale?”

⁵⁴ Ninɛ di Yesu ladiki kanya ale, “Nse nle kotansa suoto yi, suoto nii ɔtansa nwu nkpo dilabadie lesalesaa. Teemi ninle otii wo nikotansɛɛ nii, otii wo biobue bile nnwɔɔ ninle ye ni Yaa. ⁵⁵ Mmia kafɔɔ bieye nwo. Kafɔɔ ami n-ye nwo. Nse lebue nle ninye nwo yi, ni ntookple laate fele aye. N-ye nwo, kɔkyɔɔ nwo kafɔɔ ɔlaa atoko. ⁵⁶ Teeye Abraham lany suoto leyɔɔ ale abanya ɔwabee nii. Aanya nwu kafɔɔ, suoto layɔɔ nwo.”

⁵⁷ Ninfe di Yuda batii latoko Yesu ale, “Fayifū aleε afosi anoo, ni obue foobue fale fatoonya Abraham ne?”

⁵⁸ Nfa nfe di Yesu latoko ma ale, “Nwaako kotoko ye nle, fie babalofa ni Abraham, ami nfe nkpe.”

⁵⁹ Obe wo aatoko ma ni olaa nwu nkpo, ninfe baatii nwu nkpo layo afuo ale boosafu nwo ne. Kafoo Yesu lawofasa suoto, ni aadie di Yaa Olekatakoo nwu kame ninfa aasifi ne.

9

Yesu Latikiti Numbiete Anu.

¹ Obe onwii kame di Yesu lakye aatoofe nii, aakyakako osuoto onwii niabie ni anu, diayo ni bia kalofoko nwo. ² Ninfe di basaateketete nwo lakaale nwo ale, “Saatuote, owe niabla okpile oso beelofa osuoto wo mmle numbiete? Nnwoo omu nwo okpile kule ee, see balofote nwo niabla okpile?”

³ Ninfe di Yesu ladiki kanya ale, “Osuoto wo mmle anu ya niebie nwo ni yi, diele nnwoo niabla okpile ee balofote nwo niabla ni okpile oso. Kafoo eebie anu ale baadiki Yaa osie mantuo batii diefe ni di suoto nwo. ⁴ Di obe wo kaale diiloo nii, dikpe nii, buobla otii wo niekpee mi ni koto okpe. Diekye kale kowa obaloo di otii kuonwii dilabasinuo ni okpe obla. ⁵ Di obe wo lenya nkpe ni kaayi ka mmle, ami ninle kayi ka mmle lekpa.”

⁶ Obe wo di Yesu labue nkpo aaloo nii, ni aatufa sita aakpete kaasoo aanwoto kote, ni aayo kote nwu nkpo aafia di osuoto nwu anu ne. ⁷ Ni

aatoko nwo ale, "Tokye falaafoto anu di lepanta le boole ni Siloa kame." Siloa lesodiki ninle ale beekpee nwo. Nkpo oso osuto wo mmle lasifi aalaafoto anu. Aape aakple aawa nii, nfe onya.

⁸ Ninfe di basiewo noo ku mba ninyoo ansie antookaale ni asaa, latookaale bawo ale, "Diele osuto wo mmle ninsie antookaale ni asaa ne, see le?"

⁹ Bawo labue ale nnwoo dile. Bawo kafoo labue ale, "Oowo, diele nnwoo dile. Oti niedie nwo."

Nkpo oso, osuto nwu nkpo omu labue ale, "Ami dile!"

¹⁰ Ninfe baakaale nwo ale, "Le diewa fie nfe foonya?"

¹¹ Ninfe aatoko ma ale, "Osuto wo boole ni Yesu nianwoto kote aafia mi di anu, ni aatoko mi ale, ntokye Siloa ninaafoto anu, ninfe lasifi ne. Lalaalo ni anu ofoto, ni lakyako onya ne."

¹² Ni baakaale nwo ale, "Ofi di osuto nwu nkpo nkpe?"

Ni aatoko ma ale, "Ninye."

Farisi Batii Lakaale Numbiete Nwu Ale Le Diebla Fie Nfe Onya.

¹³ Ninfe baatii nwu lakpaa osuto nwu nkpo di anu labie ni baakyenko Farisi batii nfu ne. ¹⁴ Dii le di Yesu lanwoto kote aafia ni di osuto nwu anu aatikiti ni yi, Lenyete yi diale.

¹⁵ Nkpo oso Farisi batii kafoo baakaale osuto nwu mmle diewa fie nfe onya nii. Ninfe aatoko ma ale, "Kote di osuto nwu lanwoto aafia mi di anu ni lalaafoto anu ne. Ni lakyako onya ne."

¹⁶ Ninfe di Farisi batii nwu bawo labue ale, "Oti wo niabla ni lesaa le mmle yi, diele Yaa nfu eekye. Diekye aabla di Lenyete yi kufiofa suoto."

Ninfɛ di bawo kafɔɔ labue ale, “Kafɔɔ lɛ di kpilɛ blate kafuo sɛkpe se niebla ni ɔkpe ɔbla otuo?” Ninfɛ kaase labuo di batii nwu nkpo ntɛɛ.

¹⁷ Nioso Farisi batii nwu lakple baakaale osuɔtɔ nwu nkpo ale, “Foobue fale nnwɔɔ nietikiti fɔ ni anu, ni lɛ foobue di suoto nɔɔ?”

Ninfɛ aatokɔ ma ale, “Yaa ɔlaa buetete ale.”

¹⁸ Bia nle Yuda batii nwu ditafuo ofũ onu ale osuɔtɔ nwu nkpo numbietɛ aale fiɛ atookple ɔnya, dialaase di obe wɔ baalɛ balofote nɔɔ.

¹⁹ Ninfɛ baakaale ma ale, “Obi lee ninle nwɔ nɛ? Nnwɔɔ bilɛ bielofɔ ni numbietɛ nɛ? Ni lɛ diebla fiɛ nfe ɔnya?”

²⁰ Ninfɛ di balofote nɔɔ ladiki kanya ale, “Buye bulɛ obi loo ale, buolofɔ ni numbietɛ. ²¹ Kafɔɔ mmle diebla fiɛ nfe ɔnya nii, buoye. Otii wɔ kafɔɔ nietikiti nwɔ ni anu yi, buoye nwɔ. Nioso bikaale nwɔ, atoomuɔ aafuo ni suoto kanya odiki!” ²² Balofote nwu labue ɔlaa wɔ mmle diekye baatɔyɛke Yuda batii banɔɔfotii nwu nkpo. Diekye baabue baate ale otii lele niediki eebue ku kanya nɔɔ ale Yesu ninle Kristo nwu nkpo yi, babadiki nwɔ di Yuda batii kasiisako nwu. ²³ Nkpo oso di osuɔtɔ nwu nkpo balofote nɔɔ lababue ale, “Atoomuɔ aafuo ni suoto kanya odiki, bikaale nwɔ.”

²⁴ Banɔɔfotii nwu lakple baalɛ osuɔtɔ nwu nkpo baalofɔ ni numbietɛ lenyɔɔfa, baatokɔ nwɔ ale, “Ka di Yaa fale bababue nwaako! Awo buye bulɛ kpilɛ blate ninle otii wɔ nietikitifɔ ni anu!”

²⁵ Ninfɛ di osuɔtɔ nwu nkpo ladiki kanya ale, “Kpile blate ale woo, aale kpilɛ blate woo, ninye.

Lesaa le lete n-ye ni ninle aɛ, saa, anu labie mi, kafɔɔ nunua nfe konya!”

²⁶ Ni baakaale nwo aɛ, “Be aablafo? Le aabla fie aatikiti fo anu?”

²⁷ Ninfe di osuoto nwu ladiki kanya aɛ, “Ntooto ko ye kofokofoko kafɔɔ biloonu. Be oso biomie bile nkple ntoko ye? See ayee biomie bile bikple nwo basaateketete?”

²⁸ Ninfe di banɔɔfotii nwu nkpo lakpaani osuoto nwu nkpo baatoko nwo aɛ, “Afo ko nikale nwo saateketete. Awo yi, Mose basaateketete bule. ²⁹ Buye bule Yaa lakakate aata Mose. Kafɔɔ otii wo mmle, buoye bia nfu eekye nii!”

³⁰ Ninfe di osuoto nwu ladiki kanya aabue aɛ, “Omenlaa ninle nwo? Bieye nfu eekye nii, kafɔɔ nnwoɔ nietikiti mi anu ne! ³¹ Buye bule Yaa ninkyoo bakpileblate atoko. Kafɔɔ batii ba ninkyoo nwo ni o laa atoko mambla nwo ni dibiesaa, mma ankyoo atoko ne. ³² Dieyo ni kaayi ka mmle kaso kakyeko, diidii buunu bule otii kuonwii letikiti otii wo beelofa ni numbiete anu. ³³ Nse otii wo mmle diele Yaa nfu eekye, alaafuo lesalesaa le mmle obla.”

³⁴ Ninfe di banɔɔfotii nwu ladiki kanya aɛ, “Beelofa di sikipile kame feemu! Afo nikomie fale fatuo wo asaa ee, see le?” Ninfe baadiki nwo di Yuda batii kasiisako nwu ne.

Batii Bawo Konyu Aɛ Bɔɔnya Asaa Klekle.

³⁵ Yesu lanu aɛ baadiki osuoto nwu di kasiisako lema kame. Nioso, aanyoo nii, ni aakaale nwo aɛ, “Feefu Otii Obi nwu feenu?”

³⁶ Ninfe di osuoto nwu nkpo ladiki kanya ale, “Onofo, toko mi otiikle wo ale ni, mmle okle kafu nwo nnu ni.”

³⁷ Ninfe di Yesu latoko nwo ale, “Fatoonyoo kofokofoko. Nnwoo ninle otii wo nikokakatekoko ni ne.”

³⁸ Ni di osuoto nwu labue ale, “Saate, lefu lenu!” Ninfe aape akunyki di Yesu katu aatansa nwo ne.

³⁹ Ninfe di Yesu labue ale, “Lewa kayi ka mmle nle komakanko ale, batii ba di anu lebie ni kanya. Ale mba nikonya ni kafoo anu kabie ma.”

⁴⁰ Farisi batii ba niawe ni ninfa lanu oiaa wo di Yesu labue nii, ni baakaale nwo ale, “Beeye! Awo kafoo banumbiete bule?”

⁴¹ Ninfe di Yesu ladiki kanya ale, “Nse banumbiete bile yi, se bieki leroo. Kafoo di obe wo biobue bile bionya ni kamaa, bieki leroo.”

10

Bafoso Kpate Biene Nlola Bafoso Annyu.

¹ Yesu latoko ma ale, “Nwaako kotoko ye nle, otii lele ninanfe di kayoko abuo lefosoyo nwu nkpo kame, eeyie di koba nwu suoto eebuo yi, yu ku asaa lalaasate ale. ² Kafoo otii wo nimafe ni di kayoko nwu nkpo ambuo nii, nnwoo ninle bafoso nwu kpate omu ne. ³ Kayoko nyunte nsekete kayoko antoo. Bafoso nwu nkpo nnu nwo selo. Nse elee ma ku leyooto le eetika ma nii, ankpaa ma andieko. ⁴ Nse eekpaa ma eedieko yi, anleko ma katu, bafoso nwu nkpo ntikanko nwo, diekye baye nwo selo. ⁵ Blobatikanko otii bamba, babatso nwo, diekye baaye nwo selo.”

⁶ Yesu lape ma lekpa le mmle, kafɔɔ batanu lesaa le aatɔko ma ni kasɔ.

Yesu Ninle Bafoso Kpatɛ Biene Nwu.

⁷ Nkpo oso Yesu lakple aatɔko ma aɛ, “Nwaako kotokɔ ye nɛ, ami ninle kayoko nwu nkpo leta bafoso nwu nɛ. ⁸ Batii ba bamuu niale mi katũ baawa nii, bayu ku asaa balalaasatɛ baale. Nkpo oso bafoso nwu nkpo ditanu ma selɔ. ⁹ Ami ninle kayoko nwu nkpo. Otii lele niefɛ di suoto nii eebuɔ, abawɛ nkpa. Ababuo andie, anwɛ alesaa biene kalekɔ. ¹⁰ Yu nnwɔɔ ɔwa anwa amayu, anlo, anlalasa asaa. Kafɔɔ ami ɔwa lewa nɛ batii kawɛ nkpa, nkpa be niewo ni niimu kamɛ.

¹¹ “Ami ninle bafosokpatɛ biene nwu letuna nɛ kokpi ni baafoso nwu nkpo disi nɛ. ¹² Otii wɔ beefũ kooto kanya ɔɔkpa ni bafoso, baafoso nwu nkpo diele nnwɔɔ omu bale oso, nse ɛnya ɔkplele kɔwa yi, antoso andie bafoso nwu nkpo. Nkpo oso, ɔkplele nwu mmufũ bafoso nwu nkpo, ansamiisa ma ta aale ni bafoso nwu nkpo kpatɛ omu omu oso. ¹³ Otii wɔ mmle ntoso ansifi, diekye koto kanya beefũ nwɔ ɔɔbla ɔkpe nwu nkpo. Diekye bafoso nwu nkpo ɔlaa dietika nwɔ di otu.

¹⁴⁻¹⁵ “Ami ninle bafosokpatɛ biene nwu. Fɛ mmle okle di Teete n-ye mi, di ami kafɔɔ n-ye nwɔ nii, nkpo okle kafɔɔ n-ye bafoso nii, mma kafɔɔ baye mi nɛ. Ni letuna nɛ kokpi diisi lɛma nɛ. ¹⁶ Bafoso bamba nkpe bale mi ni bale manansi ni di bafoso kɔba ko mmle kamɛ. Dikpe ni lekpa ma lewako bɛɛbanu mi selɔ, bamuu lɛma beekple bafoso banwii, beesie di bafosokpatɛ onwii kalɔ.

17 “Teete mbombo mi, diekye letuna nle koyo nkpa nii nta, sɛmaa, ninkple nfũ mi. 18 Diele otii kuonwii niefũ mi nkpa ninnɛɛ, kafɔɔ ami omu nietuna nle koyo nta. Nwaako, nkpe osuku n-yɔ nkpa nii nta, nkpe osuku kafɔɔ nkple nfũ mi. Nle mmle di Teemi lekpee mi ale mbla nɛ.”

19 Yesu selaa se mmle aabue ni oso, kase lakple kaabuo di Yuda batii ntɛɛ. 20 Batii kpinwu kaame lɛma latoobue ale, “Ninwuna kpile ninsi nwo kaame. Oobuo affi kafɔɔ! Be oso nfe buakple munyila muntɔkyɔɔ nwo atoko?”

21 Kafɔɔ batii bamba latoobue ale, “Otii wo di ninwuna kpile nsi nii, dilaafuo okakate fe mmle! Le nfe di ninwuna kpile mafuo ota ale numbiɛɛ nnya?”

Yuda Batii Lasĩ Yesu Ofũ Onu.

22 Yuda batii latoole dii lɛma le manlɛɛ ni Olekatakɔ Okleklesa Dii, baatɔta Yaa di Yerusalem. Lɛwɔɔfo obe kame diale. 23 Ni di Yesu lakyɛ aatoofe di Yaa Olekatakɔ lɛba le boɔlɛɛ ni Salomo ablalakyi nɛ. 24 Ninfe di Yuda batii labamana nwo baakyi, ni baakaale nwo ale, “Le oso feediɛ wo buobu diisi nkpo? Tɔko wo! Kubio afo ninle Kristo nwu nkpo?”

25 Ninfe di Yesu latɔko ma ale, “Ntɔɔtɔko ye oɔlaa wo mmle kofokofoko, kafɔɔ biloofũ mi binu. Asaa ya kɔbla nfe ni di Teemi osie kame kodiki mi suoto kanya fiɛ. 26 Kafɔɔ biloofũ binu, diekye biekye bafoso nii nwu nkpo kame. 27 Bafoso nii nnu mi selɔ. N-ye ma, mma kafɔɔ batikankoe. 28 Nioso leta ma nkpa be ninnaa ni kaloo, blɔbawɔɔ diidii. Kuonwii kafɔɔ dilabafuo

ma okpafe ofũ mi ninnεε kame. ²⁹ Teemi niεyo ma eekpee mi di nneε kame, eemuo kafoo alenke lesaa biala. Kuonwii kafoo dilabafuo ma okpafe ofũ di Teete nneε kame diidii. ³⁰ Ami ku Teete, onwii bule.”

³¹ Ninfe di Yuda batii nwu nkpo lakple baayo afuo ale boosafu Yesu ne. ³² Ninfe di Yesu labue aatoko ma ale, “Ntoobla sekpe biene kpinwu di anu lee letuo ye, nse di Teete lekpee mi ale mbla nii. Omεnle suoto oso biomε bile bisafu mi afuo?”

³³ Ninfe di Yuda batii nwu nkpo ladiki kanya ale, “Buloomε bule busafu fu afuo di okpe biene kuonwii suoto, kafoo mbusuo olaa wo feebue ni oso! Diekye otii ko fale kafoo foobla suoto fale Yaa fale!”

³⁴ Ninfe di Yesu ladiki kanya ale, “Beskpana di kufiofa lee Kukũ kame ale, Yaa lebue ale, ‘Bite fe Yaa.’ ³⁵ Buye kafoo bule, olaa wo Kookpana Klekle lebue nii, kute nkpo obe lele. Yaa kafoo lalε batii ba niafũ ni olaa biene nwu ale, ‘Bite fe Yaa.’ ³⁶ Kafoo ami yi, Teete niediki mi eekpee mi kayi ka mmle. Ni be oso nfe buobue bile, lebue mbusuo olaa ta lebue nle Yaa Obi nle? ³⁷ Nse diele lesaa le di Teemi komε ale mbla ni kobla yi, ni bitanfũ mi bianu. ³⁸ Kafoo nse nni kobla yi, kunte biefũ mi binu yi, ni biefũ sekpe se kobla ni binu. Ni bibatofu, minnu kaso kafoo bile, Teete nwu nkpo nsi mi kaame, ami kafoo nsi nwo kaame.”

³⁹ Yuda batii nwu nkpo lamε ale bookple mammufũ Yesu, kafoo aadie ma kaame aasifi.

⁴⁰ Ni di Yesu lasifi aakple aalaataale Yordan okle, aasifi leba le di Yohane Yaa Ntu Kpeesate

latookpeesa ni batii Yaa ntu saa, aalaasie ninfa. ⁴¹ Batii kpinwu lawa okye nɔɔ bababue ale, “Yohane ditabla okpe wɔ niabla ni okpe kuonwii aatuo. Kafɔɔ selaa se simuu aabue ni di otii wɔ mmle suoto lewa kaanya nkpo.” ⁴² Ninfɛ baatii kpinwu lafũ Yesu baanu ninfa nɛ.

11

Lasaro Lakpi.

¹ Osuoto onwii baatɔɔlɛɛ ni Lasaro lakye okpoo wɔ baatɔɔlɛɛ ni Betania, latoofie. Babilema sankobi banyɔ banwii niale ni Maria ku Marta kafɔɔ lasie di okpoo nwu nkpo kame. ² Maria wɔ mmle niale otii wɔ niayɔ nɔnyi kɔnɔnkɔnɔ aakpete ni di Saate nkpaatũ aayɔ disi sinwini nɔɔ aasunsũ ni nɛ. Obilema suɔtɔbi niale Lasaro wɔ niatoofie ni nɛ. ³ Babilema sankobi nwu nkpo latika Yesu kanya ale, “Saate, siewo lefɔ bɔmbɔtɛ kofie.”

⁴ Obe wɔ di Yesu lanu ni kanya ka mmle, aabue ale, “Lasaro ofie wɔ mmle dilabale nwɔ kukpi kaloo. Kafɔɔ nle mmle lewa kaanya ale baayɔ mantakatesaa Yaa leyooto katoo. Diefɛ ni di nle mmle kame kafɔɔ, baayɔ mantakatesa Yaa Obi nwu nkpo katoo.”

⁵ Yesu labɔmbɔ Marta ku obilema sankobi ku Lasaro osie kanya. ⁶ Kafɔɔ aafũ kanya ale Lasaro kofie nii, aasie ninfũ aawe ni ayi anyɔ aakyakaa. ⁷ Nni nkpo semaa, ni aatɔkɔ basaateketete nɔɔ ale, “Bitu bukple busifi Yudea nɛ.”

⁸ Ninfɛ di basaateketete nɔɔ nwu nkpo ladiki kanya ale, “Saatuote, kɔsanklo ko mmle di Yuda

batii nwu nkpo ninfa lamie ale boosafɔ fɔ afuo!
Ni fookple fammie fale fookye nfa ne?"

⁹ Ninfe di Yesu ladiki kanya ale, "Diele lefosi ambombo anyɔ ninsi di dii kufi kame? Nse otii nkye di dii kame diekpa ni oso yi, antuula. Diekye kayi lekpa ntɔ antɔnya. ¹⁰ Kafɔ nse akye ku kakye yi, antuula. Diekye, lekpa nsinnaa."

¹¹ Obe wɔ di Yesu labue ɔlaa wɔ mmle aaloo nii, aakple aabue aakyakaa ale, "Siwo loo Lasaro kɔkyɔsi, kafɔ makye naasenkesa nwɔ."

¹² Ninfe di basaateketete nɔɔ ladiki kanya ale, "Saate, nse ɔkyɔsi ɔkyɔsi yi, ni dibayɔ nwɔ."

¹³ ɔlaa wɔ di Yesu latobue ninle ale Lasaro ntokpi, kafɔ basaateketete lanyu ale sekysɔi fukuti suoto aatɔkakate.

¹⁴ Nioso Yesu latoko ma aatikiti ale, "Lasaro ntokpi. ¹⁵ Kafɔ, aye oso, dile ale ntawe ninfa fie aakpi, ta mmle okle biafu mi minnu nii. Bita bukye ɔkye nɔɔ."

¹⁶ Ninfe di Toma wɔ booleeni Letabi latoko basaateketete wo nɔɔ ale, "Bit awo kafɔ bukye ku Saatote buɔlakpi ku nnwɔ."

Yesu Ninle ɔtaka Okye Baakpi Kame Saate.

¹⁷ Obe wɔ di Yesu lakye aalaabuo nii, aanu ale dii nwu nkpo niale dii naafa baakookaa ni Lasaro ne. ¹⁸ Diedie ni di Betania diesifi ni Yerusalem, ditakyo. Lekyo kate fe akɔ anyɔ. ¹⁹ Nioso Yuda batii kpinwu lakye ale boɔlakpee Maria ku Marta kɔne kaafutu, ta obilema suɔɔbi nwu nkpo kukpi oso.

²⁰ Obe wɔ di Marta lanu ale Yesu nfe kowa nii, ni aadie aalaakyo nwɔ ne. Kafɔ Maria lasie

leeyo. ²¹ Ninfe di Marta latoko Yesu ale, “Saate, nse fe faanwe ninfu se obiloo diekpi! ²² Kafoo bia nle n-ye nle, lesaa lele feekaale Yaa, ababla anta fo.”

²³ Ninfe di Yesu latoko nwo ale, “Obilee mataka ansie nkpa.”

²⁴ Ninfe di Marta ladiki kanya ale, “N-ye nle abakple antaka di obe wo baakpi makple mantaka ni di Dii Yentele nwu nkpo suoto.”

²⁵ Ninfe di Yesu latoko nwo ale, “Ami ninle otii wo nintakatasa ni baakpi nta ma ni nkpa ne. Otii lele niefu mi eenu, kunte eekpi, abasie nkpa.

²⁶ Otii lele kafoo ninkpe nkpa eefu mi eenu yi, diidii kafoo olobakpi. Feefu nle mmle feenu?”

²⁷ Obe wo di Yesu lakaale nwo ni nkpo, ni di Marta ladiki kanya ale, “Yii, Saate, lefu lenu nle afo ninle Kristo, Yaa Obi wo beebue beete ni kofokofoko ale abawa ni kayi ne.”

Yesu Lawi Kaku.

²⁸ Obe wo di Marta labue olaa wo mmle aaloo nii, ni aakple aasifi aalaale obilema Maria buee aatoko nwo ale, “Saatote ntobabuo, okaale fo disi kafoo.”

²⁹ Obe wo di Maria lanu ni olaa wo mmle, ni aapesewa aadie aalaakyakako nwo ne. ³⁰ Di obe nwu nkpo kame, Yesu lakple aayila di leba le di Marta lakye aalaakyakako nwo nii. Diekye ayibuo kakpayotu nwu kame.

³¹ Obe wo di Yuda batii ba niawe ni leeyo ku Maria baatookpee nwo ni konee kaafutu lanyaa ale aataka wla aadie nii, baatikanko nwo. Diekye baanyu ale, okya katu oofe, aanaawi kaku.

³² Obe wo di Maria lalaadu ni leba le di Yesu layila ni, aanyoo nii, nfanwu, ni aape akunkyi

kaatũ nɔɔ aabue ale, “Saate, nse fe faanwe ninfũ nse obiloo diekpi!”

³³ Obe wɔ di Yesu lanyanya mmle okle di Maria latoowi ni ku mmle okle di Yuda batii ba kafɔɔ niatikanko nɔɔ ni latoowi ko nɔɔ nii, diakpanko nɔɔ otu, ni aabla hũ di suoto nɔɔ kame nɛ. ³⁴ Ni aakaale ale, “Ɔfe biakookaa nɔɔ?”

Ninfe baatɔko nɔɔ ale, “Saate, wa fabanyu.”

³⁵ Ninfe di Yesu lawi nɛ.

³⁶ Ninfe di Yuda batii nwu nkpo labue ale, “Binyu mmle okle ambɔmbɔ nɔɔ ni lo!”

³⁷ Kafɔɔ batii bawo kaame lema labue ale, “Aatikiti numbietɛ anu. Ni be oso nfe atafuo ɔbla ale, Lasaro atankpi?”

Yesu Lasenkɛsa Lasaro Aakyeko Kukpi Kame.

³⁸ Diakple diakpanko Yesu di otu osie kanya, ni aakye aalaadu ɔkya nwu niale ni ofuɔntuu, baayo difuɔ baatii ni kanya nɛ. ³⁹ Ninfe di Yesu latɔko ma ale, “Bikyisa difuɔ nwu di ɔkya nwu nkpo kanya.”

Ninfe di Marta, kpi nwu nkpo obilema sankobi latɔko nɔɔ ale, “Saate, abakpete! Diekye mie ninle dii naafa buokookaa nɔɔ ni nɛ!”

⁴⁰ Ninfe di Yesu latɔko Marta ale, “Nintɔkɔfɔ nle nse feefũ feenu, fabanya Yaa osie wɔ ninkpe nɔɔ ni?”

⁴¹ Ni baatii nwu nkpo lakyisa difuɔ nwu nkpo di ɔkya nwu kanya nɛ. Ninfe di Yesu latakatɛsa anu aanyu osi ni aabue ale, “Teete, kɔpɛ fɔ sɛfa ale nse leleɛ fɔ fantuna mi. ⁴² N-ye nle obe lele fantuna mi. Kafɔɔ kobue ɔlaa wɔ mmle ta batii ba mmle nin-ye ni ninfũ oso, ale baatofɔ ale afɔ niekpee mi.”

⁴³ Obe wɔ aabue ɔlaa wɔ mmle aaloo nii, ni aafaa osie kanya aabue ale, “Lasaro yee, die fawa!” ⁴⁴ Nfanwu, ni aadie aawa ne. Akookaasaa ya baakookaa nwɔ ni lamimini nwɔ nneɛ ku nkpa. Dibula le kafɔ baayɔ baamiminisa nwɔ anu latii nwɔ anu.

Ninfɛ di Yesu latɔkɔ ma ale, “Bifukuti nwɔ asaa nwu di suoto, aatɔkyɛ.”

Yuda Batii Lakpee Asi Baawo Ale Boolo Yesu.

⁴⁵ Obe wɔ di Yuda batii ba niawa ni Maria nfũ lanyaa lesaa le di Yesu labla nii, kpinwu lafũ nwɔ baanu. ⁴⁶ Kafɔ bawo lasifi Farisi batii nfũ baalaatɔkɔ ma lesaa le di Yesu labla nii. ⁴⁷ Nkpo oso Farisi batii ku olebatate banɔfo lakyaka ku Yuda batii batunlete ni baakaale bawo ale, “Le buɔbla? Diekye osuɔɔ wɔ mmle ntɔɔbla sekpe se niebla ni ɔkpe kpinwu! ⁴⁸ Nse buodie nwɔ ekye sitũ mmle okle yi, ni otii biala kamafũ nwɔ anu. Ni Roma batunlete mataka wo di suoto mamabie Yaa Olekatakɔ loo ka mmle, ku Kale loo kamuu!”

⁴⁹ Ni di onwii kaame lema baatɔleɛ ni Kaiafa, aale ni Oletate Nɔfo di leleɛ nwu kame latɔkɔ ma ale, “Lesɔnu lee lekyo lo! ⁵⁰ Bieye bile dile dilenke ale otii onwii kakpi di kale kamuu disi ale batii bamuu kawɔ ni ee, see le?”

⁵¹ Nwaako baabue nii, atabue ɔlaa wɔ mmle di nnwɔ omu nɔ suoto nɔ kame. Kafɔ fe mmle aale Oletate Nɔfo di leleɛ nwu nkpo kame yi, ni aabue ɔlaa aate ale Yesu kɔwa ɔbakpi di Yuda batii bamuu disi ne. ⁵² Diele kafɔ ale aakpi di lete lema disi. Kafɔ ale aasiisa Yaa babi ba niasasami ni di kayi ka mmle aba aba ambla ma onwii.

⁵³ Dieyɔ di dii nwu nkpo diasifi nii, ni di Yuda batii batunlete lakyako osuku omie ale boolo Yesu ne. ⁵⁴ Ta nle mmle oso, Yesu ditasinfuo okye otoofe di Yuda batii kame leekpaka. Nkpo oso aadie ku basaateketete nɔɔ baalaasie di okpoo wɔ boolee ni Efraim, dietete ni ofaafuu kame.

⁵⁵ Di obe nwu nkpo kame, Yuda batii Okpi Diisi Ofe Dii olebee ntɔɔtete. Nioso batii kpinwu lakye kaasɔ nwu nkpo aba aba baakye Yerusalem ale boolaabla suoto okleklesa ɔsaabla fie di dii nwu nkpo olebee nwo. ⁵⁶ Obe wɔ baasi ni di Yaa Olekatako nwu nkpo baatoowolaa Yesu, baatɔkaale bawo ale, "Le biɛnya, sɛɛ alabafuo dii le mmle nwu nkpo kaleko ɔwae?" ⁵⁷ Ni di olebatate banɔfo ku Farisi batii lata letofo ale, nse otii owo n-ye nfũ di Yesu nkpe nii, aawa ababue baakye baalaamufũ nwo.

12

Maria Lafifia Yesu Nnɔnyi Di Betania.

¹ Ditoobu ayi akuɔ fie di Okpi Diisi Ofe Dii ole nwu mawo nii, Yesu lakye Lasaro nfũ di Betania okpoo, dile ni osuɔɔ wɔ di Yesu lasenkɛsa ni kuukpi kame. ² Ni baawa alesaa baata Yesu ninfa ne. Marta niatɔɔɛ alesaa nwu nkpo. Lasaro kafɔ lasie di batii ba niatoole ni alesaa nwu nkpo kame ku Yesu. ³ Ninfɛ di Maria layɔ nnɔnyi kɔnɔkɔnɔ be niefũ ni kɔya osie kanya lebo kple baayɔ lesaa le boolee ni nard baabla nii aabakpete di Yesu nkpaatũ, ni aayɔ disi sinwini nɔɔ aasunsũ ne. Ni di nnɔnyi nwu nkpo ɔkɔnɔ lafũ leyo nwu nkpo kame ne.

⁴ Ninfe di Yesu saateketete onwii kaame lema boolee ni Yuda Iskariot, nwo nimadiki nwo anta nii, labue ale, ⁵ “Be lesaa oso manaayo nnonyi be mmle baasunsu bawe batii alafa atie dii kokpento, bayo koto nwu nkpo bata bapiite?”

⁶ Aabue olaa wo mmle, diele ale aayo nwu ni ole di bapiite suoto oso, kafoo ta yu aale ni oso. Diekye nnwoo nfu di koto katofoe lema lawe ne. Aatooyu koto nwu nkpo kowo kaame.

⁷ Ninfe di Yesu latoko nwo ale, “Bidie nwo! Bietoo aablako lesaa le eekookaa eta ni lekookaayi nii okpe. ⁸ Bapiite nsi ye kaame obe lele. Kafoo ami, diele obe lele kamawe ye kaame.”

Yuda Batii Labla Disibu Kpile Di Lasaro Suoto.

⁹ Obe wo di Yuda batii kpinwu lanu ale Yesu ntowa akpe ni di Betania, baakye nfa. Diele ale Yesu lete oso baakye nfa, kafoo ale boolaanyu Lasaro wo aatakatasa aakyeko ni kukpi kame. ¹⁰ Nkpo oso olebatate banoofo labla disibu ale babalo Lasaro kafoo. ¹¹ Diekye nnwoo oso, Yuda batii latoosi ma, balaatoofu Yesu baatoonu.

Yesu Lawa Yerusalem Fele Oka.

¹² Kaleese, batii dikudi le niawa ni Okpi Diisi Ofe Dii kaleko nwu nkpo lanu ale, Yesu nfe kowa Yerusalem. ¹³ Nkpo oso baabudi sekaafe, ni baadie baakye baalaakyakako nwo, baatootaa siwidi ale,

“Hosiana!

Bitansa otii wo nikowa ni di Saate leyooto kame!
Bitansa Israel Batii Oka nwu!”

14 Yesu lawe bọkẹe wọ ninte ni fe lẹponkobi aasie ni di suoto fe mmle okle di Kọkpana Klekle Kukū labue ni ale,

15 “Aye Sion batii, bitanyeke!

Binyu Ọka lee ninsi di bọkẹe wọ ninte ni fe lẹponkobi suoto ọwa ne.”

16 Basaateketete nọo ditanu lesaa le mmle kaso kaasọ kakyeko. Kafọo obe wọ di Yaa latakatasa Yesu aakyeko ni bakpi kame aatọo ni dibu yi, nfa nfe baanyuma ale Kọkpana Klekle labue ọlaa wọ mmle aakyeko suoto nọo, nni batọobla beeto ne.

17 Batii ba niayila ni di Yesu ọkye fie aalee Lasaro aakyeko ni ọkya kame, aasenkesa nwo aakyeko ni bakpi kame, baakye baalaabue lesaa le niawa ni baakyakasa. 18 Lesaa le oso di batii dikudi nwu nkpo lakye baalaakyakako ni Yesu niale ale, baanu ọkpe wọ niabla ni ọkpe wọ aabla nii. 19 Farisi batii latoko bawo ale, “Bionya, diloolẹ dita wo saa! Binyu batii bamuu kaayi ntoodie batikanko nwo!”

Hela Batii Bawo Lamie Ale Bionya Yesu.

20 Hela batii bawo lasie di batii ba niakye Yerusalem ale boolaato ni Yaa di Okpi Diisi Ofe Dii nwu nkpo kame. 21 Ni baakye Filipino nfū, nwo niakye ni Betsaida di Galilea kaso, baalaatoko nwo ale, “Ọnoolo, buomie bule bunya Yesu.”

22 Ninfe di Filipino lakye aalaanya Andrea ne, ni baanyo lema baakye baalaatoko Yesu ne.

23 Ninfe di Yesu ladiki kanya ale, “Obe nwu nkpo ntoowo ale baakpee Otii Obi nwu nkpo dibu kple. 24 Nwaako kotoko ye nle, nse bayipe dititabi kaasọ dibuu yi, dititabi ninwii lete dile.

Kafɔɔ nse batɔɔpɛ ni kaasɔ diebuu yi, fiɛ nfiɛ nimakpɛ ninkple atitabi kpinwu. ²⁵ Otii lele niebɔmbɔ nkpa nɔɔ, abayu mi. Kafɔɔ otii lele niekyidi nkpa nɔɔ kaayi ka mmle yi, abakookaa mi anta nkpa be ninnaa ni kaloo. ²⁶ Otii lele nikomiɛ alɛ abla mi ɔkpɛ yi, aatikankoe. Diekye nfũ nkpe nii, nfa kafɔɔ di kpɛmblatɛ nii nwu nkpo kamawɛ nɛ. Otii biala kafɔɔ niebla mi ɔkpɛ yi, Teemi makpee nwɔ dibu.

Yesu Lakakatɛ Di Kukpi Nɔɔ Suoto.

²⁷ “Nunua yi, otu nii kowi kaku. Be nfiɛ nimbue? Mbuɛ nɛ, ‘Teete, tanta dibuo le mmle lawa mi di suoto’ ɛɛ, sɛɛ lɛ? Kafɔɔ nkpo oso lɛwa nɛ, alɛ kafe ni kaamɛ. ²⁸ Teete, takatɛsa leyooto lɛfo katoo!”

Ninfiɛ di selɔ lakye osi siabue alɛ, “Ntɔɔtakatɛsa ni katoo kofokofoko. Kamakple ntakatɛsa ni katoo kafɔɔ.”

²⁹ Batii dikudi le niayila ni ninfa lanu selɔ nwu nkpo, ni baawo labue alɛ kanto niekpududuu. Bawo kafɔɔ labue alɛ, “Yaa tɔkyɛntɛ owo niekakatɛ ko nwɔ.”

³⁰ Ninfiɛ di Yesu latɔkɔ ma alɛ, “Diele ami oso di selɔ se mmle ledie, kafɔɔ aye oso siedie.

³¹ “Obe ntoowo alɛ Yaa kakanko kayi ka mmle. Obe kafɔɔ ntoowo alɛ aatososa nwɔ nikole ni kayi ka mmle seka. ³² Nse batɔɔkenke mi kaasɔ ka mmle suoto beesifiko osi yi, kamananfi batii bamuu nwako ɔkyɛ nii.” ³³ Yesu labue ɔlaa wɔ mmle alɛ ɔɔyɔ antuo kukpi ko okle ɔɔwa ni ɔbakpi.

³⁴ Ninfiɛ di batii dikudi nwu nkpo ladiki kanya alɛ, “Buye di kufiofa loo kame alɛ, Kristo nwu

nkpo kamasiε nkpa ninnaa ni kaloo. Le oso nfe foobue fale Otii Obi nwu babatakatesa nwɔ katoo? Owe ninle Otii Obi nwu nkpo?”

³⁵ Ninfe di Yesu ladiki kanya ale, “Lekpa nwu nkpo masie ye kaame di obe kakui kame. Nioso obe wɔ di lekpa nwu nkpo nkpe nii yi, bidiki nkpaabikye. Nse diele nkpo, kale maloo ye. Otii wɔ kafɔ ninkyε ni diitunu kame yi, aaye nfũ oofe nii. ³⁶ Nkpo oso bifũ lekpa nwu nkpo binu di obe wɔ dikpe ye ni diokyε, ale biakple lekpa kame batii.”

Obe wɔ di Yesu labue ɔlaa wɔ mmle aaloo nii, ninfe aasifi aadie ma aalaawofasa suoto ne.

Yuda Batii Ladiki Baatuo Ale Baafũ Yesu Banu.

³⁷ Nu di Yesu labla sekpe se niebla okpe di anu lema yi, batafũ nwɔ baanu.

³⁸ Ta mmle okle di Yaa ɔlaa Bustete Yesaia ɔlaa wɔ aabue aate ni kawa ni kaanya oso. Aabue ale, “Saate, owe niefũ ɔlaa wɔ buabue ni aanu?

Owe kafɔ di Saate ladiki osie nɔɔ aatuo?”

³⁹ Ta nkpo oso batafuo ofũ onu, diekye Yesaia lakple aabue ale,

⁴⁰ “Yaa lebie ma anu, ale blaanya asaa ku anu lema.

Eeta ma beewe setokopi, ale blaanu selaa.

Yaa labue ale, ‘Blabamunikii bawa okye nii, ale kayɔsa ma sife.’ ”

⁴¹ Yesaia labue ɔlaa wɔ mmle, diekye aanya Yesu lekple, ni aabue ɔlaa aakyeke suoto nɔɔ ne.

⁴² Nu diate nkpo, Yuda batii batunlete kpinwu lafũ Yesu baanu. Kafɔ batafuo odiki obue di lekpa. Diekye baatoyeke ale Farisi batii matososa ma di kasiisako lema nwu nkpo kame.

⁴³ Diekye mambombɔ aɛ batii katansa ma manlenkee aɛ, Yaa katansa ma.

Yesu Kanya Kame Sɛlaa Nimalo Batii Lɛpɔɔ.

⁴⁴ Yesu labuɛ ku sɛlɔ siene aɛ, “Otii lele niefũ mi eenu yi, diele lete nii eefũ eenu. Kafɔɔ ku otii wɔ niekpee mi ni kafɔɔ eefũ eenu. ⁴⁵ Otii lele niɛnyɛɛ yi, ɛɛnya otii wɔ kafɔɔ niekpee mi nii. ⁴⁶ Lɛwa kayi ka mmle fele lekpa. Aɛ otii lele niefũ mi eenu yi, ɔlobasiɛ di ditunu kame.

⁴⁷ “Nse otii owo lenu mi ɔlaa anankyɔɔ nwu atoko yi, diele ami nimalo nwɔ lɛpɔɔ. Diekye ninwa kayi ka mmle nɛ kamalo batii lɛpɔɔ, kafɔɔ ɔwa lɛwa nɛ kɔmata ma nkpa. ⁴⁸ Otii lele niesĩ mi ananfũ mi ɔlaa anu yi, otii wɔ nimalo nwɔ ni lɛpɔɔ nkpe. Sɛlaa se lebuɛ ni nimalo nwɔ lɛpɔɔ di dii yɛntele nwu nkpo suoto. ⁴⁹ Diekye nwaako katɔkɔ ye nii, diele ami omu osie layɔ lakakate. Kafɔɔ Teete wɔ niekpee mi ni niatɛɛ ɔlaa wɔ dikpe ni kabuɛ ni ku mmle labuɛ nwu nii. ⁵⁰ N-ye nɛ sɛlaa nɔɔ nwu nkpo ninta nkpa be ninnaa ni kaloo. Nkpo oso sɛlaa se labuɛ nii, labuɛ sĩ fɛ mmle okle di Teete lakpee mi aɛ mbue sĩ nii.”

13

Yesu Lafoto Basaateketete Nɔɔ Nkpa.

¹ Fie kaale mase manle ni Okpi Diisi Ofe Dii nwu nkpo yi, Yesu latofo aɛ obe ntoowo aɛ nfe aadie kaasɔ ka mmle suoto, ansifi Ote nfũ. Aabombɔ batii ba niale nwɔ ni bale kaasɔ ka mmle suoto obe lele. Aabombɔ ma aalaase kaayenteleko.

² Kòtòfò nwu nkpo, Yesu ku basaateketete nòò lasiè baatoole alesaa. Di obe nwu nkpo kame Abonsam ntòòyò eekpee di Yuda wò niale ni Simon Iskariot obi disi kame kofokofoko alè aadiki Yesu anta. ³ Yesu latofò alè Ote lèyò osie omuu eekpee nwò di nnèè kame. Aatofo alè Yaa nfũ aakye, òkye nòò kafòò ookple anfe. ⁴ Nkpo oso aataka di alesaa nwu nkpo kalekò, aadiki osi awu nòò aate, aayò òsa aanii òtò. ⁵ Ninfe aanyèèèè ntu aakpete di bèèsi kame, ni aakyako basaateketete nòò nkpaà ofoto nè. Ni aayò òsa wò aanii ni òtò aatoosunsũ ma nkpaà nè. ⁶ Obe wò di Yesu labadu ni Simon Petro suoto yi, Petro lakaalè nwò alè, “Saate, ami nkpaà fòowa òbafoto?”

⁷ Ninfe di Yesu latòkò nwò alè, “Floonu lèsaà le kòbla ni kasò, kafòò sèmaa yi, fabanu kasò.”

⁸ Ninfe di Petro latòkò nwò alè, “Diidii, namata fò fafoto mi nkpaà!”

Ninfe di Yesu latòkò nwò alè, “Nse faatèè osuku nfotofò nkpaà yi, ni flabasinfuo mi saateketete ole.”

⁹ Nkpo oso, Petro latòkò nwò alè, “Saate, nse nkpo kute, ni tanfoto mi nkpaà lete. Foto mi nnèè ku disi kafòò!”

¹⁰ Ninfe di Yesu latòkò nwò alè, “Otii lele nintookpe ntu kamaa, atoodie ntu okpe, nkpaà lete nfè aafoto. Aye yi, bitoodie klekle, diediki otii onwii lete.” ¹¹ Diekye Yesu latofò otii wò nimadiki nwò anta nii, nkpo oso aabue alè, “Bamuulee biedie klekle, diediki otii onwii lete.”

¹² Obe wò di Yesu ntooloo ma ni nkpaà ofoto yi, aakplea osi awu nòò nwu nkpo aakpee, ni aakple aalaasiè kaasò nè. Ni aakaalè basaateketete

nɔɔ nwu nkpo aɛ, “Bienu lɛsaa le lɛbla lɛta ye ni kasɔ? ¹³ Minlɛɛ mi bilɛ Saatuoɛtɛ ku Saate. Osuku kule minlɛɛ mi nkpo, diekye otii nwu okle nle nɛ. ¹⁴ Nse, ami Saate lee ku Saatuoɛtɛ, ntoofoto ye nkpaɛ yi, ni dikpe ni ayee, biefoto bawo nkpaɛ. ¹⁵ Ntoɔbla ɔtɛ onyu lɛta ye aɛ, ayee biabla fɛ mmle okle lɛbla lɛta ye nii. ¹⁶ Nwaako kɔtɔkɔ ye nɛ, kpɛmblatɛ kuonwii dielenke saate nɔɔ. Nkpo okle kafɔɔ di tɔkyɛntɛ ninlenkee otii nwo niekpee nwo ni kɔtɔ nɛ. ¹⁷ Nunua nɛɛ biye ni lɛsaa le dikpe ni biɛbla nii, suoto mayɔɔ ye nse biɛyɔ biekpee di ɔkɛ ɔbla kamɛ.

¹⁸ “ɔlɛa wo mmle kobuɛ nii, diele bamuu lee nlaka. Diekye n-ye mba lediki nii. Dikpe ni Kɔkpana Klekle Kukū kamɛ sɛlɛa se bɛɛkpana ni lɛwa kaanya aɛ, ‘Otii wo munko nwo buokpee kɔnɛɛ kaasɛɛ buole ni letaka eeyila mi di suoto.’

¹⁹ “Kole katū ntɔkɔ ye sɛlɛa se mmle ntɛ fiɛ simawa kaanya. Nse siɛbaawa kaanya yi, ni bibafū mi minu bilɛ nle Otii wo nnle nii. ²⁰ Nwaako kɔtɔkɔ ye nɛ otii lele niefū otii wo lekpe ni kɔtɔ yi, ami eefū. Otii lele kafɔɔ niefū mi yi, eefū otii wo niekpee mi ni kɔtɔ.”

Yesu Labuɛ Aatɛ Otii Wo Nimadiki Nwo Anta Nii.

²¹ Obe wo di Yesu labuɛ sɛlɛa se mmle aaloo nii, aabuo nyaami osie kanya di otu kamɛ. Ni aadiki kanya aɛ, “Nwaako kɔtɔkɔ ye nɛ otii onwii kaamɛ lee madiki mi anta.”

²² Diabla basaateketetɛ nwu ɔkɛ, ni baamunikī baatoonyu bawo di anu nɛ. Diekye batatofɔ owe lɛma di Yesu lalaka. ²³ Basaateketetɛ nwu nkpo onwii lɛma, nwo di Yesu mbɔmbɔ ni lasiɛ

di Yesu olɔɔkɔ tintintĩ. ²⁴ Ninfe di Simon Petro lamunaasa anu aakpee nwɔ ale, “Kaale nwɔ otii wɔ alaka ni.”

²⁵ Ta nkpo oso saateketete nwu nkpo lakensa simu aakyenko Yesu olɔɔkɔ, ni aakaale nwɔ ale, “Saate, owe dile?”

²⁶ Ninfe di Yesu ladiki kanya ale, “Otii wɔ kamayɔ alesaa nnyɔ kuutu nta nii, nnwɔɔ ne.” Ninfe aabe alesaa nwu kakye aanyɔ kuutu aayɔ aata Yuda wɔ ninle ni Iskariot obi ne. ²⁷ Nfanwu di Yuda lafũ ni alesaa nwu nkpo, ni di Satana layie aabuo nwɔ kaame ne.

Ninfe di Yesu latɔkɔ nwɔ ale, “Pesewa, faabla lesaa le fale fɔɔbla ni.” ²⁸ Kafɔɔ kuonwii lema di alesaa kalekɔ nwu nkpo ditanu kasɔ lesaa le oso di Yesu latɔkɔ ni Yuda ɔlaa nwu nkpo. ²⁹ Basaateketete nwu nkpo bawo lanyu ale di Yuda ninkle ma ni koto katofoe oso, loo Yesu ɔtokɔ aatɔkɔ nwɔ ale, atɔkye alaaya asaa ya babayɔ manle ni dii nwu nkpo awako. Ee alaayɔ koto kowo akyenko bapiite.

³⁰ Di Yuda lafũ alesaa nwu nkpo aaloo nii, nfanwu, ni aadie aasifi ne. Obe nwu nkpo kafɔɔ kale ntooloo.

Yesu Lakpee Basaateketete Nɔɔ Kufiofa Fɔle.

³¹ Di obe wɔ di Yuda ntoosifi nii, ninfe di Yesu labue ale, “Nunua batɔɔtakatesa Otii Obi nwu leyooto katoo, diefe ni di suoto nɔɔ kafɔɔ batɔɔtakatesa Ote leyooto katoo. ³² Ni nse batɔɔtakatesa Yaa leyooto katoo diefe ni di Obi nwu suoto, ni Yaa kafɔɔ matakatessa Obi nwu nkpo leyooto katoo diefe ni di suoto nɔɔ. Ababla ni kafɔɔ ku nkye.

33 “Babi nii, namasinsie die okye lee nkle. Bibawolaa mi. Selaa se latoko ni Yuda batii banoofo, nsinwu kafoo kotoko ye nunua nle, ‘Leba le kofe nii, bilabafuo nfa okye.’

34 “Nunua yi, kufiofa fole kota ye. Bibombo bawo! Fe mmle okle labombo ye nii, nkpo okle yekpe ni biobombo bawo ne. 35 Nse mimbombo bawo yi, ni batii bamuu manya ale kubio basaateketete nii bile.”

Yesu Labue Aate Ale Petro Kamasĩ Nwo.

36 Ninfe di Petro lakaale nwo ale, “Saate, ofe foofe?”

Ninfe di Yesu ladiki kanya aatoko nwo ale, “Leba le kofe ni nunua yi, flobafuo mi otikanko owa. Kafoo semaa yi, fabatikankoe fanwa.”

37 Ninfe di Petro lakaale nwo ale, “Saate, be oso ninaafuo fo otikanko nunua? Lelolaa suoto nle kakpi bia diisi lefo!”

38 Ninfe di Yesu lakaale nwo ale, “Kubio feelolaa suoto fale faakpi diisi nii? Nwaako kotoko fo nle, fie di kooko mabo nii, fababue sitie simu fale, faaye mi.”

14

Yesu Ninle Osuku Wo Nikofe Ni Ote Nfu.

1 Ninfe di Yesu latoko basaateketete noo ale, “Bitanta otu lape ye. Bifu Yaa binu, biefu ami kafoo binu. 2 Mbuoko kpinwu nkpe di Teemi leyo, kosifi ninaalolaa leba nte ye. Nse kuote nkpo yi, namatoko ye. 3 Nse ntolalolaa leba letete ye leloo yi, makple nwa makpaa ye nsifiko okye nii, ale nfu nkpe nii yi, aye kafoo bibasie ninfa. 4 Biye osuku wo nintika kuosifi ni nfu kofe nii.”

⁵ Ni di Toma lakaale nwo ale, “Saate, munanye nfũ foofe nii, le dibabla fie bubatofu osuku nwu nkpo?”

⁶ Ninfɛ di Yesu latokɔ nwo ale, “Ami ninle osuku nwu, onukware nwu, ku nkpa nwu nɛ. Oti kuonwii dilɔbafuo Teete nfũ okye diediki eefe di suoto nii. ⁷ Nse fe biye mi yi, nse biye Teete nwu kafɔ. Kafɔ dieyo ni nunua, nfe biye nwo, bitɔnyɔɔ kafɔ.”

⁸ Ninfɛ di Filipino latokɔ Yesu ale, “Saate, tuo wo Teete nwu nkpo, nse nfe dipɔ wo.”

⁹ Ninfɛ di Yesu ladiki kanya ale, “Filipo, obe kpinwu wo ntoosieko ni bamuu lee diebase bia nua, be oso fanayitofu mi? Oti lele nintɔnyɛɛ yi, atɔnya Teete nwu kafɔ. Ni be oso fookple fambuɛ fale, ‘Tuo wo Teete nwu nkpo’? ¹⁰ Sɛɛ Filipino, faafũ fanu fale nsi di Teete nwu nkpo kame, Teete nwu nkpo kafɔ nsi mi kaame? Selaa se latokɔ ye ni yi, siɛkye okye nii. Kafɔ Teete wo ninsi mi ni kaame nikɔbla okpe nɔ. ¹¹ Bifũ mi binu nse letokɔ ye nle nsi di Teete kame, nnwɔɔ kafɔ asi mi kaame. Nse biɛfũ selaa se mmle binu yi, ni bifũ binu ta sekpe se kɔbla ni oso.

¹² “Nwaako kotokɔ ye nle oti lele niefũ mi eenu, ababla asaa ya lebla nii. Nwaako ababla bia n-ya ninlenke nii, diekye nfe kosifi Teete nfũ.

¹³ Lesaa lele kafɔ biɛkaale di leyooto nii kame kamabla, ale baatakatesa Teete leyooto kato diefe ni di Obi nwu suoto. ¹⁴ Lesaa lele biɛkaale mi leeyooto nii kame, kamabla nta ye.”

Yesu Latokɔ Basaateketete Nɔɔ Ale Abata Ma Yaa Ninwuna Klekle.

15 Yesu lakpe aabue ale, “Nse nimbombo mi yi, bibale mi afiofa. 16 Ni kamakaale Teete anta ye Kyakaakote bamba wo nimasieko ye ni obe lele. 17 Nnwoo ninle Ninwuna le nindiki antuo otaa nukwale di Yaa suoto ne. Kayi ka mmle dilabafuo nwo onya ee atofu nwo. Kafoo aye biye nwo, diekye akpe ye diokye, asi ye kaame kafoo. 18 Nse lesifi yi, namadie ye fe bakuabi. Kamakple nwa okye lee. 19 Di obe kakui kame kayi ka mmle dilabasinyee. Kafoo aye bibanyee. Ta nkpe ni nkpa kafoo oso ayee, bibasie nkpa. 20 Nse dii nwu nkpo lewo yi, bibatofu bile nsi di Teemi kame, ayee kafoo bisi mi kaame, fe mmle okle nsi ye ni kaame.

21 “Oti lele niefu mi afiofa eele nya yi, nnwoo ninle otii wo nimbombo mi ni ne. Teemi kafoo mabombo otii wo nimbombo mi nii. Ami kafoo kamabombo nwo ndiki suoto nii kafoo ntuo nwo.”

22 Yuda, diele nwo ninle ni Iskariot labue ale, “Saate, le dibawa ale fabadiki suoto fantuo wo ale kayi ka mmle batii dilabanya fo?”

23 Ninfe di Yesu ladiki kanya ale, “Oti lele nimbombo mi yi, abakyo mi asaa otuo kotoko. Teemi kamabombo nwo, nse Teemi ku ami omu, butowa okye noo buobadiki nwo kasie. 24 Oti lele kafoo ninambombo mi yi, ankyo mi asaa otuo kotoko. Asaa otuo ya kafoo bienu mi letuo ni yi, aale ami omu asaa otuo, kafoo Teete wo niekpee mi ni asaa otuo ale.

25 “Ntootoko ye selaa se mmle di obe wo lekple nkpe ye ni diokye. 26 Kyakaakote wo ninle ni Ninwuna Klekle di Teete makyese ye ni di

leyooto nii kame, kamatuo ye lesaa biala, anta ye minyuma selaa se simuu ntootoko di nii.

²⁷ “Atoko okye ole ninle lesaa le kodieko ye nii. Ami omu atoko okye ole koyo nta ye. Noyo nta ye fe mmle okle di kayi nn-yo kanta nii. Bitanta otu lape ye biabu diisi, bitanyeke. ²⁸ Bienu lebuε letoko ye ne, ‘Nfe kosifi, kafoo makple nwa ye okye.’ Nse mimbombo mi yi, suoto kamayoo ye ale nfe kokple nsifi Teete nfū. Diekye estakakato alenke mi. ²⁹ Ntootoko ye selaa se mmle simuu fie sibawa kaanya, ni nse siebawa kaanya yi, bibafū minnu. ³⁰ Namasinfuo okple okakateko ye okyenko sitū, diekye kayi ka mmle tunlete nfe kowa. Anaa osie kuonwii di suoto nii, ³¹ Kafoo dikpe ni kayi ka mmle letofo ale mbombo Teete nwu nkpo, nkpo oso kobla lesaa biala fe mmle okle eekpee mi ni ne.

“Yoo, biwa buokye ninfū busifi.”

15

Yesu Ninle Kolewoso Nwua Nwaa Ne.

¹ “Ami ninle kolewoso nwaa nwu nkpo ne, Teemi kafoo ninle alewoso nwu kofe kpente. ² Ola lele ninka mi di suoto kunootika abi kamaa, ambudi nwu an-yu. Olele kafoo nikotika abi, ambεble nwu ale kuaklekle kuntika abi kumpoosa. ³ Batookleklesa ye suoto kofokofoko di asaa ya letuo ye ni suoto oso. ⁴ Bibla onwii ku ami, ni amii mabla onwii ku aye. Diekye ola kuonwii ninfuo abi otika di nwu omu suoto, nse kuoka di kowoso suoto. Nkpo okle kafoo di ayee, bilobafuo abi otika nse biεbla onwii ku ami ne.

⁵ “Ami ninle kolewoso nwu nkpo, ni di ayeε bile sεla nε. Olele niεbla onwii ku ami, di amii labla onwii ku nnwɔɔ yi, abatika abi kpinwu. Diekye bilabafuo lesalesaa ɔbla nse ninsi kaame. ⁶ Otii lele ninambla onwii ku ami yi, mambudi nwɔ man-yu fε owosola kunkoso. Mansiisa sewosola nwu nkpo mankpee s̄i ɔto sinfiε. ⁷ Nse biεbla onwii ku ami, di ɔlaa ni kafɔɔ nsi ye kaame yi, ni biεkaale lesaa lele biomiε, kamabla nta ye. ⁸ Nse biotika abi kpinwu yi, dibata batii ntakatesa Teemi leyooto katoo. Ni diotuo kafɔɔ ale basaateketete nii bile. ⁹ Mbɔmbɔ ye fε mmle okle di Teete mi mbɔmbɔ mi nii. Nkpo oso bisie di leɔmbɔ nii nwu kame ale kabɔmbɔ ye obe lele. ¹⁰ Nse biεle mi afiofa yi, ni bibasie mi di leɔmbɔ nwu kame, fε mmle okle lele ni Teemi afiofa lesie nwɔ ni di leɔmbɔ kame.

¹¹ “Ntɔɔtɔko ye sεlaa se mmle ale suoto leyɔɔ nii kasie ye kaame, ale suoto leyɔɔ lee kafɔɔ kawo nimu. ¹² Kufiofa ko kokpee ye ni ninle nko mmle nε. Bibɔmbɔ bawo fε mmle okle labɔmbɔ ye ni. ¹³ Leɔmbɔ le niεtaka katoo dilenke ni ninle ale otii kayɔ nkpa nɔɔ ante kaasɔ anta baawo nɔɔ disi. ¹⁴ Nse biεbla di kufiofa nii ko mmle suoto, ni basiewo nii bile. ¹⁵ Noosinlee ye nle bakpεmplate nii bile, diekye kpεmplate dieye lesaa le di saate nɔɔ kobla nii. Nunua koleε ye nle basiewo, diekye ntɔɔtɔko ye lesaa biala lenu lekyeko ni Teemi nfū. ¹⁶ Diele aye niediki mi, kafɔɔ ami niediki ye nle, bitɔokyε biεlaatika abi kpinwu. Ale abi ya bibatika nii, baanya nya obe lele. Ale Teete nwu kamata ye lesaa lele biεkaale nwɔ di leyooto nii kame. ¹⁷ Nkpo oso kufiofa ko

kokpee ye ni ninle aɛ, bibɔmbɔ bawo.”

Kayi Batii Lekyidi Yesu Basaateketete.

¹⁸ Yesu lakple aabue aɛ, “Nse kayi batii lekyidi ye yi, bitofo bile batoole katũ beekyidi mi. ¹⁹ Nse fe onwii biɛbla ku kayi ka mmle batii di ɔsaabla lɛma kamɛ yi, bataba bɔmbɔ ye fele balema. Kafɔ lediki ye lekyeko ni kayi ka mmle batii kamɛ, minasinle ma ni bale oso yi, nkpo oso beekyidi ye nɛ. ²⁰ Binyuma ɔlaa wɔ latokɔ ye ni nɛ, ‘Kpɛmplate kuonwii dielenke saate nɔɔ.’ Nse baakpe mi kamaa, ni ayee, babakpe ye. Nse mankyɔɔ mi asaa otuo atoko yi, se aye kafɔ batabakyɔɔ ye ale atoko. ²¹ Kayi batii mababla ye asaa ya mmle amuu ta balemi bile ni oso. Diekye baaye otii wɔ niekpee mi ni kɔtɔ. ²² Nse nfe ntanwa labakakate lata ma yi, nse batabalo ma okpile lɛpɔɔ. Kafɔ nunua mmle nfe dite nii, basinnaa osuku ɔkaale kuonwii di sikipile lɛma suoto. ²³ Otii lele niekyidi mi kamaa, eekyidi Teemi kafɔ. ²⁴ Nse fe ntambla ɔkpe wɔ di otii kuonwii diibla anya ni kaame lɛma yi, nse baakpi okpile lɛpɔɔ ku ninwii. Kafɔ mmle nfe dite nii, batɔɔnya asaa ya amuu lɛbla nii, kafɔ beekyidi ami ku Teemi. ²⁵ Dikpe nii asaa ya mmle amuu lɛwa kaanya fe mmle okle beekpana ni Kɔɔkpana Klekle Kukũ kamɛ aɛ, ‘Beekyidi mi kasakasa.’

²⁶ “Kamakyeseɛ ye kyakaakote wɔ niekye ni Teete nfũ ninle ni Ninwuna Klekle le nindiki antuo ɔlaa nukwale di Yaa suoto nɛ. Nse ɛɛwa, abadiki mi suoto kanya anta ye nɛ. ²⁷ Aye kafɔ bibadiki mi suoto kanya minta batii, diekye bitɔɔwe di ɔkye nii dieyɔ ni bia kasɔ kakyeko.”

16

¹ “Ntootoko ye selaa se mmle simuu, mmle okle di nneε dilaafee ye ni di ofũ onu lee kame. ² Babatososa ye mandiki di nsiisako lema kame. Obe kafoo kowa, otii onwii kamalo ye, annyu ale Yaa okpe obla. ³ Batii mabla ye asaa ya mmle, diekye baaye Teete nwu ee ami. ⁴ Kafoo ntootoko ye selaa se mmle ale nse obe nwu nkpo lewo beεbla nya yi, ni bibanyuma bile latoko ye.

Yesu Lakakate Di Ninwuna Klekle Okpe Obla Suoto.

“Ntatoko ye selaa se mmle kaasoo kakyeko diekye lawe di okye lee. ⁵ Kafoo nunua yi, nfe kosifi otii wo niekpee mi ni nfũ. Kafoo kuonwii lee diekaale mi nfũ kofe nii. ⁶ Kafoo nunua ntootoko ye nii, situ lee ntooyii po ku senyaami. ⁷ Kafoo nwaako kotoko nii, dile dieta ye ale lesifi. Diekye nse ninsifi, kyakaakote nwu nkpo dilabawa ye okye. Kafoo nse lesifi, kamanaa kyeseε nwo anwa. ⁸ Nse εεwa, abadiki ntuo batii kaayi ale beekpi lepoo siikpile suoto. Babatofu mmle kafoo manankye ni tinini, mantofu ale Yaa makanko ma kafoo. ⁹ Babakpi lepoo ta okpile oso, diekye baafũ mi banu. ¹⁰ Babatofu kafoo ale baakye tinini. Diekye, nfe kokple nsifi Teete nfũ. Bilabasinnyeε kafoo. ¹¹ Mantofu ale Yaa makanko ma kafoo, diekye Yaa ntoolo otii wo ninle ni kayi ka mmle tunlete lepoo kofokofoko.

¹² “Nkpe selaa kpinwu katoko ye nii, kafoo nunua wo mmle yi, bilabafuo simuu kasoo onu. ¹³ Kafoo nse Yaa Ninwuna le nindiki antuo ni olaa nukwale di Yaa suoto lewa, abaleko ye katũ anta

ye mintofu onukware nwu nkpo omuu. Diekye ɔlobakakate di nnwɔɔ omu osie kame, kafɔɔ abakakate di nle eenu nii, antɔkɔ ye kafɔɔ asaa ya amuu nimawa nii. ¹⁴ Abata mantakatɛsa mi leyooto katoɔ, diekye abayɔ ɔlaa wɔ lebuɛ ni antɔkɔ ye. ¹⁵ Lesaa biala ninle Teete lele yi, ami nimba. Nkpo oso letɔkɔ ye nle, Ninwuna nwu nkpo mayɔ ɔlaa wɔ lebuɛ ni antɔkɔ ye.”

Basaateketete Kaku Owi Lakple Suoto Leyɔɔ.

¹⁶ Yesu lakple aabuɛ alɛ, “Di obe kakui kame yi, bilabasinnyeɛ. Kafɔɔ dilabakɛ bibakple minnyeɛ.”

¹⁷ Ninfe di basaateketete nɔɔ bawo lakaale bawo alɛ, “ɔlaa wɔ mmle obuɛ ni kasɔ mɔ? Diekye eebuɛ alɛ di obe kakui kame bula-basinnyeɔɔ. Kafɔɔ di obe kakui kame kafɔɔ bubakple munyeɔɔ. Eekple eebuɛ kafɔɔ alɛ, ‘Diekye nfe kosifi Teete nfu.’ ¹⁸ ɔlaa wɔ eebuɛ alɛ, ‘Di obe kakui kame’ ni be diotuo? Buoye be alaka!”

¹⁹ Yesu latofo alɛ basaateketete nɔɔ lamie alɛ bɔɔkaale nwɔ ɔlaa di nni nkpo suoto. Nkpo oso, aakaale ma alɛ, “Le buɛ nle, ‘Di obe kakui kame bilabasinnyeɛ, di obe kakui kame kafɔɔ, bibakple minnyeɛ.’ Nwu suoto biɔkaale bawo selaa ne?”

²⁰ Nwaako kɔtɔkɔ ye nle, bibawi kaku mimbuo senyaami, kafɔɔ kayi batii mma, suoto nimayeɔɔ ma. Bibabuo senyaami, kafɔɔ senyaami lee nwu nkpo maki ninkple ye suoto leyɔɔ. ²¹ Nse lemɛ ntoobe ɔsanko yi, ambuo nyaami, diekye obe nɔɔ ntoowo abanu ni dibuo. Kafɔɔ nse atoolofo obi nwu nkpo yi, aanyee dibuo nwu nkpo. Diekye suoto kɔyeɔɔ nwɔ alɛ atoolofo obi ɛwako kayi

ka mmle. ²² Nkpo okle dite ye nε. Nunua yi, bitoobuo senyaami, kafɔɔ makple nnya ye nii, situ lee mayii ku suoto leyɔɔ. Suoto leyɔɔ le okle di otii kuonwii dilabafuo ye ni ofũ ninnεε diidii.

²³ “Nse obe nwu nkpo lewo yi, bilabakaale mi lesalesaa. Nwaako kɔtɔkɔ ye nle, Teete mata ye lesaa lele biekaale nwɔ di leyooto nii kame.

²⁴ Diebase bia nua, biikaale lesalesaa di leyooto nii kame. Bikaale, babata ye, di suoto leyɔɔ lee dibla nimu.

Yesu Lelenkee Kayi Ka Mmle.

²⁵ “Ntɔɔtɔkɔ ye selaa se mmle lefenko di akpa kame. Kafɔɔ obe kɔwa ninɔmasin-yɔ akpa nkakate nta ye nii. Di obe nwu nkpo kame, kamakakate nta ye klekle di Teete suoto. ²⁶ Nse obe nwu nkpo lewo yi, bibakaale nwɔ lesaa di leyooto nii kame. Diele obue kobue nle, ami kamakaale nwɔ diisi lee. ²⁷ Diekye Teete nwu nkpo omu mbɔmbɔ ye. Ambɔmbɔ ye diekye mimbɔmbɔ mi, biefũ bienu kafɔɔ bile ɔkye nɔɔ lakye. ²⁸ Nwaako Teete nfũ lakye lawa kayi ka mmle, nfe kokple ndie kaayi ka mmle nsifi Teete nwu nkpo nfũ.”

²⁹ Ninfe di basaateketete nɔɔ nwu latɔkɔ nwɔ ale, “Nunua nfe fɔɔkakate fanta wo klekle ninnanle ni akpa kame. ³⁰ Nunua, nfe buye bule faye lesaa biala, diesinfĩ ale otii kuonwii kakple ankaale fɔ ɔlaa kuonwii. Nle mmle lete ntɔɔta wo buofũ bonu bule Yaa nfũ feekye.”

³¹ Ninfe di Yesu lakaale ma ale, “Bitoofũ bienu nfe? ³² Obe kɔwa, babasamiisa bamuu lee, obiala lee nsifi ni nnwɔɔ omu nɔɔ leyo mindie mi nii. Obe nwu kafɔɔ ntoowo. Kafɔɔ nwaako diele lete

nii ninsi, diekye Teete nsikoe. ³³ Ntootoko ye olaa wo mmle, mmle okle di atoko okye ole kasioko ye nii, ta mmle okle biebla ni onwii ku ami oso. Kayi ka mmle batii mata dibuo mbuo ye. Kafoo bikpee otu! Diekye ntoolenkee kayi ka mmle!”

17

Yesu Lape Olaa Aata Di Basaateketete Noo Disi.

¹ Di obe wo di Yesu labue salaa se mmle aaloo nii, ni aatakatasa anu aanyu osi ni aabue ale, “Teete, obe nwu nkpo ntoowo. Takatasa Obi lefo nwu leyooto katoo, di Obi lefo nwu kafoo atakatasa fo leyooto katoo. ² Diekye fheetoo osie di batii bamuu suoto fale, aata mba feeyo fheetoo ni nkpa be ninnaa ni kaloo. ³ Nkpa nwu nkpo ninnaa ni kaloo owe ninle ale, batii katofa ale leete lefo pe ninle ni onukware Yaa, mantofa Yesu Kristo wo feekyesee nii. ⁴ Ntootakatasa fo leyooto katoo baatii kame kaasoo ka mmle suoto. Diekye ntooloo okpe wo feekpee mi fale mbla ni obla. ⁵ Teete, nunua yi, kple fatakatasee leyooto katoo di anu lefo fe mmle okle late ni di obe wo lawe di okye lefo fie faabla ni kayi.

⁶ “Ntoodiki fo letuo batii ba feediki feteete ni kaayi ka mmle kame. Balefo bale, ni feeyo ma feteete ne. Batookyoo fo olaa atoko. ⁷ Nunua kafoo, nfe baye ale, lesaa biala feeyo feekpee mi di nne kame, okye lefo diekye. ⁸ Ntooyoo olaa lefo wo faayo faakpee mi ni ninnee fale nta ma ni leta ma, baafu nwu kafoo. Nfe baye kafoo ale nwaako okye lefo lakye, beefu beenu kafoo ale afo niakpee mi koto. ⁹ Kope olaa nta diisi lema.

Nɔɔpɛ ɔlaa nta di kayi kamuu batii disɪ, kafɔɔ mba fɛɛyɔ feekpee mi ni ninnɛɛ kameɛ disɪ kɔpɛ ɔlaa nta. Diekye balefɔ bale.

¹⁰ “Batii ba bamuu ninkpe mi nii, bale fɔ bale, mba kafɔɔ ninkpe fɔ nii, bale mi bale. Mma kameɛ bɛɛtakatesa leyooto nii katoɔ nɛ. ¹¹ Nunua kafɔɔ, nɛ kokple nwa ɔkyɛ lɛfɔ. Ninsinsi kaayi ka mmle kameɛ, kafɔɔ mma basi. Teete Klekle, nyu ma ku leyooto lɛfɔ osie, dile ni leyooto le fɛɛtɛɛ nii. Di mmle okle baabla ni onwii, fɛ mmle okle di ami ku afɔ buɔbla ni onwii. ¹² Di obe wɔ lawɛ ni di ɔkyɛ lɛma yi, lanyu ma ku leyooto lɛfɔ nwu osie, dile ni leyooto le fɛɛtɛɛ nii. Laklee ma alɛ kuonwii lɛma ditayu, diediki nwo lete dikaate alɛ ɛɛwɔɔ ni, Kɔɔkpana Klekle Kukũ kameɛ selaa kawa ni kaanya.

¹³ “Nunua nɛ kɔwa ɔkyɛ lɛfɔ. Nioso kobue selaa se mmle kaayi ka mmle kameɛ nɛ, mmle okle baawɛ ni suoto leyɔɔ nii siitu lɛma kameɛ ninwo ni nimu. ¹⁴ Ntɔɔyɔ ɔlaa lɛfɔ nwu nkpo lɛta ma. Ta nkpo oso kayi ka mmle lekyidi ma, diekye baasinle kayi ka mmle bale, fɛ mmle okle ninanle ni kayi ka mmle ole.

¹⁵ “Diele ɔkaalɛ kɔkaalɛ nɛ faadiki ma kaayi ka mmle kameɛ. Kafɔɔ kɔkaalɛ nɛ faanyu ma fandiki ma di Kyidite nwu nkpo nɛɛ kameɛ. ¹⁶ Fɛ mmle okle ninanle ni kayi ka mmle ole yi, nkpo okle di mma kafɔɔ mananle kayi ka mmle bale nɛ. ¹⁷ Bla ma klekle fata suoto di onukware nwu nkpo kameɛ. ɔlaa lɛfɔ nwu ninle onukware nɛ. ¹⁸ Kɔkpee ma kayi batii nfũ, fɛ mmle okle feekpee mi ni kayi batii nfũ. ¹⁹ Ta mma oso, labla suoto

nii klekle lata fɔ, di mmle okle di mma kafɔɔ baabla ni suoto klekle di onukware nwu kamɛ.

Yesu Lape ɔlaa Aata Di Bafūbanute Bamuu Disi.

²⁰ “Nɔɔpe ɔlaa nta di lete lɛma disɪ, kafɔɔ ku mba nimafū mi mannu ni di ɔlaa biene lɛfɔ nwu nkpo babatɔkɔ ma ni suoto. ²¹ Teete, kɔpe ɔlaa nta nle bamuu lɛma baabla onwii. Ta ma basie wo kaamɛ, fɛ mmle okle fasi mi ni kaamɛ, di ami kafɔɔ nsi fɔ ni kaamɛ. Ta ma babla onwii alɛ kayi batii matofɔ alɛ kubio afɔ niekpee mi kɔtɔ.

²² “Leyooto biene le fɛyɔ fɛtɛɛ nii, nninwu okle lɛyɔ leta ma nɛ, alɛ baabla onwii, fɛ mmle okle munko fɔ buɔbla ni onwii. ²³ Ami nsi ma kaamɛ, afɔɔ fasi mi kaamɛ, alɛ baabla onwii niimu kamɛ, mmle okle kaayi batii matofɔ alɛ nwaako afɔ niekpee mi kɔtɔ, fambɔmbɔ ma kafɔɔ fɛ mmle okle fambɔmbɔ mi nii.

²⁴ “Teete, afɔ niyɔ ma fɛtɛɛ, nioso komie nle bawe ninfū nkpe nii, alɛ baanya mmle okle fɛtɛkatɛsɛɛ ni leyooto katoo, dile ni leyooto le fɛtɛɛ nii. Diekye faabɔmbɔ mi fie bia fɛɛbabla kayi.

²⁵ “Teete, fate tinini. Kayi ka mmle batii dieye fɔ, kafɔɔ ami n-ye fɔ. Batii ba mmle kafɔɔ n-ye alɛ, afɔ niekpee mi kɔtɔ. ²⁶ Lediki fɔ letuo ma. Kamakple ntɔɔbla nkpo, mmle okle di lɛbɔmbɔ le fakpe fatɛɛ nii kamasie ma ni kaamɛ, alɛ ami kafɔɔ kasie ma ni kaamɛ.”

18

Yuda Batii Lamufū Yesu.

1 Obe wɔ di Yesu lape ɔlaa aata Yaa aaloo nii, manko basaateketete nɔɔ baasifi baalaataale kaklee ka baatɔɔleɛ ni Kedron. Nnɔnyi awoso kɔba kunwii lawe ninfa, ninfe di Yesu ku basaateketete nɔɔ lasifi baalaabuo kũ kaame ne.

2 Yuda wɔ niadiki nɔɔ aata ni kafɔɔ n-ye nfa, diekye Yesu ku basaateketete nɔɔ latɔɔkyaka ninfa obe lele. 3 Nioso Yuda kafɔɔ lakye kɔba nwu nkpo kame, aalaakpaa Roma batii bakpete dikudi ku Olekatakɔ banyunte ba di olebatate banɔɔfo ku Farisi batii lakpee nii. Baaklee bakandie ku nka ku akpesaa.

4 Di obe wɔ di Yesu latofo asaa ya amuu nimawa nɔɔ ni di suoto oso yi, ni aadie aawa sitũ aabaakaale ma ale, “Owe biowolaa?”

5 Ninfe baadiki kanya ale, “Yesu Nasaret Otii nwu buowolaa.”

Ninfe di Yesu latɔkɔ ma ale, “Nyee ninfũ!” Yuda wɔ niadiki nɔɔ aata ni kafɔɔ layila ma kaame. 6 Obe wɔ di Yesu latɔkɔ ma ale, “Nyee ni ninfũ” yi, bamuu lema baakple semaa semaa baanɔɔ baape kaaso.

7 Yesu lakple aakaale ma leyɔɔfa ale, “Owe biowolaa?”

Ninfe baabue ale, “Yesu Nasaret Otii nwu.”

8 Ninfe di Yesu latɔkɔ ma ale, “Ntɔɔtɔkɔ ye kofokofoko nle nyee ninfũ.” Ninfe di Yesu lakple aatɔkɔ ma ale, “Nse nwaako ami biowolaa yi, ni bieta batii ba mmle osuku baatɔɔkye.” 9 Yesu labue ɔlaa nwu nkpo mmle okle di ɔlaa wɔ aabue aate ni kawa ni kaanya. Aabue ale, “Teete, batii ba bamuu feeyɔ feeteɛ nii, ninta kuonwii lema ayu.”

¹⁰ Simon Petro laklee kapamii ninfa. Ninfe aadiki ka aasafo Oletate Nɔɔfo kpemblate kole-tanɛɛ kotoko aakpa nɛ. Kpemblate nwu nkpo leyooto niale Malkus nɛ.

¹¹ Ninfe di Yesu latokɔ Petro alɛ, “Kplesa kapamii lɛfo nwu nkpo fakpee di kotofo ko kameɛ feediki ka ni! Foonyu fale dibuo opũ wɔ di Teemi leyɔ ɛɛɛɛ nii, namanyi nwu?”

Yuda Batii Lakpaa Yesu Baasifiko Hana Anu.

¹² Ninfe di Roma batii bakpete ku ɔnɔɔfo lɛma ku Yuda batii asaa banyunte lamufũ Yesu baanii nɛ. ¹³ Ninfe baakpaa nwɔ lɛkasale baakyenko Hana n̄fũ nɛ. Hana wɔ mmle niale Kaiafa ɔlɔ nɛ. Kaiafa wɔ mmle kafɔɔ niale Oletate Banɔɔfo Nɔɔfo di lɛlɛɛ nwu nkpo kameɛ nɛ. ¹⁴ Kaiafa wɔ mmle niata Yuda batii batunlete disibu alɛ dile dilenke alɛ otii onwii kakpi di nnle mmuu disi.

Petro Lasĩ Yesu Alɛ Aye Nwɔ.

¹⁵ Simon Petro ku saateketete bamba onwii latikanko Yesu sɛɛmaa. Kafɔɔ saateketete nwu nkpo yi, Oletate Nɔɔfo nwu nkpo n-ye nwɔ nwaa, nkpo oso aatikanko Yesu baakye baalaabuo Oletate Nɔɔfo nwu nkpo kaflonkɔ. ¹⁶ Kafɔɔ Petro nnwɔɔ, aayila kaayi di kayoko kple ɔlɔɔkɔ. Ninfe di saateketete bamba nwu nkpo lakple aadie aakye kayi aalaakakateko ɔsankobi wɔ niayila ni di kayoko nwu kanya, ni aata Petro kafɔɔ labuo leyo nwu nkpo kaflonkɔ nɛ.

¹⁷ Nfa nfe di ɔsankobi nwu niayila ni kaayoko nwu kanya lakaale Petro alɛ, “Afo kafɔɔ diele osuɔɔ nwu nkpo saateketete onwii lɛma fale?”

Ninfɛ di Petro labuɛ alɛ, “Kpa woo! Ninsi ma kaamɛ.”

¹⁸ Lɛwɔɔfɔ lawɛ, nkpo oso bakpɛmblatɛ nwu nkpo ku basaanyuntɛ nwu lakutaa akaa ɔtɔ baamana nwu baakyi baatɔɔwɔfɔ nwu. Nkpo oso Petro kafɔɔ lakye aalaayila ma di ɔlɔɔkɔ aatɔɔwɔfɔ ɔtɔ nwu.

Oletatɛ Nɔɔfo Lakaalɛ Yesu Sɛlaa.

¹⁹ Oletatɛ Nɔɔfo lakaalɛ Yesu sɛlaa aakyeko basaateketetɛ nɔɔ suoto ku asaa nɔɔ otuo suoto.

²⁰ Ninfɛ di Yesu ladiki kanya alɛ, “Obe lele latɔɔkakatɛ latɔɔta batii bamuu lɛɛkpaka. Latuo asaa kafɔɔ di Yuda batii nsiisakɔ ku Olekatakɔ lɛma, nfa di batii nwu bamuu masi nɛ. Ntabuɛ ɔlaa kuonwii kafɔɔ di lɛwofa kamɛ. ²¹ Ni be oso di ami nɛ fɔɔkaalɛ sɛlaa? Kaalɛ batii ba nianu mi ni lɛkakatɛ. Mma yi, baye sɛlaa se labuɛ nii.”

²² Obe wɔ di Yesu labuɛ ni ɔlaa wɔ mmle yi, basaanyuntɛ nwu nkpo onwii lɛma lapɛ Yesu kɔnɛɛ kootokosi aakaalɛ nwɔ alɛ, “Ɔmensuku fakpe fandiki Oletatɛ Nɔɔfo kanya mmle okle?”

²³ Ninfɛ di Yesu lakaalɛ nwɔ alɛ, “Nse lebuɛ ɔlaa wɔ ninanlɛ ni yi, faabuɛ fatɔkɔ otii biala ninfũ. Kafɔɔ nse ɔlaa wɔ kobuɛ ni ninte nkpo mɔ, ni be oso fɔɔpɛ mi?”

²⁴ Ninfɛ di Hana lata baakpaa Yesu di lekpo le kamɛ baapɛ nwɔ ni baasifiko Oletatɛ Nɔɔfo Kaiafa nfũ nɛ.

Petro Lakplɛ Aasi Yesu.

²⁵ Di obe nwu nkpo kamɛ yi, Petro lakplɛ aayila aatɔɔwɔfɔ ɔtɔ nwu. Ninfɛ di batii nwu nkpo lakaalɛ nwɔ alɛ, “Diele osuoto wɔ mmle saateketetɛ onwii lɛma fale?”

Ninfe di Petro lasi abue ale, "Kpa woo! Ninsi ma kaame."

²⁶ Ninfe di Oletate Nofo kpemblate onwii wo ninle ni otii wo kotoko di Petro labudi ni obilema lakaale nwo ale, "Diele afo lanyanya mimko nwo di koba nwu nkpo kame ne?"

²⁷ Ninfe di Petro lakple aasi aabue ale, "Kpa woo!" Nfanwu, ni di kooko labo ne.

Baakpaa Yesu Baakyenko Pilato Anu.

²⁸ Kolesetu yi, baakpaa Yesu baadieko di Kaiafa leyo baasifiko Roma batii abaa nofo leyo. Kafoo Yuda batii banofotii ditabuo leyo nwu kame. Diekye baamie ale suoto lema sibla klekle mmle okle babafuo ni kukpi diisi ofe dii nwu nkpo ole.

²⁹ Ta nkpo oso Pilato ladie aakye okye lema kaayi aalaakaale ma ale, "Omenlaa biawako di osuoto wo mmle suoto?"

³⁰ Ninfe baadiki kanya ale, "Nse aabla okpile kuonwii yi, nse buokpaa nwo buwako okye lefo."

³¹ Ninfe di Pilato latoko ma ale, "Nse nkpo yi, ni aye bamu bikpaa nwo bisifiko bielaakanko nwo di kufiofa lee kanya."

Ninfe di Yuda batii batunlete latoko Pilato ale, "Baata wo osuku ale bualo otii kuonwii kukpi lepo." ³² Nle mmle nwu lawa ale, selaa se di Yesu labue aate ni di kukpi ko okle owa ni obakpi kawa kaanya.

³³ Ninfe di Pilato lakple aasifi leyo, ninfe aalee Yesu aakaale nwo ale, "Afo ninle Yuda Batii Oka nwu ne?"

³⁴ Nfa nfe di Yesu lakaale nwo ale, "Afo omu lefo nikokaale mi oiaa wo mmle ee, see batii bawo nietoko fo suoto ni oiaa?"

³⁵ Ninfɛ di Pilato kafɔɔ ladiki kanya alɛ, “Foonyu fale Yuda otii nle? Afɔ omu lɛfɔ kale batii bamu ku olebatatɛ banɔɔfo niekpaa fɔ bɛɛwakoe. Be fɛɛbla?”

³⁶ Nfa nfɛ di Yesu kotɔkɔ nwɔ alɛ, “Sɛka kalekɔ nii diekye kayi ka mmle kamɛ. Nse fɛ kayi ka mmle kamɛ di sɛka kalekɔ nii lekye yi, nse batikankotɛ nii ntabakpɛ mantɛɛ, se baayo mi bakpee di Yuda banɔɔfotii nnɛɛ kamɛ. Kafɔɔ sɛka kalekɔ nii diekye kayi ka mmle kamɛ.”

³⁷ Obe wɔ aatɔkɔ nwɔ ni ɔlaa wɔ mmle, ni di Pilato lakaalɛ nwɔ alɛ, “Ni ɔka fale?”

Ninfɛ di Yesu latɔkɔ nwɔ alɛ, “Afɔ nikobuɛ fale ɔka nle. Beelofo mi bɛɛwako kayi ka mmle bɛɛta lɛsaa ninwii, ninle ni alɛ, kadiki onukware nwu nkpo ntuo. Otii lele ninye onukware nwu nkpo kamaa, ankyɔɔ mi atoko.”

³⁸ Ninfɛ di Pilato lakaalɛ nwɔ alɛ, “Be ninle onukware nwu?”

Baalo Kristo Kukpi Lɛpɔɔ.

Obe wɔ di Pilato labuɛ ɔlaa wɔ mmle aaloo nii, ninfɛ aadie aasifi Yuda batii nwu nkpo nfɔ kaayi ni aalaatɔkɔ ma alɛ, “Ninnya okpile kuonwii di suoto nɔɔ kayila nlo nwɔ ni lɛpɔɔ. ³⁹ Kafɔɔ di ɔsaabla lee kanya, nse biole Okpi Diisi Ofe Dii nwu nkpo, dikpe nii lediɛ leyo tentɛ onwii lɛta ye. Nioso, biomie bile ndiɛ Yuda Batii ɔka nwu nkpo nta ye?”

⁴⁰ Ninfɛ di bamuu lɛma baafaa baabuɛ alɛ, “Kpa woo! Diele nnwɔɔ, kafɔɔ Baraba buomie!” Kafɔɔ Baraba wɔ mmle lataka aayila di abaa suoto.

19

Pilato Lata Baape Yesu Baama Nwo.

¹ Nkpo oso Pilato lata baakpete lakpaa Yesu baasifiko baalaape nwo osie kanya ku mpile. ² Ni baayo sekansi baabla lekoto baatũkũsoo diisi ne. Ninfɛ baayo awu sɛele ya niefũ ni koya wua baakpa nwo fe oka ne. ³ Ninfɛ baatootaa siwidi ale, “Yii yiiduu! Yuda batii Oka nfe kowa kyu woo!” Nse beetoko nwo nkpo kamaa, faanya nii, batoope nwo konɛɛ kootokosi.

⁴ Nni nkpo semaa, Pilato lakple aadie aakye kayi di batii dikudi nwu nkpo nfu aalaatoko ma ale, “Binyu! Kamakpaa nwo nwako anu lee, bibanya bile, ninya okpile kuonwii di suoto noo eesieko ale baalo nwo ni kukpi lepoo.” ⁵ Nioso Yesu ladie aawa kayi ninfa, aatũkũ sekansi lekoto, aakpee kafoo awu sɛele wua. Ninfɛ di Pilato latoko ma ale, “Binyu! Nnya otii nwu ninle nwo ne!”

⁶ Obe wo di olebatate banoofo ku Olekatakoko basaanyunte lanyoo nii, baafaa baabue ale, “Pe nwo sibue fakaasa koowoso suoto! Pe nwo fakaasa koowoso suoto!”

Ninfɛ di Pilato latoko ma ale, “Aye bamu bikpaa nwo bisifiko, bielaape nwo sibue bikaasa koowoso suoto. Ami, ninnya okpile kuonwii di suoto noo kalo nwo ni kukpi lepoo.”

⁷ Nfa nfe di batii dikudi nwu nkpo latoko nwo ale, “Bukpe kufiofa nikotuo ale aakpi nii, diekye oobue ale Yaa Obi ale.”

⁸ Di obe wo di Pilato lanu ni olaa wo mmle yi, leyekɛ lakple diape nwo osie kanya. ⁹ Ninfɛ aakple aasifi leyo aalaakaale Yesu ale, “Ofɛ feekye?”

Kafɔɔ Yesu ditatɔɔ ntale kunwii. ¹⁰ Ninfe di Pilato lakaale nwɔ ale, “Lee! Flookpee mi kanya? See faaye fale nkpe otumi kadie fɔ, ee nta mampe fɔ sibue mankaasa koowoso suoto?”

¹¹ Ninfe di Yesu latɔkɔ nwɔ ale, “Nse diele fe ɔta beeta fɔ osie nwu nkpo beekyeke osi yi, nse faawe otumi nwu nkpo di suoto nii. Nkpo oso otii wɔ niɛyɔ mi eekpee fɔ ni ninnɛɛ kame okpile nlenke ole fɔ.”

¹² Di obe wɔ di Pilato lanu ni ɔlaa wɔ mmle yi, aamie osuku wɔ suoto aafe andie ni Yesu. Kafɔɔ batii nwu nkpo lafaa baabue ale, “Nse feedie nwɔ, ni diotuo ale faasinle ɔka Kple Kaesare siewo! Diekye otii lele niebla suoto ɔka kamaa, ni ɛɛtaka aye di ɔka Kple suoto!”

¹³ Di obe wɔ di Pilato lanu ni selaa se mmle yi, ninfɛ aakpaa Yesu aadieko nɛ. Ninfe di nnwɔɔ omu aalaasie di lekankokpomii suoto nɛ, di leba le booleɛ ni afuo kasiisako. Di Hebri sele kame manlee leba nwu nkpo ale Gabata. ¹⁴ Dii nwu nkpo lale suoto ololaa dii diata Okpi Diisi Ofe Dii ole nwu nkpo. Diabla fe kakũ lefosi enyɔ.

Ninfɛ di Pilato latɔkɔ Yuda batii nwu nkpo ale, “Nya ɔka lee nwu nkpo!”

¹⁵ Kafɔɔ mia nfe baakple baatɔɔfaa osie kanya baatoobue ale, “Kpaa nwɔ fasifiko! Kpaa nwɔ fasifiko! Pe nwɔ sibue fakaasa koowoso suoto!”

Ninfɛ di Pilato lakaale ma ale, “Biomie bile mpe ɔka lee nwu nkpo sibue nkaasa koowoso suoto?”

Ninfɛ di olebatate banɔɔfo nwu nkpo ladiki kanya ale, “ɔka kuonwii nnaa wo dilenkee Roma Batii ɔka Kple nwu nkpo!”

¹⁶ Obe wɔ baabuɛ ɔlaa nwu baaloo nii, ninfe di Pilato kafɔ layɔ Yesu aakpee ma di nneɛ kame ale balaape nwo sibue bakaasa koowoso suoto ne.

Bakpete Lape Yesu Sibue Baakaasa Koowoso Suoto.

Nkpo oso, bakpete nwu lakpaa Yesu baasifiko. ¹⁷ Baata nnwɔɔ omu aatuka kowoso ko suoto babape nwo mankaasa ni aalaadunko leba le baatoolɛɛ ni Otii Disi Dikufi. Di Hebri sele kame manleɛ ni Golgota. ¹⁸ Nfa baape nwo sibue baakaasa koowoso suoto ne. Baape basuɔɔ banyɔ banwii kafɔ sibue baakaasa di awoso bamba suoto, di Yesu oletanɛekye ku ɔmentunɛekye.

¹⁹ Pilato lata baakpana lesaa bakaasa di Yesu kowoso nwu nkpo osi. Selaa se aakpana ni ninle nse mmle ne. Yesu Nasaret Otii nwu, Yuda Batii ɔka. ²⁰ Yuda batii kpinwu laka lesaa le mmle, diekye leba le baakaasa ni Yesu koowoso suoto ditakyo ku okpoo kple nwu nkpo. Diekyakaa nii, baakpana selaa se mmle di Roma, Hebri ku Griki batii sele kame. ²¹ Nioso olebatate banɔɔfo lasi ɔlaa nwu, ni baatoko Pilato ale, "Tankpana fale, 'Yuda Batii ɔka,' kafɔ kpana fale, 'Otii wɔ mmle kobue ale, "Ami ninle Yuda Batii ɔka." ' "

²² Ninfe di Pilato ladiki kanya ale, "Lesaa le ntɔɔkpana nii, ntɔɔkpana kofokofoko."

²³ Di obe wɔ baakpete nwu ntɔɔkaasa Yesu koowoso suoto beeloo nii, ni baayo aklesaa baase di akyuu ana ne, baakpete nwu obiala lema layɔ dikyuu ninwii ne. Kafɔ awu anwii labu. Awu nwu nkpo diele okaa baakaa nya,

kafɔɔ oloso baaloso nya baakyeko simu baalaase kaalo.

²⁴ Ninfɛ di bakpetɛ nwu latokɔ bawo alɛ, “Bitanta buabɛ awu ya mmle nkpo. Kafɔɔ bita buwii atrebi bunyu owe ale abale.”

Nle mmle nwu nkpo lawa kaanya alɛ, Kɔkpana Klekle ɔlaa wɔ beebue bɛɛɛ ni kawa kaanya. Baabue baate alɛ,

“Bɛɛɔ mi akleesaa bɛɛɛ bawo.

Beewii kafɔɔ atrebi di awu ya ninkpee nte ni kasɔ.”

Nni ninle lesaa le kafɔɔ di baakpetɛ nwu ntɔɔbla ni nɛ.

²⁵ Batii ba niayila ni di Yesu kowoso nwu nkpo baape nwɔ sibue baakaasa ni ɔloko niale, Yesu ɔya ku ɔya obilema ku Maria wɔ ninle ni Klopa ɔsofo ku Maria Magdalene. ²⁶ Obe wɔ di Yesu lanyaa saateketete wɔ ambɔmbɔ ni nwaa ku ɔya n-ye nii, ni aatokɔ ɔya alɛ, “Mma, nnya obi lefo!”

²⁷ Ninfɛ aatokɔ saateketete nwu nkpo alɛ, “Nyu, nnya mma lefo!” Diayɔ ni di obe nwu nkpo kame, ni di saateketete nwu nkpo lakpaa Yesu ɔya aasifiko leyo nɔɔ, aalaasie di ɔkye nɔɔ nɛ.

Yesu Lakpi.

²⁸ Yesu latofɔ nfe alɛ, lesaa biala ntooloo. Ta mmle di Yaa ɔlaa wɔ baabue baate ni kawa ni kaanya oso, Yesu labue alɛ, “Otu konsɔ nkle mi.”

²⁹ Leba le di ɔlaa wɔ mmle lawa nii, ntu lekpetesa kple ninwii layila ninfa, di nta nyankale layii kame diayila nii. Nkpo oso, baayɔ oleteku baanii di owoso onwii suoto bɔɔlɛɛ ni hisope baalaanyɔ di nta nwu nkpo kame, ni

baatakatesa baakyoo Yesu kaanya ne. ³⁰ Obe wo di Yesu lanyi nta nwu nkpo aaloo nii, ni aabue ale, "Kutooloo."

Ninfe aawakosa disi kaso ni ninwuna noo ladie ne.

Baatofo Yesu Ofankyi Ku Kotaa.

³¹ Ninfe di Yuda batii batunlete latoko Pilato ale ata ma osuku baalaafee basuoto ba baape bakaasa ni di kowoso suoto nkpa, baatekete bakpi lema di kowoso suoto. Baakaale nle mmle diekye Fiida diale, batamie kafoo ale bakpi lema kasaka di kowoso suoto dilaadu Lenyeteeyi nwu nkpo suoto. Diekye Lenyeteeyi nwu nkpo dii finle dile dieta ma. ³² Ta nkpo oso bakpete nwu lake baalaafee otii kasale nkpa, ni baake baalaafee onyoofa kafoo nle ne. Dile ni mba baakaasa ni awoso suoto di Yesu oloko. ³³ Kafoo obe wo baake Yesu nfu, baanya ale atookpi kofokofoko. Ta nkpo oso batafee nwo nkpa. ³⁴ Kafoo bakpete nwu nkpo onwii lema ladiki lekplolo noo aatofo Yesu di ofankyi. Ninfe di nto ku ntu ladie ne.

³⁵ Otii wo nianya ni lesaa le mmle niawa nii, niekpana olaa eekyeke nwu di suoto oota wo. Olaa lele etoko wo kute nkpo. Aye kafoo ale olaa wo oobue ni nte nkpo. Oobue nwu antoko ye ale biafu minu. ³⁶ Nle mmle lawa kaanya nkpo ale Kokpana Klekle Kukū kame olaa wo eebue ete kawa kaanya ale, "Bolobafee nwo dikufi kuniwii." ³⁷ Beekpana kafoo di leba bamba ale, "Batii manya otii wo beetofo ni lekplolo di ofankyi."

Baakookaa Yesu.

³⁸ Nle mmle sɛmaa, Yosef wɔ niakye ni okpoo wɔ baatɔɔlɛɛ ni Arimatea, lakye Pilato nfũ aalaatikiti nwɔ lekoto alɛ, adieko nwɔ Yesu kpi. Yosef wɔ mmle lale Yesu saateketete, kafɔɔ di lewofa kame, diekye aatɔɔyɛke Yuda batii banɔɔfo. Ni di Pilato latɔko nwɔ alɛ aafuo kpi nwu nkpo ɔbafũ, ni aalaafũ nwɔ aasifiko nɛ.

³⁹ Ni di Nikodemo wɔ niakasa ni Yesu nfũ ɔkyɛ ku kakye latikanko Yosef nwu nkpo nɛ. Ninfe aayɔ kɔfa ko man-yɔ manlolaa ni kpi, beeyɔ klobo ku kɔfa kɔnɔnkɔnɔ ko manlɛɛ ni aloɛ kpinwu aaklee nɛ. Kɔfa nwu nkpo lɛpɔ kawo fe bakiloo afosi atie.

⁴⁰ Ninfe baasuɔɔ ba mmle banyɔ lalolaa Yesu kpi nwu ku kɔfa nwu, baayɔ dibula fututu baamiminisa nwɔ di suoto fe mmle di Yuda batii mbla ni kpi fie mankookaa nii.

⁴¹ Kɔba kunwii lawɛ di lɛba le baalo ni Yesu. Di kɔba nwu kame, ɔkya ɔle onwii late ninfa manayikookaa ni otii kuonwii kaame diidii.

⁴² Di obe wɔ di dii nwu nkpo kaleese nimale ni Lenyɛɛteyi, fie di ɔkya nwu nkpo lateɛteɛ ni nfa oso yi, ni baayɔ Yesu baakookaa ninfa nɛ.

20*Yesu Lataka Aakye Baakpi Kame.*

¹ Kɔsida kolesetũ di obe wɔ kaayi diikpa nii, Maria Magdalene lakye ɔkya nwu katũ, ni aalaanya alɛ difuo le baayɔ baatii ni ɔkya nwu kanya baamunusa ni baakyisa.

² Ninfe aatoso aasifi Simon Petro ku saateketete wɔ di Yesu mbombɔ ni nfũ nɛ. Ni aalaatɔko ma alɛ, “Batii

bawo lekɔye beelaaklee Saate nwu beediki di okya kame, buoye nfũ kafɔɔ beeyɔ nwo beelaate nii!”

³ Ninfe di Petro ku saateketete bamba nwu nkpo ladie baatoofe okya nwu katũ ne. ⁴ Akyuu lema anyɔ baatootoso kafɔɔ, saateketete bamba nwu nkpo latoso aalaafe Petro, aaka nwo okya nwu nkpo katũ olaadu. ⁵ Aawakasɔ aakensa aanyu okya nwu nkpo kame, aanya abula fututu nwu, kafɔɔ atabuo di okya nwu kame. ⁶ Simon Petro latikanko nwo di nkpaamaa aabadu nfa, ni aafe nwo aabuo di okya nwu nkpo kame, ni aanya abula fututu nwu nkpo niate ni ninfa ne. ⁷ Dibula le baayɔ baanii ni Yesu disi late ninfa. Kafɔɔ ditate di abula fututu nwu nkpo olɔɔko. Nni baakatu ni baate lete di olɔɔko. ⁸ Ninfe di saateketete wo niakasa ni okya nwu nkpo katũ odu kafɔɔ labuo di okya nwu kame ne. Aanya akookaasaa nwu nkpo okle, ni aafũ aanu ne. ⁹ Diekye di obe nwu kame yi, bayinu Yaa olaa wo niabusɛ ale dikpe ni Yesu lekple estaka eekye ni kukpi kame kasɔ. ¹⁰ Ninfe di basaateketete nwu nkpo lakple baasifi ayo lema ne.

Yesu Ladiki Suoto Aatuo Maria Magdalene.

¹¹ Maria layila di okya nwu kotoko aatoowi kaku. Obe wo aatoowi ni nkpo, ni aawakasɔ ale oonyu okya nwu kame ne. ¹² Ninfe aanya Yaa batokyente banyɔ lakpee asaa fututu, baasie ninfũ baayɔ Yesu baate ni ne. Onwii lasie di lekantosi nɔɔ, onyɔɔfa kafɔɔ lasie di nkpaalo nɔɔ.

¹³ Ninfe baakaale nwo ale, “Osanko, be oso foowi kaku?”

Ninfe aadiki kanya ale, “Batii bawo labayo Saate nii beesifiko. Ninye nfu kafoo beeyo nwo beelaate nii!” ¹⁴ Obe wo aabue olaa nwo mmle aaloo nii, ninfe aamunikii aanyu semaa ne, ni aanya ale Yesu n-ye, kafoo atatofa ale Yesu diale.

¹⁵ Ninfe di Yesu lakaale nwo ale, “Osanko, be oso foowi kaku? Owe foowolaa?”

Kafoo Maria lanyu ale otii wo nikonyu ni leba nwo dile. Nkpo oso aatoko nwo ale, “Teete, lekoto, nse afo niyoo nwo feesifiko yi, faatuo mi nfu feeyo nwo feelaate ni, ninkyee naakpaa nwo.”

¹⁶ Nfa nfe di Yesu lalae nwo ale, “Maria!”

Ninfe aamunikii aanyu Yesu, ni aalae nwo di Hebri sele kame ale, “Rabuni!” Lesodiki ninle ale Saatuoete.

¹⁷ Ninfe di Yesu latoko nwo ale, “Die mi okpanko, diekye ninkple nsifi Teete nwo nfu di osi. Kafoo tookyee babiloo nfu faalaatoko ma fale, kokple nsifi Teemi ku Yaa nii nfu di osi. Ale ni aye kafoo Teeye ku Yaa lee.”

¹⁸ Nkpo oso, Maria Magdalene lakye aalaatoko basaateketete nwo nkpo ale atoonya Saate nwo. Ni aatoko ma selaa se simuu di Yesu latoko nwo ni ne.

Yesu Ladiki Suoto Aatuo Basaateketete Nwo.

¹⁹ Di Kosida nwo nkpo kotoofo yi, basaateketete nwo lasi dikudi di leyo ninwii kame, baasee leyo nwo ta baatooyeeke ni Yuda batii batunlete nwo nkpo oso. Nfanwu, ninfe di Yesu lawa aabayila ma nintee ne. Ni aatoko ma ale, “Atoko okye ole disieko ye.” ²⁰ Obe wo aabue olaa nwo nkpo aaloo nii, ni aatuo ma nnee ku ofankyi nwo ne. Ni di suoto leyoo layii

basaateketete nwu kame pɔ di obe wɔ baanyɔɔ ni ne.

²¹ Nni nkpo sɛmaa, Yesu lakple aatɔkɔ ma ale, “Atoko ɔkye ole disieko ye. Fe mmle okle di Teete lekpee mi ni kɔtɔ, nkpo okle di ami kafɔɔ kokpee ye ne.” ²² Ninfɛ aanwuna aakpete ma di suoto aatɔkɔ ma ale, “Bifũ Ninwuna Klekle nwu nkpo. ²³ Nse biɛyɔ batii sikipile biɛkye ma yi, ni Yaa kafɔɔ ntɔɔyɔ ɛɛkye ma. Nse biɛyɔ bikye ma yi, ni Yaa kafɔɔ dieyɔ akye ma.”

Yesu Ladiki Suoto Aatuo Toma.

²⁴ Di obe wɔ kame di Yesu lawa ma ni ɔkye yi, basaateketete lefosi banyɔ nwu nkpo onwii wɔ baatɔlɛɛ ni Toma, mankple manlɛɛ nwɔ ni Letabi, ditawe ma kaame. ²⁵ Nkpo oso obe wɔ aawa nii, basaateketete nwu nkpo latɔkɔ nwɔ ale, “Butɔnya Saate nwu!”

Ninfɛ di Toma latɔkɔ ma ale, “Nse ninnya sibue mpekɔ nwu nkpo ninnɛɛ nɔɔ n-yɔ lenɛɛ nii nkpee kaame, ee n-yɔ kɔnɛɛ nii nkpee di ɔfankyi nɔɔ nwu nkpo kame yi, namafũ nnu diidii.”

²⁶ Nnanwɔkyi onwii sɛmaa, basaateketete ba mmle lakple baasi leeyo kame, nni nkpo Toma nfe lasie ma kaame. Baaseɛ leyo nwu nkpo, kafɔɔ Yesu lawa aabayila ma nintɛɛ, ni aatɔkɔ ma ale, “Atoko ɔkye ole disieko ye.” ²⁷ Ninfɛ aatɔkɔ Toma ale, “Bayɔ lenɛɛ lefɔ fakpee ninfũ, faanyu mi nneɛ kame. Faayɔ kɔnɛɛ lefɔ fakpanko mi ɔfankyi nwu. Die ɔtanfũ onu lefɔ nwu nkpo, faafũ fanu!”

²⁸ Ninfɛ di Toma ladiki kanya aabue ale, “Saate nii ku Yaa nii!”

²⁹ Ninfe di Yesu lakaale nwo ale, “Ta feenyee ni oso feefũ feenu. Babakusekusesa batii ba ninanyee ni fie beefũ beenu nii!”

³⁰ Yesu lakple aabla sekpe se niebla ni okpe kpinwu di basaateketete nwo anu, kafoo baakpana bakpee di kukũ ko mmle kame. ³¹ Kafoo beekpana n-ya mmle beete ale biafuo ofũ onu bile Yesu ninle Kristo nwu nkpo, Yaa Obi nwu nkpo. Di nnwoo ofũ onu wo mmle kame yi, bibawe nkpa.

21

Basaateketete Lanya Yesu Di Lekpo Kotoko.

¹ Di nle mmle sema yi, Yesu lakple aadiki suoto aatuo basaateketete nwo di Tiberia Lekpo olooko. Nnya mmle okle aadiki suoto aatuo ni.

² Dii ninwii, Yesu basaateketete banwii lasi, mma ninle Simon Petro ku Toma wo boole ni Letabi ku Natanael wo niakye ni Kena di Galilea kaso suoto ku Sebedeo babi ku basaateketete bamba banyo. ³ Ninfe di Petro latoko ma ale, “Kokye naadiki kokpaku.”

Nfanwu, ni baatoko nwo ale, “Awoo, buowa munkye.” Nkpo oso bamuu lema baalaabuo di oklo kame baasifi. Kafoo dii nwu nkpo kake, batadiki kakpaku kukanwii.

⁴ Obe wo nfe kuufi kotu nii, Yesu lawa aabaayila di lekpo nwu nkpo katũ. Kafoo basaateketete nwu nkpo ditatofu ale Yesu diale. ⁵ Ninfe aakaale ma ale, “Bakosopo, ni, biediki lesalesaa?”

Ninfe baadiki kanya ale, “Oowo lo!”

⁶ Ninfe aatoko ma ale, “Bitaa asabu lee nwu nkpo bikpee di oklo nwu nkpo oletanekye,

bibadiki lɛsaa.” Nkpo oso baataa asabu nwu nkpo. Baadiki kɔkpaku kpinkidi aɛ, batasinfuo asabu nwu ɔtɔɔnanfi.

⁷ Ninfɛ di saateketetɛ wɔ di Yesu mbɔmbɔ ni latɔkɔ Petro aɛ, “Saate dile!” Obe wɔ di Petro lanu aɛ Saate dile nii, ni aayɔ osi awu wua nɔɔ aaminisa di ɔtɔ nɛ, diekye aadiki nya aatɛ. Ni aayefe aabuo di ntu kamɛ nɛ. ⁸ Kafɔɔ basaateketetɛ nwu nkpo bule, baasie di oklo kamɛ baatɔɔnanfi asabu nwu nkpo niayii ni ku kɔkpaku baatɔɔwako lekpo kotoko. Batakɔyo ku lekpo kotoko, nkpo diate fɛ nnɛɛ ditika afosi anɔɔ nɛ. ⁹ Di obe wɔ baadie di oklo kamɛ baabadu ni kasɔ, baanya akaa ɔtɔ beekutaa nii, di kɔkpaku kowo latika nii, bloblo owo kafɔɔ late ninfa.

¹⁰ Ninfɛ di Yesu latɔkɔ ma aɛ, “Biɔɔ kɔkpaku lee ko biediki ni kowo biwako.”

¹¹ Ninfɛ di Simon Petro layie aabuo di oklo kamɛ, ni aananfi asabu nwu nkpo aawako lekpo kotoko nɛ. Kɔkpaku kpɛ layii asabu nwu nkpo kamɛ kuoawo kɔlafa afosi anɔɔ kɔkpaku kutie. Nu kɔkpaku nwu nkpo lapɔ nkpo, asabu nwu nkpo ditabɛ. ¹² Ninfɛ di Yesu latɔkɔ ma aɛ, “Biwa biɛbale alesaa.” Basaateketetɛ nwu nkpo kuonwii lɛma ditafuo otu okpee ɔkaalɛ nwo aɛ, “Afo owe dile?” Diekye baatofɔ aɛ Saate nwu diale. ¹³ Nioso Yesu lakɔye aalaayɔ bloblo, ni aayɔ aata ma nɛ. Nkpo okle kafɔɔ aayɔ kɔkpaku nwu aata ma nɛ.

¹⁴ Nle mmle niale ditiefɔ di Yesu ladiki suoto aatuo ni basaateketetɛ nɔɔ, di obe wɔ aataka aakye ni kukpi kamɛ nɛ.

Yesu Lakakate Ko Petro.

15 Di obe wɔ batoole alesaa beeloo nii, Yesu lakaale Simon Petro ale, “Simon, Yohane obi, fambɔmbɔ mi fanlenkee mba mmle?”

Ninfɛ aadiki kanya ale, “Yii, Saate! Faye fale mbɔmbɔ fɔ.”

Ninfɛ di Yesu latɔkɔ nwɔ ale, “Toonyu afosobi nii.”

16 Yesu lakple aakaale nwɔ lenyɔɔfa ale, “Simon, Yohane obi, fambɔmbɔ mi?”

Ni aatɔkɔ nwɔ ale, “Yii, Saate! Faye fale, mbɔmbɔ fɔ.”

Ni di Yesu latɔkɔ nwɔ ale, “Toonyu bafoso nii.”

17 Yesu lakple aakaale nwɔ ditiefɛ ale, “Simon, Yohane obi, fambɔmbɔ mi?”

Ɔlaa wɔ mmle labuo Petro suoto, diekye ditiefɛ niale nni nkpo di Yesu lakaale ale, “Fambɔmbɔ mi?” Nioso, aatɔkɔ nwɔ ale, “Saate! Faye lesaa biala. Faye kafɔɔ fale mbɔmbɔ fɔ!”

Ninfɛ di Yesu latɔkɔ nwɔ ale, “Toonyu bafoso nii. 18 Nwaako kɔtɔkɔ fɔ nle, obe wɔ fale ni okosopo yi, fantaka fanlolaa suoto fansifi leba le ninle fɔ nii. Kafɔɔ nse fataba be yi, fabatakatɛsa nnɛɛ lefɔ fankyɔɔ, otii bamba nnii fɔ, mankpaa fɔ mansifiko leba le fonoomiɛ fale fakye nii.”

19 Ɔlaa wɔ mmle di Yesu labue ni yi, ootuo mmle okle di Petro kamakpi nii, an-yɔ dibu anta ni Yaa.

Nle sɛmaa, ni di Yesu latɔkɔ nwɔ ale, “Tikankoe!”

Yesu Lakakatɛ Aakyeko Di Saateketetɛ Wɔ Ambɔmbɔ Ni Suoto.

20 Petro lamunikii aanyu sɛmaa, ni aanya saateketetɛ wɔ di Yesu mbɔmbɔ ni ntikanko ma sɛmaa nɛ. Saateketetɛ nwu niale nwɔ niasie aakaako ni Yesu di kɔtɔɔfo alesaa nwu nkpo

kalekɔ aakaalɛ Yesu alɛ, “Saate, owe nimadiki fɔ anta?” ni nɛ. ²¹ Obe wɔ di Petro lanyɔɔ nii, ni aakaalɛ Yesu alɛ, “Saate, ni wɔ mmle mɔ, be nimawa nwɔ di suoto?”

²² Ninfɛ di Yesu ladiki kanya alɛ, “Nse nlɛ asie nkpa dilaadu obe wɔ kamawa nii, ɔmenle ninle fɔ ole? Afɔ yi, tikankoe!”

²³ Nioso ɔlaa wɔ mmle labie kuabuo di Yesu basaateketetɛ nwu nkpo kamɛ alɛ, saateketetɛ wɔ mmle dilaba kpi. Kafɔɔ Yesu ditabuɛ alɛ, ɔlobakpi. ɔlaa wɔ aabuɛ ni ninle alɛ, “Nse nlɛ asie nkpa dilaadu obe wɔ kamawa nii, ɔmenle ninle fɔ ole?”

²⁴ Nnwɔɔ ninle saateketetɛ wɔ nikɔkakatɛ ni di sɛɛlaa se mmle suoto nɛ. Nnwɔɔ kafɔɔ niekpana sɩ ɛɛtɛ nɛ. Buye kafɔɔ bulɛ sɛlaa se simuu eebuɛ ni nte nkpo.

²⁵ Asaa bamba kpinwu nkpe di Yesu labla nii. Nse fɛ ɔkpana alɛ bɔɔkpana lɛsaa biala le aabla ni mante ninwii ninwii yi, lefũ lenu nlɛ, kayi ka mmle batii ditabawe akũ ya mmle nwu nkpo amuu katekɔ.

Yaa Kanya Ninii Fole Sɛlɛɛ

Selee: Yaa Kanya Ninii Fole Sɛlɛɛ New Testament

copyright © 2008 Wycliffe Bible Translators, Inc.

Language: (Selee)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 22 Feb 2024 from source files dated 29 Jan 2022

b86b27c9-33ee-5380-a452-244df2dc60c6